

Nihánj me se-nanā Jesucristó nanā sa' cachrón síí cu'naj Marcos rihaan yanj a

Nanā nihánj taj xna'anj che'é síí cu'naj Juan síí cuta' ne man yuvií a

1 Nanj vaa guun che'e se-nanā Jesucristó nanā sa' a. ²Dan me se síí cu'naj Isaías síí nata' se-nanā Diose gaa naá ro', cachrón so' nanā nihánj rihaan yanj, ne: “Vaa síí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvií ve'é ca'mii nij yuvií ga so', qui'yaj so' a”, me se-nanā Diose nanā cachrón síí cu'naj Isaías rihaan yanj a. ³Ne yo'ó nanā cachrón uún so' me nanā nihánj, ne: “Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvií, ne ve'é ca'mii nij yuvií ga síí 'nij ra'a man ní' asa' ca'na' so' adonj”, taj síí cu'naj Isaías gaa naá, ne ase vaa cataj so' ro', ta'nga' danj guun adonj. ⁴Dan me se cavii síí cu'naj Juan síí cuta' ne man yuvií, ne vaj so' rej tacaan, ne ca'mii natáj so' rihaan nij yuvií, cataj so' se vaa nuchran' nimán nij yuvií, ne tanáj nij yuvií chrej chi'ii, ne ca'vee tinavij Diose cacun' tumé nij yuvií, taj Juan adonj. ⁵Ne dan me se curihanj ndo'o nij yuvií man estadó Judea

do', man ma'an chuman' Jerusalén do', ca'na' nij yuvií rihaan síí cu'naj Juan, ne cata' ne nij yuvií rá chráá cu'naj Jordán, qui'yaj Juan a. Dan me se nata' ya' nij yuvií che'é cacun' tumé nij yuvií, gaa ne cata' ne nij yuvií adonj.

⁶Dan me se síí cu'naj Juan me se cachij taj xráá xcuu camelló guun yatzíj nuu so', ne 'nij catuun so' 'o nuj, ne chá so' rquíí chá so' catzi' xtaan man quij chá so' a. ⁷Ne ca'mii natáj so', ne cataj so':

—Vaa 'o síí sca' doj rihanj, ne so' me síí ca'na' rej rihaan ní', ne 'unj nihánj me se ne nó xcúnj nachej nuj correá 'nij tacanj so' ma'. ⁸Ne síí uta' ne na uun man soj mej, tzaj ne ca'na' so', ne ca'na' Nimán Diose rihaan soj, qui'yaj so' adonj —taj síí cu'naj Juan rihaan nij yuvií a.

Nanā nihánj taj xna'anj se vaa cuta' ne Juan man Jesucristó a

⁹Ne güii yo' ta' asuun me se cavii Jesucristó chuman' Nazaret chuman' naj estadó Galilea, ne cata' ne so' rá chráá cu'naj Jordán, qui'yaj síí cu'naj Juan a. ¹⁰Nu' curihanj uún Jesucristó rque na, ne nu' quene'en so' se vaa naxra' rej

xta', ne quene'en so' se vaa nanij Nimán Diose raꝥ ma'an so', ne ase vaa cha'aꝥ ro', vaa Nimán Diose, curuvi' yo' a. ¹¹Gaa ne rej xta' ca'mii Diose rihaan Jesucristó, ne cuno nij síi nicun' ga Jesucristó nana ca'mii Diose, ne dan me se cataj Diose a:

—Ta'níi 'unj síi 'ee ndo'o raj man mé so', ne niha' ndo'o raj ni'yaj 'unj mán so' adonj —taj nana cavii rej xta' ca'mii Diose rihaan Jesucristó a.

Nana nihánj taj xna'anj se vaa guun ndo'o rá síi chree tihá' yu'unj síi chree man Jesucristó a

¹²Ne dan me se ca'anj ndo'o Jesucristó rej tacaan, qui'yaj Nimán Diose a. ¹³Ne vij chihaa güii vaj so' rej tacaan, ne guun rá síi chree tihá' yu'unj so' man Jesucristó, ne vaj Jesucristó rej man xcuu yuvaa, ne rqué nij se-mozó Diose me ma'an se cachiin rihaan Jesucristó a.

Nana nihánj taj xna'anj se vaa ca'anj Jesucristó estadó cu'naj Galilea a

¹⁴Dan me se gaa quisij quita'aa nij tanuu man síi cu'naj Juan, ne ca'anj Jesucristó estadó cu'naj Galilea, ¹⁵ne ca'mii natáj so' se-nana Diose nana sa', ne cataj so' se vaa nichrun' quisij güii ca'na' Diose guun chij Diose rihaan chumii nihánj, ne:

—Che'é dan nuchran' nimán soj, ne cuchuman rá soj cunꝥ soj se-nanaj nana sa' á —taj so' rihaan nij yuvii a.

Nana nihánj taj xna'anj se vaa cataj xna'anj Jesucristó rihaan ca'anj síi rii xcuaj se vaa canoco' nij so' man Jesucristó a

¹⁶Q güii cachén Jesucristó tu'va na lacuaná cu'naj na Galilea, ne

quene'en so' síi cu'naj Simón ga tinúú Simón síi cu'naj Andrés, ne dan me se nicun' roj so' tu'va na lacuaná, ne tiguúj roj so' nanj rque na, ne dan me se síi rii xcuaj me roj so' a. ¹⁷Gaa ne cataj Jesucristó rihaan roj so' a:

—Canoco' roj soj manj á. 'Q se síi naqui'yaj chre' xcuaj me roj soj, tzaj ne rej rihaan ní' me se guun roj soj síi naqui'yaj chre' yuvii, qui'yáj, ne canoco' nij yuvii manj a —taj Jesucristó rihaan roj tinuj roj so' a.

¹⁸Ne nu' canicaj roj so' tanáj roj so' xnánj roj so', ne canoco' roj so' man Jesucristó, ca'anj roj so' nanj adonj.

¹⁹Veé dan, ne cachéé nij so' doj, gaa ne quene'en Jesucristó man síi cu'naj Jacobo ta'níi síi cu'naj Zebedeo do', man tinúú Jacobo síi cu'naj Juan do' a. Dan me se nuu roj so' rque rihoo chéé rihaan na, ne naqui'yaj sa' roj so' nanj rii xcuaj, ne canacúun Jesucristó man roj tinuj roj so' canoco' roj so' man Jesucristó a. ²⁰Veé dan, ne canicaj roj so', tanáj roj so' man rej roj so' síi cu'naj Zebedeo rá rihoo ga nij se-mozó so', gaa ne cavii roj so' canoco' roj so' man Jesucristó, ca'anj roj so' nanj adonj.

Nana nihánj taj xna'anj se vaa quirii Jesucristó man yo'o nana chree nimán 'o snó'o a

²¹Dan me se catúj nij so' chuman' Capernaum, ne daj a güii naránj rá nij yuvii israelitá ca'anj Jesucristó ve' tucu'yón nij so' se-tucuanj Moisés, ne tucu'yón so' se-nana Diose man nij yuvii a. ²²Ne caráya'anj nij yuvii se-nana

so', che'é se cūu doj vaa se-nana so' ga se-nana nij síi naquiyaj cūu se-tucuañj Moisés a. 'O se ase vaa a'mii 'o síi uun chij ndo'o ro', danj ca'mii so' rihaan nij yuvií a.

²³Ne dan me se 'o güii naránj rá nij yuvií israelitá, ne yaán 'o síi nuu nana chree nimán rá ve' yo', ne caguáj so', ²⁴ne cataj so' se vaa:

—Me che'é ra'yunj so' man núj, ga Jesús Nazareno'. 'Na' so' tarí' so' man núj na'. Ne'enj mán so' se vaa síi guēē cavii rihaan Diose mé so' adonj —taj síi nuu nana chree nimán rihaan Jesucristó a.

²⁵Gaa ne canicaj Jesucristó, caxríj yuvaa Jesucristó man nana chree nuu nimán snó'o yo', ne cataj so':

—Dínj tu'vá so', curihañj so' cuaj nimán síi nihánj á —taj Jesucristó rihaan nana chree yo' a.

²⁶Ndaa quisnúu ma'an snó'o yo', qui'yaj nana chree, ne nucuaj ndo'o caguáj nana chree, ne curihañj nana chree nimán snó'o yo', ne nahuun sa' so' a. ²⁷Gaa ne ca'anj uxrá rá nij yuvií, ne xná'anj nij yuvií man tuvi' nij yuvií, cataj nij yuvií:

—Asá' ca'vee qui'yaj so' danj ga. Tucuáán naca me nihánj chuguañj. 'O se guun chij ndo'o síi nihánj, ne ndaa rihaan nij nana chree taj xna'anj síi nihánj daj qui'yaj nij so', ne uno nij nana chree yo' rihaan so' ga —taj nij yuvií rihaan tuvi' nij yuvií a.

²⁸Gaa ne cuchi' nana che'é Jesucristó rihaan cunudañj nij yuvií man nichrun' estadó Galilea yo' a.

Nana nihánj taj xna'anj se vaa nahuun sa' nii chej Simón Pedró, qui'yaj Jesucristó a

²⁹Dan me se curihañj nij tuvi' Jesucristó rá ve' tucuyónj nii se-tucuañj Moisés, gaa ne catúj taran' nij so' rá ve' tucua Simón ga Andrés, ne 'na' Juan ga Jacobo ga nij so' a. ³⁰Dan me se nii chej Simón ro', ran' no' chi'ii naca yuvaa, ne naj no', ne cataj xna'anj yo'o nij so' rihaan Jesucristó se vaa ran' uxrá no' a. ³¹Gaa ne cuchi' Jesucristó rej naj no', ne canó so' ra'a no', ne naxcaj so' man no', ne naxagaa no', ne nu' x'néj chi'ii xráa no', qui'yaj Jesucristó a. Ne veé maan orá dan qui'yaj chuvii no' cha nij so' nanj adonj.

Nana nihánj taj xna'anj se vaa nahuun que'ee síi ran', qui'yaj Jesucristó a

³²Dan me se cata' güiii, ne ti'nuu, ne nicaj nij yuvií cunudañj tuvi' nij yuvií síi ran' do', síi nuu nana chree nimán do', vaj nij yuvií rej ne Jesucristó a. ³³Ne dan me se que'ee nij yuvií man chuman' Capernaum yo' nuu chre' rihaan ta'yaa ve' ne Jesucristó a. ³⁴Gaa ne nahuun que'ee nij síi ran' daj a chi'ii, qui'yaj Jesucristó, ne quirii ndo'o so' nana chree nimán nij yuvií, ne ca'ne' so' suun rihaan nij nana chree se vaa se ca'mii nij nana chree a doj nana a. Dan me se ne ca'vej rá Jesucristó cataj nij nana chree se vaa cunuu yaan nij nana chree man Jesucristó a.

Nana nihánj taj xna'anj se vaa
ca'anj Jesucristó nu' nij ve' tucu'yón
nij yuvii israelitá se-tucuanj
Moisés, ca'mii natáj so' a

³⁵Gaa ne rej taxrej naxagaa
Jesucristó, ne cavii so' chuman'
Capernaum, ne ca'anj so' rej tacaan
cachinj ni'yaj so' rihaan Diose a.

³⁶Gaa ne canoco' nij tuví' Simón
man so', ³⁷gaa ne nari' nij so' man
so', ne cataj nij so' rihaan so' se vaa:
—Cunudanj nij yuvii nano' mán
so' á —taj nij tuví' Simón rihaan
Jesucristó a.

³⁸Gaa ne cataj Jesucristó rihaan
nij so':

—Cavii ní' rej nihánj, ca'anj ní'
yo'ó nij chuman' naj nichrun', ne
ca'mii natáj 'unj rihaan nij yuvii
man yo'ó nij chuman' uún á. 'O se
che'é dan ca'ná' 'unj adonj —taj
Jesucristó rihaan nij so' a.

³⁹Gaa ne ca'anj so' nu' nij
chuman' naj estadó Galilea, ne
ca'mii natáj so' rá ve' tucu'yón nij
síf man nij chuman' yo' se-tucuanj
Moisés, ne quirii so' man nij nana
chree nuu nimán yuvii a.

Nana nihánj taj xna'anj se
vaa nahuun sa' 'o síf ran' luj
ri'yuj, qui'yaj Jesucristó a

⁴⁰Gaa ne ca'na' 'o síf ran' luj ri'yuj,
ne canicon' ruj so' rihaan Jesucristó,
ne cachín ni'yaj so' rihaan
Jesucristó, ne cataj so' se vaa:

—Sese me rá so', ne ca'vee ca'nee
so' chi'ii xráj á —taj síf ran' luj
ri'yuj yo' rihaan Jesucristó a.

⁴¹Gaa ne cunuu 'ee rá Jesucristó
man so', ne cuta' Jesucristó ra'a
Jesucristó raá so', ne cataj Jesucristó:

—Me raj qui'yáj danj ei. Nahuún
so' qui'yáj adonj —taj Jesucristó
rihaan so' a.

⁴²Nu' danj cataj Jesucristó, ne nu'
quinavij luj xráá síf ran', ne nahuun
sa' so' cuaj a.

⁴³Gaa ne ca'mii yuvaa Jesucristó
ga so', ne quirii Jesucristó man
so' rá ve', ⁴⁴ne cataj Jesucristó
rihaan so':

—Se guun cataj xna'anj so' a doj
nana rihaan a 'ó yuvii ma'. Maan
se ca'anj so' rihaan xrej, ne tiháan
so' mán so' rihaan xrej se vaa
nahuún so', qui'yaj Diose, ne rque
so' rihaan Diose ndaa vaa cataj síf
cu'naj Moisés gaa naá ndaa vaa
no xcúun so' rque so' rihaan Diose
che'é yan nahuún so' adonj. Gaa ne
xcáj nij xrej cuentá se vaa nahuún
so' qui'yáj adonj —taj Jesucristó
rihaan síf nahuun yo' a.

⁴⁵Tzaj ne curihanj síf nahuun yo',
ne guun che'e so' ca'mii natáj ndo'o
so', ndaa síj, gaa ne cha'nuu ndo'o
nana se vaa nahuun so' qui'yaj
Jesucristó a. Ne dan me se ne
ca'vee a doj catuu ranga' Jesucristó
rá nij chuman', qui'yaj nij nana yo',
ne inanj rej tacaan vaj so', ne canó
nij yuvii cuchi' rej vaj so' a.

Nana nihánj taj xna'anj se
vaa nahuun sa' 'o síf na'vee
cachee, qui'yaj Jesucristó a

2 Dan me se cachén doj güii,
gaa ne catúj uún Jesucristó
chuman' Capernaum, gaa ne cuchi'
nana rihaan nij yuvii se vaa yanj
so' rá ve' a. ²Gaa ne cunuu chre'
que'ee ndo'o nij yuvii rihaan
ve' yo', ne ndaa raan ma'an mán
nij yuvii, ne ndaa rihaan ta'yaa

ve' yo' taj rej quisij doj cumān nij yuviī a. Ne nata' Jesucristó se-nanā so' rihaan nij yuviī a. ³Ne dan me se ca'na' doj yuviī uún, ne nij so' me se nicaj nij so' yo' o' tuvi' nij so' sí na'vee cachee, ne táa chihā ca'anj nij so' man sí na'vee cachee yo', ne dan me se guun rá nij so' cuchī' sí na'vee cachee yo' rihaan Jesucristó a. ⁴Tzaj ne ne ca'vee cuchī' sí na'vee cachee yo' rihaan Jesucristó, qui'yaj nij so' a ma'. 'O se man uxrá yuviī, ne ne ca'vee cachēn nij so' a. Che'é dan cavii nij so' xráá ve', ne caya' nij so' yu'uj xráá ve' rej nicun' Jesucristó rá ve', ne tananij nij so' yuvéé táa sí na'vee cachee yo' rihaan Jesucristó a. ⁵Dan me se gaa quene'en Jesucristó se vaa cuchumán uxrá rá nij tuvi' sí na'vee cachee yo' se vaa ca'vee nahuun so' qui'yaj Jesucristó, gaa ne cataj so' rihaan sí na'vee cachee yo':

—Navij cacun' xráá so', nanj tinuj —taj Jesucristó rihaan so' a.

⁶Ne ne doj sí naqui'yaj cuu se-tucuanj Moisés rá ve' yo' ga Jesucristó, ne nuchruj rāā nij so', ne guun rá nij so': ⁷“Me che'é a'mii sí nihánj danj ga. 'O se a'mii so' nana vaa nij rihaan Diose asan. Orún' Diose guun nucaj tinavij cacun' xráá yuviī nanj á”, guun rá nij sí naqui'yaj cuu se-tucuanj Moisés yo' a. ⁸Dan me se quene'en ma'an Jesucristó se vaa guun rá nij so' danj, ne che'é dan cataj so':

—Me che'é nuchruj rāā soj nana nanj ga. ⁹Tu'va rma'an 'unj se vaa navij cacun' xráá sí nihánj, rá soj a na'. Ca'vee cataj uun ní' navij

cacun' xráá sí nihánj na'. Ase ca'vee doj cataj ní' naxagaa so', ne nacue so' tuvée so', ne cachee so' cuaj, cataj ní' xa'. ¹⁰Dan me se me rá 'unj xcax soj cuentá se vaa sí ca'née Diose nicaj yu'unj man yuviī mej ne no xcúun 'unj tinaví 'unj cacun' xráá nij yuviī man rihaan chumij nihánj adonj —taj Jesucristó rihaan nij so' a.

Dan me se cataj Jesucristó rihaan sí na'vee cachee a:

¹¹—Rihaan so' sij na'vee cachee taj 'unj, ne nacue so' tuvée so', ne nan' so' tucua so' á —taj Jesucristó rihaan sí naj rihaan yuvéé yo' a.

¹²Gaa ne naxagaa sí na'vee cachee yo', ne nacue so' tuvée so', gaa ne curihanj so' rá ve', ni'yaj taran' nij yuviī man rá ve' a. Ndaa síj, gaa ne ca'anj rá nij yuviī, ne cataj nij yuviī se vaa sa' uxrá qui'yaj Diose, ne: —Daj chihāā mij ne quene'en ní' suun danj a man adonj —taj nij yuviī yo' a.

Nanā nihánj taj xna'anj se vaa nacúun Jesucristó man Leví, ne canoco' Leví man so' a

¹³Gaa ne curihanj uún Jesucristó, ca'anj so' tu'va na lacuaná, gaa ne ca'na' cunudanj nij yuviī rej vaj so', gaa ne tucua'yón so' man nij yuviī a.

¹⁴Veé danj vaj so', ne quene'en so' man sí cu'naj Leví ta'níí sí cu'naj Alfeo, ne dan me se ne so' 'o ve' a'néj nii puextó, ne a'néj so' puextó man yuviī a. Gaa ne cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

**Nana nihánj taj xna'anj se
vaa me rá Jesucristó raçuíj so'
man nij síí tumé cacun' a**

¹⁵Dan me se 'o güii yáán Jesucristó rá ve' tucua' síí cu'naj Leví yo', ne ca'na' ndo'o tuvi' so' síí a'néj puextó dɔ', yo'ó nij síí tumé ndo'o cacun' dɔ', ne catúj nij so' rá ve', ne ca'anj cayáán nij so' ga Jesucristó, ne dan me se man rcua'aan nij síí tucu'yón se-nana Jesucristó dɔ', ne chá cunudanj nij so' chraa a. 'O se que'ee ndo'o nij síí tumé cacun' yo' me canoco' se-nana Jesucristó a. ¹⁶Gaa ne nij síí fariseo naquilyaj çu se-tucuanj Moisés rihaan yuvií ro', quene'en nij so' se vaa chá Jesucristó chraa dɔ', co'o Jesucristó dɔ', ga nij síí a'néj puextó dɔ', ga yo'ó nij síí tumé ndo'o cacun' dɔ', gaa ne cataj nij so' rihaan nij síí tucu'yón se-nana Jesucristó, ne:

—Me che'é chá síí nihánj chraa ne co'o so' na ga nij síí a'néj puextó dɔ', ga yo'ó nij síí tumé cacun' dɔ', ga —taj nij so', xná'anj nij so' man nij síí tucu'yón se-nana Jesucristó a.

¹⁷Ne cuno Jesucristó nana ca'mii nij so', gaa ne cataj so' rihaan nij so' a:

—Síí vaa nucuaj ro', ne nano' nij so' man doctor ma'. Maan síí ran' ro', me síí nano' man doctor adonj. Gaa ne ase vaa síí ran' ro', danj vaa nij síí nihánj adonj. Ne ca'na' 'unj canacunj 'unj man síí sa' ma'. Che'é nij síí tumé cacun' ca'naj se vaa canoco' nij so' se-nanaj adonj. Tzaj ne sese síí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

**Nana nihánj taj xna'anj me che'é
ne toco' nij síí tucu'yón se-nana
Jesucristó x'naa man ma'an nij so' a**

¹⁸Ne dan me se toco' nij síí tucu'yón se-nana Juan dɔ', nij síí fariseo dɔ', x'naa man ma'an nij so', ne ca'na' nij so' rihaan Jesucristó, ne xná'anj nij so' man Jesucristó, cataj nij so':

—Me che'é, ne toco' núj sij tucu'yón se-nana Juan dɔ', sij tucu'yón se-nana nij síí fariseo dɔ', x'naa man ma'an núj che'é se aráj guee núj rihaan Diose, tzaj ne nij síí tucu'yón se-nana so' me se ne toco' nij so' x'naa man ma'an nij so' ga —taj nij so', xná'anj nij so' man Jesucristó a.

¹⁹Gaa ne cataj Jesucristó rihaan nij so' a:

—Ase vaa síí cuchruj sa'anj vaa 'unj, ne asa' ca'vee toco' nij síí man gaj x'naa man ma'an nij so', rá soj ga. Ase vaa síí cataj xcaj man chana ne man tuvi' so' dɔ', danj vaa nij síí man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' cuano ma'. ²⁰Tzaj ne vaa güii, ne guun yaníj 'unj rihaan nij so', qui'yaj yuvií, gaa ne nano' rá nij síí nihánj, gaa ne toco' nij so' x'naa man ma'an nij so' adonj.

**Nana nihánj taj xna'anj se vaa
nij síí noco' tucuaán nga ro',
se guun nucuaj nij so' cunɔ' nij
so' se-nana Jesucristó ma'**

²¹”Tzaj ne ase vaa yatzíj sin' vaa tucuaán nga noco' soj, ne se guun na'nej ní' mantá naca man yatzíj nga yo' ma'. 'O se sese qui'yaj ní'

danj, ne güii quinanj yuvii yatzíj yo', gaa ne nagüej mantá naca yo', ne sese cuxuun yuvii man yatzíj yo', ne quisin' yo', gaa ne cunu xij doj yu'uj taj man yatzíj nga yo' nanj adonj. ²²Ne dan me se ase vaa nuj nga nuj araa nii na vinó vaa uún soj ei. Ne se ca'vee tucu'yón 'unj se-tucuanj 'unj rihaan soj ma'. 'O se ase vaa na vinó naca vaa nana tucu'yón 'unj, ne se guun caraa yuvii na vinó naca rque nuj nga ma'. Sese danj qui'yaj yuvii, ne cuyanj na vinó cunu xee na vinó, ne se cacua nuj nga ma'. Che'é dan canuu yo', ne cayanj na vinó rihaan yo'ó a. Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan síi naca síi ne noco' tucuaán nga tucu'yón 'unj se-nanj nanj adonj —taj Jesucristó rihaan nij síi tucu'yón se-nana síi cu'naj Juan do', rihaan nij síi tucu'yón se-nana nij síi fariseo do' a.

**Nana nihánj taj xna'anj
che'é güii naránj rá ní' a**

²³'O güii naránj rá nij yuvii israelitá cachén Jesucristó ga nij síi tucu'yón se-nana so' rque 'o naa 'núu trigó, ne guun che'e nij síi tucu'yón se-nana so' vaj nij so' ne cuta nij so' doj caa trigó a. ²⁴Gaa ne cataj nij síi fariseo rihaan Jesucristó a:

—Ni'yaj so' ei. Me che'é 'yaj nij síi tucu'yón se-nana so' danj ga. Ne nó xcúun ní' qui'yaj ní' danj güii naránj rá ma' —taj nij síi fariseo rihaan Jesucristó a.

²⁵Gaa ne cataj Jesucristó rihaan nij so' a:

—Me che'é, ne ne nayaa soj rihaan danj Diose daj qui'yaj síi cu'naj David gaa naá a. Gaa quina'aan rque nij tuvi' nij so', ²⁶gaa ne catúj so' rá nuvi' gaa cayáan síi cu'naj Abiatar xrej ata suun nocoj doj, ne chá so' rachruún taj rihaan se-mesa Diose a. Ne ne nó xcúun so' chá so' rachruún yo', maan orún' nij xrej nó xcúun chá rachruún yo' a. Ne go' uún síi cu'naj David yo' chá nij tuvi' so' uún a. Tzaj ne ne cataj Diose se vaa tumé síi cu'naj David cacun' ma' —taj Jesucristó rihaan nij síi fariseo, ²⁷gaa ne cataj uún so' rihaan nij síi fariseo a— Maan che'é rej ca'vee cavii sa' nij yuvii me cuchruj Diose güii naránj rá nanj á. Nuveé che'e rej cataj nij yuvii suun navij rá güii naránj rá me qui'yaj Diose man nij yuvii a ma'. ²⁸Che'é dan me, 'unj sij ca'née Diose nijcaj yu'unj man yuvii ro', no xcúnj quirii ta'ngaj daj qui'yaj yuvii güii naránj rá nanj adonj —taj Jesucristó rihaan nij síi fariseo a.

**Nana nihánj taj xna'anj se
vaa nahuun sa' 'o síi nacoj
ra'a, qui'yaj Jesucristó a**

3 Gaa ne natúj Jesucristó rá ve' tucu'yón nij síi israelitá se-tucuanj Moisés, ne dan me se yáan 'o snó'o nacoj ra'a rá ve' yo' a. ²Ne nij síi fariseo me se yáan nij so' rá ve' yo', ne tumé uxrá nij so' man Jesucristó sese nahuun yuvii qui'yaj so' gaa güii naránj rá nij yuvii israelitá a. Danj qui'yaj nij so' che'é rej guun rá nij so' cuta' nij so' cacun' xraá Jesucristó a. ³Gaa ne cataj Jesucristó rihaan síi nacoj ra'a a:

—Naxumaan so' canicun' cayá so' sca'núj núj á —taj Jesucristó rihaan so' a.

⁴Gaa ne xná'anj Jesucristó man nij sí fariseo yo', cataj so', ne:

—No xcúun ní' racuíj ní' man tuvi' ní' güii naránj rá ní' na', ase no xcúun ní' qui'yaj chi'ij ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúun ní' tjanii ní' man tuvi' ní' rihaan sayuun gaa güii naránj rá gaa a na'. Ní'yaj uun ní' cavi' so' gaa güii naránj rá gaa a na'. —Danj taj Jesucristó rihaan nij so' a.

Tzaj ne dínj tu'va nij so' a. ⁵Gaa ne ca'maan rá Jesucristó, ne ni'yaj so' man nij sí fariseo yo' a. 'Q se nanó ndo'o rá so' che'é nij so' se vaa sí nichraj ndo'o nimán me nij so' a.

Gaa ne cataj Jesucristó rihaan sí nacoq ra'a yo' a:

—Tucúá so' ra'á so' á —taj Jesucristó rihaan so' a.

Ne tucúá so' ra'a so', ne cunuu sa' ra'a so' nanj adonj. ⁶Gaa ne curihanj nij sí fariseo yo', ne cunuu chre' nij so' ga nij sí noco' man sí cu'naj Herodes, ne ca'anj nij so' rej yaníj, ne guun rá taran' nij so' daj gaa qui'yaj nij so' ne cavi' Jesucristó a.

Nana nihánj taj xna'anj se vaa xcax ndo'o nij yuvií cuentá se vaa sí 'yaj nahuun sa' yuvií me Jesucristó a

⁷Gaa ne cavii Jesucristó ga nij sí tucu'yón se-nana so' rej yo', ne ca'anj so' tu'va na lacuaná a. Ne canoco' uxrá yuvií man so' a. Dan me se sí man estadó Galilea do', ⁸sí man estadó Judea do', sí man chuman' Jerusalén do', sí man

estadó Idumea do', sí man rej rnej chráá cu'naj Jordán do', sí man chuman' Tiro do', sí man chuman' Sidón do', cuno nij so' nana daj qui'yaj Jesucristó che'é nij sí ran', ne che'é dan ca'na' ndo'o nij so' rihaan Jesucristó a. ⁹Gaa ne cataj Jesucristó rihaan nij sí tucu'yón se-nana so' se vaa qui'yaj chuií nij so' 'o rihoo chéé rihaan na catuu so', gaa ne se gaa nanj curu'maan nij yuvií man so', taj so' a. ¹⁰Q se nahuun sa' uxrá yuvií, qui'yaj Jesucristó, ndaa síj, gaa ne taran' nij sí ran' ro', canoco' uxrá nij so' man Jesucristó che'é rej ca'vee cano ra'a nij so' man so' gaa ne nahuun sa' nij so', rá nij so' a. ¹¹Ne nij sí nuu nana chree nimán ro', gaa quene'en nij so' man Jesucristó, ne ca'anj quinaj nij so' rihaan yo'óo tacóo Jesucristó, ne cataj nij nana chree se vaa:

—So' me ta'níí Diose ya adonj —taj nij nana chree rihaan Jesucristó a.

¹²Gaa ne ca'ne' ndo'o Jesucristó suun rihaan nij nana chree se vaa se guun nata' nij so' rihaan nij yuvií che'é so' a.

Nana nihánj taj xna'anj se vaa quinarii Jesucristó chuií sí ca'anj nata' se-nana so' a

¹³Gaa ne cavii Jesucristó xráá quij, ne canacúun so' man nij sí me rá so' ca'na' rihaan so', gaa ne cavii nij so', ne cuchi' nij so' rihaan Jesucristó a. ¹⁴Gaa ne quinarii Jesucristó man chuií nij so' se vaa guun nij so' apóstol nata' rihaan yuvií che'é so' a. 'Q se guun rá so' se vaa cachee chuií nij so' ga

so', ne guun rá so' ca'nej so' man chujij nij so' ca'mii natáj nij so' rihaan nij yuvii a. ¹⁵Ne guun rá so' nago' so' suun uun chij ra'a nij so' che'é rej ca'vee nahuun sa' nij sí ran' ne quirii nij so' man nij nana chree nimán nij yuvii a. ¹⁶Dan me se cune' Jesucristó man sí cu'naj Simón, ne tucu'náj so' Pedró man Simón a. ¹⁷Ne cune' so' man sí cu'naj Jacobo ta'níi sí cu'naj Zebedeo, ne cune' so' man tinúú Jacobo sí cu'naj Juan, ne tucu'náj so' Boanerges man roj so', ne nana "Boanerges" ro', taj se vaa ase vaa ta'níi ya'anj tu'vii vaa roj so' a. ¹⁸Ne cune' so' man sí cu'naj Andrés do', man sí cu'naj Felipé do', man sí cu'naj Bartolomé do', man sí cu'naj Mateo do', man sí cu'naj Tomás do', man sí cu'naj Jacobo ta'níi sí cu'naj Alfeo do', man sí cu'naj Tadeo do' a. Ne cune' so' man yo'ó sí cu'naj Simón, ne tuvi' nij sí me rá cunu' ga gobiernó man Romá me so' a. ¹⁹Ne cune' Jesucristó man sí cu'naj Judas Iscariote, ne so' me sí tacuachén man Jesucristó rihaan nij sí taj ri'yunj man Jesucristó a.

Nana nihánj taj xna'anj se vaa cuta' nij sí fariseo cacun' rmí' xráa Jesucristó se vaa ca'mii Jesucristó ga sí chree a

Gaa ne catúj Jesucristó rá ve' a. ²⁰Gaa ne cunu chre' ndo'o uún nij yuvii rihaan so', ne dan me se guun chruj ndo'o rihaan Jesucristó ga nij sí tucu'yón se-nana so', qui'yaj nij yuvii, ne ndaa ne gaa ya'núj rihaan Jesucristó ga nij sí tucu'yón se-nana so' cha nij so' chraa, qui'yaj nij yuvii a. ²¹Gaa ne cuchi' nana

rihaan nij tuvi' Jesucristó daj ran' so' 'yaj nij yuvii, ne che'é dan ca'anj nij tuvi' Jesucristó quita'aa nij so' man Jesucristó a. 'O se guun rá nij tuvi' Jesucristó se vaa guun snuj Jesucristó a. ²²Gaa ne nij sí naqui'yaj cuu se-tucuanj Moisés sí cavii chuman' Jerusalén ro', cataj nij so' se vaa sí chree uun chij sí cu'naj Beelzebú nu' nimán Jesucristó, ne che'é dan guun nucuaj Jesucristó quirii Jesucristó nana chree nimán yuvii qui'yaj sí chree uun chij yo', taj nij sí naqui'yaj cuu se-tucuanj Moisés yo' a.

²³Gaa ne canacúun Jesucristó man nij sí naqui'yaj cuu se-tucuanj Moisés, ne nanó so' doj cuentó rihaan nij so', ne dan me se cataj so', ne:

—Asa' ca'vee quirii sí chree sí cu'naj Satanás man ma'an tuvi' so' nana chree nimán nij yuvii, rá nij soj ga. Daj chihaa míj se ca'vee qui'yaj so' danj a man adonj.

²⁴Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirí' nu' nanj adonj. ²⁵Ne sese unu' ta'aj nij yuvii man 'o barrio ga tuvi' yuvii sí man ma'an barrio yo', ne vaa güii, ne quirí' nu' barrio yo', qui'yaj nij so' nanj adonj. ²⁶Che'é dan me sese unu' sí chree sí cu'naj Satanás ga tuvi' ma'an so', ne sese racuíj sí chree man 'unj quirii 'unj nana chree nimán nij yuvii, ne se ca'vee guun chij sí chree yo' sese navij tuvi' so' ma'. Maan se quirí' nu' so' nanj adonj.

27”Ne sese me rá yo'o so' catuu so' rá ve' tucúá sí ru'vee qui'yaj ituu so' si'yaj sí ru'vee yo', ne asino numíj so' man sí ru'vee yo', gaa ne canicaj so' catzij so' tucúá sí ru'vee yo' ei. Ne ase vaa 'yaj sí atúj tucúá sí ru'vee ro', danj 'yáj man sí chree yo' chuguanj. Dan me se numíj 'unj man so', ne cuano nihánj a'néj 'unj man nu' nij sí 'nij ra'a so' adonj.

28”Cataj xna'anj yá yá 'unj rihaan soj cuano se vaa nu' cacun' tumé yuvij do', me ma'an nana chi'ij ca'mii yuvij do', ca'vee tinavij Diose cacun' yo' che'é nij yuvij a.

29”Tzaj ne sese nachri' yo'o so' ni'yaj so' man Nimán Diose, ne daj chihaa míj se quinavij cacun' yo' xráá so' a ma'. Tananj quitaj cacun' yo' xráá so' nu' cavii nu' ca'anj nanj adonj.

30—Danj cataj Jesucristó rihaan nij sí naqui'yaj cuu se-tucuanj Moisés, che'é se aj cataj nij so' se vaa nana chree nuú nimán so' a.

Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', ase vaa ra'vij Jesucristó do', vaa nij sí uno rihaan Diose a

31 Gaa ne ca'na' nii Jesucristó do', tinúú Jesucristó do', ne nicun' nij so' xe' rihaan ve' nuu Jesucristó, ne ca'née nij so' nana rihaan Jesucristó se vaa curihanj so' ca'na' so' rej nicun' nij so' a. 32 Ne yáán ndo'o yuvij nu' anicaj rej ne Jesucristó, ne cataj nii rihaan Jesucristó a:

—Nicun' ní so' nicun' tinúú so' nicun' xe', ne me rá nij so' quene'en nij so' mán so', Jesús —taj nii rihaan Jesucristó a.

33 Gaa ne cataj Jesucristó rihaan nij sí nata' rihaan so' se vaa:

—Me chana me ní 'unj, rá soj ga. Me sí me tinúú 'unj, rá soj ga —taj Jesucristó rihaan nij so' a.

34 Gaa ne ni'yaj Jesucristó man nij sí yanj nu' anicaj rej ne so', ne cataj so' a:

—Ni'yaj soj ei. Ase vaa ní 'unj do', ase vaa tinúú 'unj do', vaa nij sí nihánj adonj. 35 Yuvij uno rihaan Diose ro', ase vaa tinúú 'unj do', ase vaa ra'vij 'unj do', ase vaa ní 'unj do', vaa nij so' adonj —taj Jesucristó a.

Nihánj me cuentó nanó Jesucristó che'é 'núú trigó tix'nuu yo'o so' a

4 Gaa ne ca'anj Jesucristó tu'va na lacuaná, ne guun che'e so' tucu'yón so' se-nana so' rihaan yuvij tu'va na lacuaná a. Ne dan me se ca'na' ndo'o yuvij rihaan so', ne che'é dan cavii so' rque 'o rihoo chée rihaan na, ne ca'anj cane so' rque rihoo yo', ne canicun' nij yuvij rihaan yo'óo tu'va na lacuaná yo' a.

2 Gaa ne tucu'yón so' man nij yuvij, nanó ndo'o so' cuentó rihaan nij yuvij, ne dan me se cataj so' rihaan nij yuvij a:

3—Cuno soj ca'mij á. Dan me se curihanj 'o sí me rá cuchruj naa 'núú trigó, ne tix'nuu so' 'núú trigó yo' rihaan yo'óo, 4 ne cayuu doj 'núú trigó yo' rá chrej chée yuvij, ne ca'na' xtâj chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj. 5 Ne yo'ó ta'aj 'núú trigó yo' ro', cayuu rihaan yuvej rej taj catun' yo'óo a. Che'é dan cuaj xra' stanj le'ej a. 6 Veé dan, ne quisíj güii,

ne cuchrii naa le'ej, qui'yaj naán, che'é se ne ca'vee ca'anj nij yáa naa le'ej yo' a man adonj. ⁷Ne yo'ó ta'aj 'núu trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj yo', ne ne cavii sa' naa yo' a man adonj. ⁸Ne yo'ó ta'aj 'núu trigó yo' ro', cayuu rihaan yo'óó sa', ne naa yo' ro', cachij sa' a. Dan me se rihaan ta'aj yo'óó sa' yo' ico chi' ya 'núu cavii, qui'yaj 'o 'o 'núu le'ej nii quinij rihaan yo'óó sa' yo', ne rihaan yo'ó ta'aj yo'óó sa' yo' va'nuj chihaa ya 'núu cavii, qui'yaj 'o 'o 'núu le'ej nii quinij rihaan yo'óó sa' yo', ne rihaan yo'ó ta'aj yo'óó sa' yo' cientó ya 'núu trigó cavii, qui'yaj 'o 'o 'núu le'ej nii cayuu rihaan yo'óó sa' yo' uún nanj adonj —taj Jesucristó, ⁹gaa ne cataj uún so'— Sese taj yu'uj xréé soj, ne cunó soj nana nihánj ei. —Veé danj quisij cuentó yo' cuentó nanó Jesucristó a.

Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvii a

¹⁰Gaa ne gaa guun yaníj so' rihaan nij yuvii, ne nij síf chéé ga so' do', chuvij nij apóstol cune' so' man nata' rihaan yuvii che'é so' do', xná'anj nij so' man so' che'é nij cuentó nanó so' rihaan nij yuvii a.

¹¹Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumii nihánj adonj. Dan me se nana ne ne'en cunudanj yuvii me nana yo' nana tihaan Diose rihaan soj adonj.

Ne rihaan yo'ó nij yuvii man rihaan chumii me se inanj cuentó che'é nij rasuun nanoj rihaan nij yuvii, ¹²gaa ne ni'yaj nij so' do', nano xrej nij so' do', tzaj ne se quene'en nij so' do', se xcaj nij so' cuentá do', a ma'. 'O se na'vej uxrá rá nij so' canicaj nimán nij so' ne güej cacun' xráá nij so' a man adonj —taj Jesucristó rihaan nij so' a.

Nana nihánj taj xna'anj me taj cuentó che'é 'núu trigó yo' a

¹³Gaa ne cataj uún Jesucristó rihaan nij so' a:

—Ne ne ne'en soj me taj cuentó nihánj cuentó che'é 'núu trigó tix'nuu yo'o so' na'. Ne asa' ca'vee xcaj soj cuentá che'é yo'ó nij cuentó, rá soj ga.

¹⁴”Dan me se síf tix'nuu 'núu trigó ro', so' me síf nata' se-nana Diose rihaan yuvii adonj. ¹⁵Ne ase vaa 'núu cayuu rá chrej qui'yaj síf tix'nuu 'núu ro', danj vaa ta'aj nij síf uno se-nana Diose, ne dan me se uno nij so' doj tzin', tzaj ne nu' cuno nij so', ne nu' 'na' síf chree síf cu'naj Satanás, ne a'néj síf chree se-nana Diose nana cayuu rque nimán nij so' a.

¹⁶”Ne vaa ta'aj 'núu trigó cayuu rihaan yujej uún, ne 'núu trigó yo' ro', ase vaa nij síf uno se-nana Diose vaa yo', ne cuaj uun niha' rá nij so' canoco' nij so' nana yo' a. ¹⁷Tzaj ne ataa xcaj sa' nij so' cuentá, ne gaa uun che'e yuvii 'yaj yuvii sayuun man nij so' che'é nana noco' nij so', ne cuaj nu' uun na'aj nij so', ne tanáj nij so' nana yo' cuaj nanj adonj.

¹⁸”Ne ase vaa nij 'núu trigó cayuu sca'núj coj tanj ro', danj vaa yo'ó

ta'aj nij yuvii uún, ne dan me se uno nij so' se-nana Diose, ¹⁹tzaj ne nanó ndo'o rá nij so' che'é se man rihaan chumií nihánj, ne me ndo'o rá nij so' qui'yaj canaán nij so' sa'anj, don tihá' yu'unj nij so' man ma'an nij so' che'é sa'anj, ne me ma'an yo'ó nij rasuun nano' ndo'o nij so', ne che'é dan tanáj xco nij so' se-nana Diose, ne ne 'yaj nij so' se sa' a ma'.

²⁰Ne 'núú trigó cayuu rihaan yo'óo sa' ro', ase vaa síí uno se-nana Diose vaa yo', ne uun niha' rá so' uno so' nana yo', ne nuu sa' nimán so' rihaan Diose a. Ne sa' doj tzin' 'yaj ta'aj nij so', ne sa' doj 'yaj yo'ó ta'aj nij so', ne sa' uxrá doj 'yaj yo'ó ta'aj nij so' uún nanj adonj. —Veé danj quisíj nana ca'mii Jesucristó che'é cuentó yo' a.

Nihánj me cuentó nanó

Jesucristó che'é aga' ya'an a

²¹Gaa ne cataj Jesucristó rihaan nij so' a:

—Ne gaa rmi' me seachrón nii ya'an raá aga' ya'an, ne axríj yuve nii aga' ya'an yo' rque 'o chrúun do', rque yuvé do', rá soj na'. Taj ma'. Sese rmi', ne uta' nii aga' yo' rej xta', gaa ne cuchuguun sa' ndo'o adonj.

²²Dan me se a 'ó rasuun caxríj yuve yuvií se qui'nij yuve ma'. Ya nurihanj yo' vaa güii, ne cunudanj yuvií quene'en, vaa güii adonj. Ne cunudanj rasuun 'yaj yuve yuvií quene'en daj a yuvií vaa güii ei.

²³Sese taj yu'uj xréé soj, ne cuno soj nana nihánj ei —taj Jesucristó rihaan nij so', ²⁴gaa ne cataj uún so' se vaa— Nuchruj raá soj nana ca'mij nihánj ei. Sese qui'yaj suun

uxrá soj nari' soj nana nihánj, ne rque ndo'o Diose doj nana nari' uún soj nanj adonj. ²⁵O se síí nari' nana ro', doj a nari' uún so', qui'yaj Diose nanj adonj. Ne síí na'vej rá nari' sa' nana ro', tananj ca'nee Diose doj nij nana nari' so' man so', ne quinaj uun so' nanj adonj —taj Jesucristó rihaan nij so' a.

Nihánj me cuentó nanó

Jesucristó che'é naa a

²⁶Gaa ne cataj Jesucristó: —Dan me se ase vaa achij naa cuchruj 'o snó'o ro', danj gaa guun chij Diose rihaan chumií nihánj, ne snó'o yo' ro', cunô so' 'núú rihaan yo'óo, ²⁷ne síj cunô so', ne otoj so' rej nii, ne naxagaa so', ne danj 'yaj so' daj a güii, ne dan me se xra' naa le'ej, ne achij naa le'ej, ne ne ne'en uxrá snó'o me che'é me xra' naa ne achij naa a ma'. ²⁸Achij ma'an naa rihaan yo'óo, ne dan me se asino yaan xra' naa, gaa ne anó tihaj, gaa ne uun xíj yumíí naa a. ²⁹Gaa ne gaa quisíj tan' xráá naa, ne a'neé snó'o man nij síí quirii naa nanj a. 'O se quisíj tió quirii nii naa nanj adonj —taj Jesucristó a.

Nihánj me cuentó nanó Jesucristó che'é caân cuêj mostazá xlá a

³⁰Gaa ne cataj uún Jesucristó: —Daj gaa guun chij Diose rihaan chumií nihánj, rá soj ga. ³¹Dan me se ase vaa achij caân cuêj mostazá xlá ro', danj gaa guun chij Diose rihaan chumií nihánj adonj. Dan me se axríj nii caân yo' rihaan yo'óo, ne caân yo' me se caân le'ej nii doj vaa caân yo' rihaan cunudanj nij caân man rihaan

chumii nihánj, ³²tzaj ne dan me se gaa axrij nii caân yo' rihaan yo'óó, ne achij caân yo', ne xij doj uun yo' rihaan cunudanj nij coj man tacaan, ne xcaan ndo'o vaa ra'a cuêj yo', ne a'vee 'yaj nij xtâj vaj rej xta' saca' nij xo' raâ cuêj yo', ne aráán cachun' xráá nij xo', 'yaj cuêj mostazá xlá yo' nanj adonj —taj Jesucristó a.

**Nana nihánj taj xna'anj
se vaa inanj cuentó nanó
Jesucristó rihaan nij yuvii a**

³³Dan me se que'ee cuentó vaa danj cuentó che'é nij rasuun nanó Jesucristó rihaan nij yuvii, nata' so' se-nana Diosé rihaan nij yuvii, ndaa vaa guun nucuaj nij yuvii cuno nij yuvii a. ³⁴Taj vaj yo'ó nana nanó Jesucristó rihaan nij yuvii a ma'. Maan inanj cuentó che'é nij rasuun nanó Jesucristó rihaan nij so', tzaj ne rihaan ma'an nij sí tucu'yón se-nana so' me se ataj xna'anj so' che'é nij cuentó yo' rihaan nij so' a.

**Nana nihánj taj xna'anj se vaa ca'ne'
Jesucristó suun rihaan na do', rihaan
nana do', se vaa canicun' yo' a**

³⁵Gaa ne rej ti'nuu güii yo' me se cataj Jesucristó rihaan nij sí tucu'yón se-nana so', ne:

—Ca'anj ní' ndaa yo'ó níchrej tu'va na lacuaná á —taj so' rihaan nij so' a.

³⁶Gaa ne nij sí tucu'yón se-nana Jesucristó me se ca'anj rihoo nuu nij so' ga Jesucristó, qui'yaj nij so', ne quináj nij yuvii tu'va na lacuaná, ne vaa doj nij rihoo canoco' xcó nij so' a. ³⁷Gaa ne cavii uxrá nana yuvaa rihaan na lacuaná, ne quinaan ndo'o rihaan na, ne catúj

uxrá na rque rihoo yo', ne daj doj caraa nu' rque rihoo, qui'yaj na a. ³⁸Ne Jesucristó me se naj so' rej sihuu rihoo, ne 'nij raâ so' camá, otoj so' a. Gaa ne narii nij sí tucu'yón se-nana Jesucristó ne rihaan Jesucristó, ne cataj nij so':

—Nihánj me se daj doj cavi' ní', maestro, ne me che'é ne rihuun rá so' ga —taj nij so' rihaan Jesucristó a.

³⁹Gaa ne canicun' caya Jesucristó, ne caxrij yuvaa so' man nana, ne cataj so' rihaan na lacuaná:

—Gaa dínj rihaan so', ne se quinaán so' ma' —taj so', gaa ne nu' canicun' nana, ne canicun' dínj rihaan na lacuaná yo', qui'yaj Jesucristó nanj adonj.

⁴⁰Gaa ne cataj Jesucristó rihaan nij sí tucu'yón se-nana so' a:

—Me che'é chu'vi' ndo'o nimán soj ga. Ataa cuchuman sa' rá soj ni'yaj soj manj na' —taj so' rihaan nij so' a.

⁴¹Gaa ne kuchu'vi' ndo'o nij so', ne xná'anj nij so' man tuvi' nij so', cataj nij so':

—Daj sij me sí nihánj ga. Ndaa nana do', ndaa na do', uno a'mii so' ason —taj nij so' rihaan tuvi' nij so' a.

**Nana nihánj taj xna'anj se
vaa quirii Jesucristó man nij
nana chree nimán 'o snó'o a**

5 Gaa ne ca'anj nij so' ndaa níchrej tu'va na lacuaná yo', ndaa rej ne nij sí man chuman' Gadara a. ²Ne rej yo' me se taj yu'uj yuvej rej achin' nii xngá a. Dan me se nanij Jesucristó ga nij sí tucu'yón se-nana so' rque rihoo,

ne nu' curihanj 'o snó'o nuu nana chree nimán rque yu'uj yuvej yo', ne cuchí' so' rihaan Jesucristó a.

³Ne sí nuu nana chree nimán me se cu'yón so' cayáán so' rque yu'uj yuvej yo', ne ne ca'vee numíj nij yuvií man rej yo' aga' ne' man so' a. ⁴O se aj uun que'ee ndo'o numíj nij yuvií ne' do', aga' ne' do', man so', tzaj ne cuxra' so' aga' ne', ne ca'ne' so' ne' do', ne a 'ó yuvií taj quisíj naqui'yaj camanj man so' a. ⁵Ne niganj me se nuvíi nigan' cayáán so' rque nij yu'uj yuvej do', vaj so' xráá quij do', ne caguáí ndo'o so', ne nicaj so' yahij sihaa ca'ne' ndo'o so' nee man ma'an so' uún a.

⁶Dan me se gaa quene'en so' man Jesucristó se vaa gan' uxrá vaj Jesucristó, ne cunánj so' ndaa rej vaj Jesucristó, ne na'víj so' rihaan Jesucristó, ⁷ne nucuaj ndo'o caguáí so' rihaan Jesucristó, ne cataj so':

—Aj ne'én 'unj se vaa ta'nij Dióse síi sa' ndo'o mé so', Jesús. Me che'é 'ná' so' rej né 'unj ga. Cataj xna'anj sa' 'unj rihaan so' ni'yaj Dióse se vaa se qui'yáá so' sayuun manj ma' —taj síi nuu nana chree nimán rihaan Jesucristó a.

⁸Danj ca'mii so' rihaan Jesucristó che'é se aj cataj Jesucristó rihaan so' se vaa: “Rihaan so' nana chree nuu nimán síi nihánj cataj xna'anj 'unj se vaa curihanj so' nimán síi nihánj á”, taj Jesucristó, tzaj ne ne guun rá nana chree curihanj so' ma'.

⁹Gaa ne xná'anj Jesucristó man nana chree, ne cataj so':

—Daj cu'naj so' ga —taj Jesucristó rihaan so' a.

Ne:

—X'ne' nocoo ndo'o me núj, ne que'ee ndo'o núj á —taj nana

chree rihaan Jesucristó, ¹⁰ne cachíín ni'yaj nij nana chree yo' rihaan Jesucristó se vaa se ca'neé Jesucristó man nij nana chree ndaa yo'ó rej yaníj ma'.

¹¹Dan me se rej tacaan rej nicun' nij so' me se chéé 'o x'ne' nocoo xcáá, chá nij xo' coj, ¹²gaa ne cachíín ni'yaj nij nana chree rihaan Jesucristó, cataj nij so':

—Ca'nej so' man núj catuu núj nimán nij xcáá á —taj nij nana chree rihaan Jesucristó a.

¹³Gaa ne ca'vej rá Jesucristó qui'yaj nij so' danj, gaa ne curihanj nij so' nimán snó'o yo', gaa ne catúj nij so' nimán nij xcáá, ne dan me se ruvaa uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree yo' nimán nij xcáá yo', gaa ne cunánj ndo'o nij xo', ca'anj nij xo', ne veé danj vaj nij xo', ne quiniij nij xo' rque na, ne canó xráá nij xo' nanj adonj. Ne dan me se vij míj xcáá me nij xcáá canó xráá rque na a.

¹⁴”Ne nij síi tumé nij xcáá ro', cunánj nij so' ca'anj cataj xna'anj nij so' rihaan nij yuvií man chuman do', rihaan nij yuvií man tacaan do' a. Gaa ne dan me se ca'na' ni'yaj nij yuvií se vaa guun, gaa ne ca'na' nij so' rihaan Jesucristó, ¹⁵gaa ne quene'en nij so' man síi curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj ti'inj se snúú so', ne nuu sa' so' a. Gaa ne cuchu'vi' ndo'o nij yuvií se vaa qui'yaj Jesucristó, ¹⁶gaa ne cataj xna'anj nij síi quene'en yo' rihaan nij yuvií daj qui'yaj Jesucristó che'é síi nuu nana chree nimán do', ga nij

xcáa do', ¹⁷gaa ne guun che'e nij yuvii cachíin ni'yaj nij yuvii rihaan Jesucristó se vaa curihanj so' rej yanj nij so' ca'anj so' rej yanj a.

¹⁸”Che'é dan cavii Jesucristó rque rihoo chéé rihaan na, gaa ne dan me se cachíin ni'yaj síi curihanj nana chree nimán rihaan Jesucristó se vaa ca'vej rá Jesucristó ca'anj so' ga Jesucristó a. ¹⁹Tzaj ne ne ca'vej rá Jesucristó ca'anj so' ga Jesucristó a. Tananj cataj Jesucristó rihaan so' se vaa:

—Cavii so' nán' so' ve' tucua so' rej yanj nij tuví' so', ne cataj xna'anj so' rihaan nij so' nu' se vaa qui'yaj síi 'nij ra'a man ní' che'é so', ne cataj so' se vaa cunuu ee rá so' ni'yaj so' mán so' á —taj Jesucristó rihaan síi curihanj nana chree nimán a.

²⁰Gaa ne ca'anj síi curihanj nana chree nimán, ne guun che'e so' ca'mii natáj so' rihaan nij yuvii man rej cu'naj Chi' Chuman', ne cataj xna'anj so' nu' se vaa qui'yaj Jesucristó che'é so' a. Ne ca'anj ndo'o rá cunudanj nij yuvii cuno se-nana so' a.

Nana nihánj taj xna'anj che'é chala cunii do', che'é chana chij do', nahuun sa', qui'yaj Jesucristó a

²¹Dan me se nuu Jesucristó rque rihoo chéé rihaan na, ne ca'anj uún so' ndaa nichrej tu'va na lacuaná, gaa ne cunuu chre' ndo'o yuvii rihaan so', ne vaj so' tu'va na lacuaná a. ²²Gaa ne dan me se ca'na' yo'o nij síi 'nij ra'a ve' tucu'yón nij yuvii israelitá se-tucuanj Moisés, ne Jairo cu'naj so' a. Dan me se quene'en síi

cu'naj Jairo man Jesucristó, gaa ne canicun' ruj so' rihaan Jesucristó, ²³gaa ne cachíin ni'yaj uxrá so' rihaan Jesucristó, ne dan me se cataj so' se vaa:

—Ta'nij chala cunii ro', ran' ndo'o no', ne daj doj cavi' no', ne me rá 'unj cuchí' so' ve' tucua, ne cuta' so' ra'á so' raá no', ne nahuun sa' no', ne se cavi' no', qui'yáa so' ma' —taj síi cu'naj Jairo rihaan Jesucristó a.

²⁴Gaa ne ca'anj Jesucristó ga so', ne canoco' uxrá yuvii xcó roj so', ne ndaa raan ma'an chrej vaj yuvii ga nij so' a.

²⁵Dan me se sca'núj nij so' vaj lo' chana ran' ndo'o, ne quisij chuvij ya yo' xra' ton man no' a. ²⁶Ne aj quiran' ndo'o no' sayuun, qui'yaj que'ee nij doctor, ne aj cutun' no' cunudanj sa'anj vaa rihaan no', tzaj ne taj se qui'yá' a doj nahuun sa' no' qui'yaj nij doctor yo' a ma'. Tananj doj a ran' no' nanj adonj.

²⁷Gaa ne aj cuchí' nana rihaan no' che'é nu' se vaa qui'yaj Jesucristó che'é nij yuvii, ne che'é dan ca'na' no' sca'núj nij yuvii rej xco Jesucristó, gaa ne canó ra'a no' doj tu'va sagan' so' a. ²⁸O se guun rá no' se vaa:

“Sese cano ra'aj sagan' Jesucristó, ne nahuun sa' 'unj nanj adonj”, guun rá no' a. ²⁹Dan me se síj canó ra'a no' sagan' Jesucristó, gaa ne nu' canicun' ton man no' cuaj a. Ne quene'en no' se vaa nahuun sa' no', qui'yaj Jesucristó a. ³⁰Dan me se nu' canó ra'a no' sagan' Jesucristó, ne nu' xcaj Jesucristó cuenta se vaa nahuun yuvii qui'yaj so' a. Che'é dan canicaj so', ne xná'anj so', cataj so':

—Me síi canó ra'a sagan' 'unj ga —taj so' a.

³¹Gaa ne cataj nij sí tucu'yón se-nānā Jesucristó se vaa:

—Ne'én so' se vaa raan ndo'o vaj nij yuvií ga so', ne me che'é xná'anj so' me sí canó ra'a sagan' so' ga —taj nij so', xná'anj nij so' man Jesucristó a.

³²Gaa ne canicaj Jesucristó, ne quene'en so' man chana canó ra'a tu'va sagan' so' a. ³³Ne dan me se cuchu'vi' ndo'o no' ne ndaa ri'íj man no', ne aj ne'en no' se vaa nahuun sa' no' a. Gaa ne ca'anj no', ne canicun' ruj no' rihaan Jesucristó, ne cataj ya no' rihaan Jesucristó nu' se vaa qui'yaj no' a.

³⁴Gaa ne cataj Jesucristó rihaan no' a:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á. Gaa nucuáá so', ne aj x'néj nu' chi'ij yo' xráá so' nanj ei —taj Jesucristó rihaan chana yo' a.

³⁵Ataa navij ca'mii Jesucristó, ne ca'na' 'o sí cavii tucua sí cu'naj Jairo, ne cataj so' rihaan Jairo a:

—Aj cavi' ta'níí so', ne taj che'é caraá chrúú so' rihaan maestró a ma' —taj sí 'na' cataj xna'anj rihaan Jairo a.

³⁶Dan me se cuno Jesucristó nana ca'mii sí ca'na', gaa ne cataj so' rihaan sí cu'naj Jairo a:

—Se cuchu'ví' so' ma'. Maan se cuchuman ya rá so' ni'yaj so' manj á —taj Jesucristó rihaan so' a.

³⁷Dan me se ne ca'vej rá Jesucristó canoco' a doj nij yuvií man so', ne maan Pedró do', Jacobo do', Juan tinúú Jacobo do', ca'vej so' canoco' man so' a. ³⁸Gaa ne cuchi' so' rihaan ve' tucua Jairo, ne

quene'en Jesucristó se vaa ta'vee uxrá nij yuvií man rá ve' a. ³⁹Gaa ne catúj Jesucristó rá ve', ne cataj so' rihaan nij yuvií a:

—Me che'é ta'vee ndo'o nij soj ga. Ne cavi' chala cunii nihánj ma'. Maan se otoj uun no' nanj á —taj Jesucristó rihaan nij so' a.

⁴⁰Gaa ne ca'nga' nacoó nij yuvií ni'yaj nij yuvií man Jesucristó a. Tzaj ne quirii Jesucristó man cunudanj nij yuvií xe', gaa ne nicaj so' man rej chala cunii do', man nii chala cunii do', man va'nuj nij sí ca'na' ga so' do', ne catúj so' rá cuartó naj chala cunii yo' a.

⁴¹Gaa ne quita'aa Jesucristó ra'a chala cunii, ne cataj so' rihaan chala cunii yo' a:

—Talita, cumi —taj so' rihaan no' xná'anj a'mii ma'an so' a. Ne se-nānā so' taj: “Naxagaa so', chala cunii”, taj nana ca'mii Jesucristó rihaan chala cunii yo' a.

⁴²Nu' ca'mii Jesucristó nana dan, ne nu' naxagaa chala cunii yo', chéé no' cuaj a. Nahuun i'na' no' a.

Ne chala cunii vaj chuvij yo' me no' a.

Ne nij sí quene'en, tzaj ne ca'anj ndo'o rá nij so' a. ⁴³Gaa ne ca'ne' uxrá Jesucristó suun rihaan nij so' a:

—A 'ó yuvií se cataj xna'anj nij soj rihaan daj qui'yáj che'é chala cunii ma' —taj Jesucristó rihaan nij so', ne cataj so' se vaa rque nii doj se chá chā no' a.

Nana nihánj taj xna'anj se vaa ne ca'vej rá nij sí man chiháan Jesucristó chuman' cu'naj Nazaret cuno' nij so' nana ca'mii Jesucristó a

6 Gaa ne curihanj Jesucristó ve' yo', gaa ne namán so'

rej chiháán so', ne canoco' nij sí tucu'yón se-nanā so' man so' a. ²Ne güii naránj rá nij yuvií israelitá me se ca'anj so' ve' tucu'yón nij sí man chiháán so' se-tucuanj Moisés, ne guun che'e so' tucu'yón so' man nij sí man rá ve' yo' a. Ne ca'anj ndo'o rá nij yuvií gaa cuno nij yuvií se-nanā Jesucristó, gaa ne cataj nij yuvií:

—Me rej nari' sí nihánj nanā cuu avii raá sí nihánj ga. Me rej nari' so' suun sa' 'yaj so' ga. ³Nuveé sij acój chruun sí ne chiháán ní me so' na'. Ne ta'níí chana cu'naj Mariá me so' á. Ne tinúú sí cu'naj Jacobo do', sí cu'naj José do', sí cu'naj Judas do', sí cu'naj Simón do', me so' á. Ne nij ra'vij so' me chana ne chiháán ní' á —taj nij sí man chiháán Jesucristó rihaan tuvi' nij so', ne guun nacoo rá nij so' ni'yaj nij so' man Jesucristó a.

⁴Gaa ne cataj Jesucristó rihaan nij so' a:

—Me rej ma'an vaj 'o sí nata' se-nanā Diose, ne aráj cochroj nij yuvií rihaan so', tzaj ne nij yuvií man chiháán so' do', nij tuvi' so' do', nij sí yanj tucua' so' do', na'vej rá caraá cochroj rihaan so' ma' —taj Jesucristó rihaan nij sí man chiháán so' chuman' cu'naj Nazaret yo' a.

⁵Ne ne guun nucuaj Jesucristó qui'yaj so' a doj suun sa' nocoo chiháán so', maan se doj sí ran' me se cuta' so' ra'a so' raá ne nahuun sa' nij so', qui'yaj so' a.

⁶Ne caráya'anj ndo'o so' se vaa ne cuchuman rá nij sí man chiháán so' ni'yaj nij so' man so' a. Ne cavii so' ca'anj so' nij chuman' naj nichrun',

tucu'yón so' se-nanā so' man nij yuvií a.

Nanā nihánj taj xna'anj se vaa ca'neé Jesucristó man chuvij nij sí tucu'yón se-nanā so' ca'anj ca'mii natáj nij so' a

⁷Gaa ne canacúún Jesucristó man chuvij nij sí tucu'yón se-nanā so', ne cuchí' nij so' rihaan so', gaa ne guun che'e so' ca'neé so' man vij vij nij so', ne go' so' se nucuaj man nij so', gaa ne ca'vee qui'yaj canaán nij so' rihaan nij nanā chree a.

⁸Ne ca'ne' so' suun rihaan nij so' se vaa a doj rasuun se nicaj nij so' gaa vaj nij so' chrej; maan orún' chruun garroté me se ca'vee nicaj nij so', tzaj ne rachrúún do', nanj do', se nicaj nij so', ne se ca'vee cunuú sa'anj rque se-caxran' nij so', ⁹tzaj ne qui'nij tacóo nij so' canj, ne orún' yatzíj quitaj xráá nij so', taj Jesucristó rihaan nij so', ¹⁰ne:

—Me ma'an ve' caran' soj, ne yo'o cayáán soj ve' yo' ndaa se curihanj soj chuman' yo' á. ¹¹Ne me rej ma'an se ca'mii sa' nij yuvií ga soj do', se ca'vej rá nij yuvií cuno nij yuvií nanā a'mii soj do', ne asa' cavii soj rej yo', ne nacunan' soj tacóo soj tucuayuu soj yo'óo tachruu canó tacóo soj, ne ndaa dan, gaa ne xcaj nij sí man rej yo' cuentá se vaa tumé ndo'o nij so' cacun' se vaa ne ca'vej rá nij so' cuno nij so' se-nanā soj adonj. Cataj xna'anj yá yá 'unj rihaan soj cuano se vaa doj a quiran' nij so' cacun' rihaan nij yuvií man chuman' Sodoma ga chuman' Gomorra nanj adonj —taj Jesucristó rihaan chuvij nij so' a.

¹²Gaa ne ca'anj nij so', gaa ne ca'mii natáj nij so' rihaan nij yuvií

se vaa canicaj rá nij yuvií canoco' nij yuvií chrej sa', ¹³ne quirii ndo'o nij so' man nij nana chree nimán nij yuvií, ne cutáj ndo'o nij so' casté raá nij sí ran', ne nahuun sa' nij sí ran', qui'yaj nij so' a.

Nana nihánj taj xna'anj se vaa cavi' Juan sí cuta' ne man yuvií, qui'yaj sí nicaj suun cu'naj Herodes a

¹⁴Dan me se cuchí' nana rihaan sí nicaj suun rey cu'naj Herodes che'é nu' se vaa qui'yaj nij sí tucu'yón se-nana Jesucristó, ne nu' cachra' cha'nuu ndo'o se-nana Jesucristó a. Gaa ne cataj sí cu'naj Herodes se vaa:

—Cunuu i'na' ya uún sí cu'naj Juan, raj á. Ése sí cu'naj Juan me sí guun nucuaj qui'yaj nij suun sa' nocoo yo' nanj adonj —taj sí cu'naj Herodes a.

¹⁵Ne yo'ó ta'aj nij yuvií me se cataj se vaa sí cu'naj Elías sí nata' se-nana Diose gaa naá me Jesucristó, ne yo'ó ta'aj nij yuvií uún cataj se vaa yo'ó nij sí nata' se-nana Diose gaa naá me Jesucristó a. ¹⁶Dan me se cuno sí cu'naj Herodes daj guun rá nij yuvií, gaa ne cataj so':

—Sí cu'naj Juan sí ca'ne' nij tanuu cúu yave qui'yáj ro', aj cunuu i'na' ya so' chuguanj —taj Herodes a.

¹⁷Q se ma'an sí cu'naj Herodes me sí ca'neé man nij tanuu quita'aa nij tanuu man sí cu'naj Juan asij rque doj, ne numíj nij tanuu man sí cu'naj Juan, ne caxríj sí cu'naj Herodes taga' man sí cu'naj Juan, che'é chana cu'naj Herodías nica tinúu Herodes sí cu'naj Felipe a.

'O se xcaj sí cu'naj Herodes man chana Herodías yo', ¹⁸gaa ne cataj sí cu'naj Juan rihaan sí cu'naj Herodes se vaa:

—Ne nó xcúún so' xcaj so' man choco' so' ma' —taj Juan rihaan Herodes a.

¹⁹Che'é dan nachri' chana cu'naj Herodías ni'yaj no' man Juan, ne guun ndo'o rá no' cavi' Juan, tzaj ne ne ca'vee ma'. ²⁰Q se chuchuvi' sí cu'naj Herodes ni'yaj so' man Juan, che'é se quene'en Herodes se vaa sí nica rá sí sa' inanj nimán rihaan Diose me Juan, ne che'é dan caráan Herodes rihaan chi'ií che'é Juan a. Dan me se gaa cuno Herodes se-nana Juan, ne quinano ndo'o rá so', tzaj ne guun niha' rá so' ca'mij Juan rihaan so' a.

²¹Dan me se quisij 'o güii ca'vee qui'yaj canaan chana cu'naj Herodías yo', ne dan me se se-cha'anj sí cu'naj Herodes me yo', ne ca'ne' so' suun se vaa canuú se-cha'anj so', ne canacúún so' ca'na' nij sí 'yaj suun ga ma'an so' do', nij tanuu uun chij doj do', nij sí uun chij rihaan estadó Galilea do', ca'na' cha ni'yánj nij so' ga so' a.

²²Gaa ne catúj ta'ní chana cu'naj Herodías rej anuú cha'anj, ne ra'anj no', ne guun niha' uxrá rá Herodes ga nij sí ca'na' cha'anj yo' ni'yaj taran' nij so' man ta'ní Herodías a. Gaa ne cataj Herodes rihaan chana yaan yo':

—Cuanó nihánj me se a me ma'an rasuun me rá so' cachinj so' rihanj, ne rque 'unj mán so' ei —taj so', ²³gaa ne cataj uún so'— Cuta' yá 'unj raá Diose se vaa a me ma'an rasuun cachinj so' rihanj, ne rque

'un̄j mán so' á. Ndaa yanej yo'óo uun chij 'un̄j rihaan ro', rque 'un̄j mán so' nan̄j adon̄j —taj Herodes rihaan chana yaan yo' a.

²⁴Gaa ne curihan̄j chana yaan, ne xná'an̄j no' man nii no' chana cu'naj Herodías, ne cataj no':

—Me se cachin̄j 'un̄j, ga nahiin —taj no' rihaan nii no' a.

Gaa ne chana cu'naj Herodías cataj:

—Cachin̄j so' cúu yave síi cu'naj Juan síi cuta' ne man yuvii á —taj no' rihaan ta'níi no' chana yaan yo' a.

²⁵Gaa ne nu' catúj ra'yan̄j chana yaan yo' rej man síi nicaj suun rey cu'naj Herodes, ne cachíin ni'yaj no' rihaan so', cataj no':

—Me rá 'un̄j se vaa maan orá cuano ro', ca'nej so' cúu yave síi cu'naj Juan síi cuta' ne man yuvii rque aga' rco'oo, ne rque so' rihan̄j cuaj á —taj no' rihaan Herodes a.

²⁶Gaa ne nanó ndo'o rá síi nicaj suun rey cu'naj Herodes yo' che'é se aj cuta' so' raá Dios̄e ne aj cunotarān' nij síi yan̄j rihaan mesá ga so', ne che'é dan ne ca'vej rá so' tari' so' se-nana so' se vaa se qui'yaj so' ndaa vaa taj chana yaan yo' rihaan so' a. ²⁷Gaa ne nu' ca'néé so' man síi ticavi' man síi cu'naj Juan, ne ca'ne' so' suun se vaa nicaj so' cúu yave Juan ca'na' so' a. ²⁸Gaa ne ca'an̄j síi ticavi' man Juan taga', ne ca'ne' so' cúu yave Juan, ne ca'néé so' cúu yave Juan rque aga' rco'oo, nicaj so', ca'na' so', ne rqué so' man chana yaan, ne nago' chana yaan yo' man nii no' a.

²⁹Gaa ne gaa cuchi' nana rihaan nij síi tucu'yón se-nana Juan se vaa

cavi' Juan, ne ca'na' nij so', ne nicaj nij so' cúu man Juan, cachin' nij so' rque yu'uj yuvej a.

Nana nihánj taj xna'an̄j se vaa ca'vee quirii Jesucristó se chá 'un' m̄j snó'o a

³⁰Dan me se nij síi ca'néé Jesucristó ca'an̄j nata' rihaan yuvii che'é so' ro', cunuu chre' nij so' ga Jesucristó, ne nata' nij so' rihaan Jesucristó che'é cunudan̄j nij suun sa' nocoo qui'yaj nij so' do', che'é cunudan̄j nij nana tucu'yón nij so' man nij yuvii do' a. ³¹Gaa ne cataj Jesucristó rihaan nij so' a:

—Ca'an̄j ní' doj rej tacaan rej taj vaj yuvii ne, gaa ne ca'vee naraan rá nij soj doj á —taj Jesucristó rihaan nij so' a.

'O se ca'na' ndo'o yuvii do', ca'an̄j ndo'o yuvii do', ne ne vaa ya'núj rihaan nij so' chá nij so' a doj chraa a.

³²Gaa ne cavii nij so' rque rihoo chéé rihaan na, ne ca'an̄j orún' nij so' rej tacaan a. ³³Tzaj ne quene'en ndo'o nij yuvii se vaa ca'an̄j nij so', ne xcaj yuvii cuentá se vaa ca'an̄j nij so', qui'yaj nij síi quene'en, gaa ne chéé tacoj nij yuvii man cunudan̄j nij chuman' naj rej yo', ne cunan̄j nij yuvii, cunuu chre' nij yuvii rej ca'an̄j nij tuvi' Jesucristó, ne asino nij yuvii cuchi', ne na'vij nij yuvii ca'na' Jesucristó a. ³⁴Ne nanij Jesucristó rá rihoo, ne quene'en so' se vaa aj mán uxrá yuvii, ne cunuu 'ee rá so' man nij yuvii a. 'O se ase vaa matzin̄j nuvi' síi tumé man vaa nij yuvii, ni'yaj Jesucristó, gaa ne guun che'e so' tucu'yón ndo'o so' se-nana so' man nij yuvii a.

³⁵Dan me se cachén ndo'o orá, gaa ne ca'na' nij sí tucu'yón se-nana Jesucristó rihaan Jesucristó, gaa ne cataj nij so' se vaa:

—Rco' quij uun me nihánj, ne taj se chá chá nij yuvii nihánj, ne cachén ndo'o orá nanj á. ³⁶Qui'yáá so' se ndo'o, ne na'nej so' chrej man nij yuvii, ca'anj nij yuvii chuman' naj nichrun' do', nij rancho naj nichrun' do', quiraan nij yuvii se chá chá nij yuvii nanj á —taj nij sí tucu'yón se-nana Jesucristó rihaan Jesucristó a.

³⁷Gaa ne cataj Jesucristó rihaan nij so' a:

—Go' ma'an soj se chá chá nij yuvii á —taj so' a.

Gaa ne cataj nij so' rihaan Jesucristó a:

—Ca'anj núj go' núj sa'anj vaa tu'vee yuvii 'yaj suun tunj yavii ne quiraan núj rachrúun, ne rque núj chá nij yuvii, rá so' na' —taj nij so' rihaan Jesucristó a.

³⁸Gaa ne cataj Jesucristó rihaan nij so' a:

—Me daj rachrúun vaa rihaan soj ga. Cavii soj, ne xcaj soj cuentá á —taj so' a.

Gaa ne ca'anj nij so' qui'yaj contá nij so' rachrúun vaa rihaan nij so', gaa ne canicaj nij so', ne cataj nij so':

—Vaa 'un' guee rachrúun ne vij guee xcuaj rihaan núj nanj á —taj nij so' rihaan Jesucristó a.

³⁹Gaa ne ca'ne' Jesucristó suun rihaan nij yuvii se vaa ca'anj cayáán cunudanj nij yuvii rihaan coj chrin', ne ca'anj cumán x'ne' nij yuvii rihaan coj chrin', taj Jesucristó rihaan nij yuvii a. ⁴⁰Gaa

ne naqui'yaj x'ne' nij yuvii man nij yuvii, ne cayáán nij yuvii rihaan coj chrin', ne dan me se cientó yuvii do', vij chihaa chi' yuvii do', me 'o' lo' x'ne' nij yuvii a.

⁴¹Gaa ne quita'aa Jesucristó 'un' nij rachrúun ne vij roj xcuaj, gaa ne ni'yaj so' rej xta', ne nago' so' graciá rihaan Diose, gaa ne cuxra' ta'aj so' man rachrúun yo', ne caxrj so' ston nij sí tucu'yón se-nana so', che'é rej caxrii nij so' ston nij yuvii a. Gaa ne cuxra' ta'aj so' nee xcuaj chá cunudanj nij yuvii a. ⁴²Gaa ne chá taran' nij yuvii, ne caraa rque cunudanj nij so', ⁴³ne ndaa quináj ndo'o se chá, qui'yaj nij yuvii a. Gaa ne naqui'yaj chre' nii se vaa quináj tu'va yuvii, ne caraa yo'ó chujvij ya scaa, ne ta'aj rachrúun do', ta'aj nee xcuaj do', me se chá naqui'yaj chre' nii a. ⁴⁴Ne nij snó'o rque Jesucristó chraa me se 'un' mij snó'o me nij so' a.

Nana nihánj taj xna'anj se vaa cachéé Jesucristó rihaan na a

⁴⁵Gaa ne ra'yanj ca'ne' Jesucristó suun rihaan nij sí tucu'yón se-nana so' se vaa cavii nij so' rihoo chéé rihaan na ca'anj nij so' rej xco na lacuaná yo' ndaa chuman' cu'naj Betsaida, quitaj yaan nij so' rihaan Jesucristó, ne dan me se ma'an Jesucristó na'nej chrej man nij yuvii, taj Jesucristó rihaan nij sí tucu'yón se-nana so' a. ⁴⁶Dan me se ca'anj nij so', ne cataj Jesucristó rihaan nij yuvii se vaa ca'vee ca'anj nij yuvii a. Gaa ne cavii so' raá quij, ne cachín ni'yaj so' rihaan Diose a.

⁴⁷Dan me se daj doj cata' güii raá quij, ne vaj rihoo tanuu rihaan

na lacuaná, ne orún' Jesucristó me sí nicun' rihaan yo'ó a. ⁴⁸Ne quene'en so' man nij sí tucuyón se-nana so' se vaa güéj ndo'o rihoo yo' rihaan na qui'yaj nana, che'é se go' nana rej rihaan rihoo yo' a. Dan me se yan' si'nu' ca'anj Jesucristó rej vaj nij so', chéé tacoj uun so' rihaan na yo', vaj so' nanj adonj. Ne guun rá so' cachén so' rej x'nuj nij so' a. ⁴⁹Ne quene'en nij sí tucuyón se-nana so' man so' se vaa chéé uun so' rihaan na, ne guun rá nij so' se vaa ta'naj me so', ne che'é dan caguáj ndo'o nij so' a. ⁵⁰O se quene'en cunudanj nij so' man so', ne cuchu'vi' ndo'o nimán nij so' a. Veé dan, ne nu' cataj Jesucristó rihaan nij so' a:

—Naqui'yaj nucuaj soj nimán soj ei. 'Unj 'na' ei. Se cuchu'vi' soj ma' —taj so' rihaan nij so' a.

⁵¹Gaa ne catúj so' rque rihoo rej nuu nij sí tucuyón se-nana so', gaa ne canicun' nana yo', ne ca'anj ndo'o rá nij so' a. ⁵²O se ne xcaj sa' nij so' cuentá che'é se nucuaj nicaj Jesucristó gaa cuxra' ta'aj Jesucristó rachrúun chá nij yuvií a. Maan se nichraj ndo'o nimán nij so' a.

Nana nihánj taj xna'anj se vaa nari' nucuaj nij sí ran' man rej cu'naj Genesaret, qui'yaj Jesucristó a

⁵³Gaa ne cuchi' nij so' tu'va na lacuaná rej cu'naj Genesaret, ne numíj nij so' rihoo tu'va na lacuaná a. ⁵⁴Gaa ne nanij nij so' rá rihoo, ne nu' cunuu yaan nij sí man rej yo' man Jesucristó, ⁵⁵ne yoo ca'anj cunudanj nij sí yanj nu' anicaj, ne guun che'e nij so' cuchruj

nij so' tuvi' nij so' sí ran' rihaan yuvéé, ne quitáá chihá nij so' nij sí ran' yo', vaj nij so' me rej ma'an vaj Jesucristó a. ⁵⁶Ne me ma'an chuman' ra'a do', chuman' nocoo do', rancho do', catúj Jesucristó me se cuchruj nij yuvií man nij sí ran' rihaan yu'vee, ne cachín ni'yaj uxrá nij yuvií rihaan Jesucristó se vaa ca'vej rá Jesucristó cano ra'a nij so' doj tu'va sagan' so' a. Ne nu' nij sí cano ra'a doj man so' ro', nahuun sa' cunudanj nij so' cuaj nanj adonj.

Nana nihánj taj xna'anj me che'é ne na'ya' nij sí tucuyón se-nana Jesucristó gaa chá nij so' chraa a

7 Gaa ne quinichrun' sí fariseo do', quinichrun' sí naqui'yaj cuu se-tucuanj Moisés do', rihaan Jesucristó, ne sí cavii chuman' Jerusalén me nij so' a. ²Ne quene'en nij so' se vaa gaa chá nij sí tucuyón se-nana Jesucristó chraa, ne ne na'ya' nij so', ne che'é dan ne naruvií ra'a nij sí tucuyón se-nana Jesucristó ni'yaj Diosé, rá nij sí fariseo do', nij sí naqui'yaj cuu se-tucuanj Moisés do' a. ³O se xa' nij sí fariseo ga cunudanj yo'ó nij sí israelitá, tzaj ne a doj ne chá nij so' chraa sese ataa na'ya' nij so' ma'. Danj 'yaj nij so', che'é se nocó' nij so' tucuaán cuchruj nij sí chij cayáan gaa naá a. ⁴Ne gaa 'na' nij so' yu'vee, ne ane nij so', ne sese ataa cané nij so', ne ne chá nij so' chraa a ma'. Ne vaa uxrá doj tucuaán nicaj nij so', ne ndaa vaa tucuaán che'é tazá do', che'é xruj do', che'é aga' do', daj qui'yaj nij so' gaa na'nu' nij so' man nij rasuun vaa nacaj do' a.

⁵Gaa ne xná'anj nij síi fariseo ga nij síi naqui'yaj cuu se-tucuanj Moisés man Jesucristó, ne cataj nij so', ne:

—Nij síi tucu'yón se-nana so' me se me che'é ne noco' nij so' tucuáan cuchruij nij síi chij cayáan gaa naá, ne nihánj me se chá nij so' chraa, ne ne naruvii ra'a nij so' ni'yaj Diose a ma' —taj nij so' rihaan Jesucristó a.

⁶Gaa ne cataj Jesucristó rihaan nij so' a:

—Cunaj uxrá vaa nana nata' síi cu'naj Isaías gaa naá gaa ca'mii so' che'é nij soj sij nucui' rá, ne dan me se ca'mii so' se-nana Diose, ne cataj so' se vaa: “Yuvii nihánj me se gan' uxrá nicun' nimán nij so' ga 'unj nanj adonj. ⁷Na'víj rma'an nij so' rihanj, ne dan me se nanj se-nana nij síi man rihaan chumii tucu'yón nij so' rihaan tuvi' nij so', ne taj nij so' se vaa se-nanaj me se-nana nij yuvii yo' a”, taj se-nana Diose nata' síi cu'naj Isaías gaa naá a. ⁸Q se aj tanáj xco soj nana cataj xna'anj Diose rihaan ní', ne nanj tucuáan cuchruij yuvii un noco' soj nanj ei —taj Jesucristó, ⁹ne cataj uún so' se vaa— Cunaj uxrá vaa 'yaj soj, ne uta' yanij soj nana cataj xna'anj Diose rihaan ní', che'é rej ca'vee canoco' soj se-tucuanj ma'an soj asan.

¹⁰Q se ca'ne' Moisés suun se vaa: “Caraa cochróo so' rihaan rée so' do', rihaan níi so' do' á”. Tzaj ne: “Síi a'mii chree rihaan rej do', rihaan nii do', me se vaj so' ne nu' che'e cavi' so' á”. Danj vaa cataj xna'anj Moisés rihaan ní' a. ¹¹Tzaj ne taj soj se vaa sese cataj yo'o so' rihaan rej so' do', rihaan nii so' do', se

vaa aj rqué so' nu' si'yaj so' rihaan Diose ne che'é dan se ca'vee racuíj so' man rej so' do', man nii so' do', taj soj a. ¹²Ne ne ca'vej soj racuíj so' man rej so' do', man nii so' do' a. ¹³Dan me se danj inanj a'mii soj gaa tucu'yón soj se-nana nij síi man gaa naá, ne axríj yuve soj man se-nana Diose nanj adonj —taj Jesucristó rihaan nij síi fariseo do', rihaan nij síi naqui'yaj cuu se-tucuanj Moisés rihaan yuvii do' a.

¹⁴Gaa ne canacúun uún Jesucristó man nij yuvii ca'na' nij yuvii rihaan so', gaa ne cataj so' rihaan nij yuvii a:

—Cunq taran' soj nana nihánj, ne xcaj soj cuentá nedi'. ¹⁵A doj rasuun atúj tu'va yuvii se ca'vee qui'yaj chi'ii man yuvii ma'. Se avii tu'va yuvii ro', 'yaj chi'ii man yuvii adonj. ¹⁶Sese taj yu'uj xrée soj, ne cunq soj nana nihánj ei —taj Jesucristó rihaan nij yuvii a.

¹⁷Dan me se corá ca'anj yanij Jesucristó ga nij síi tucu'yón se-nana so' rihaan nij yuvii, ne catúj nij so' rá ve', gaa ne xná'anj nij síi tucu'yón se-nana Jesucristó man so' me taj nana ca'mii so' che'é se atúj tu'va yuvii gaa. ¹⁸Gaa ne cataj Jesucristó rihaan nij so' a:

—Vaa soj vaa, ne ne xcaj ma'an soj do' cuentá a na'. Ne ne'en soj se vaa nu' se atúj tu'va yuvii ro', se ca'vee qui'yaj chi'ii yo' man yuvii a. ¹⁹Q se ne atúj yo' ndaa nimán yuvii ma'. Tananj achén yo' rque yuvii, ne urihanj yo' gaa re'é yuvii nanj á —taj Jesucristó, ne nana yo' taj se vaa ca'vee cha yuvii me ma'an rasuun ne nuveé cacun' me yo' rihaan Diose a. ²⁰Ne cataj uún

so' a— Tzaj ne se urihanj tu'va yuvii ro', yo' me nana avii nimán yuvii, ne nana yo' me 'yaj chi'ii ndo'o man yuvii adonj. ²¹ O se nihánj me se chi'ii avii nimán yuvii a. Se chi'ii do', che'é yan qui'yaj ituu si'yaj tuvi' do', yan cotoj ga nica tuvi' do', yan ticavi' man tuvi' do', ²² yan guun rá nicaj si'yaj tuvi' do', yan tiha' yu'unj man tuvi' do', yan ni'yaj ndo'o man yo'ó chana do', yan guun xcoj ruvaa rá ni'yaj tuvi' do', che'é yan nachri' ni'yaj man tuvi' do', yan ca'mii xta' do', yan qui'yaj rma'an náa guun se nij do', me nu' se avii nimán yuvii, ²³ ne nu' yo' me se avii nimán yuvii ne 'yaj chi'ii man yuvii nanj adonj —taj Jesucristó rihaan nij síi tucuyón se-nana so' a.

Nana nihánj taj xna'anj se vaa cuchumán rá 'o chana sirofenicia se vaa racuíj Jesucristó man no' a

²⁴ Gaa ne canicun' Jesucristó, ne curihanj so' rej yo', ne ca'anj so' rej naj chuman' cu'naj Tiro a. Ne catúj so' rá 'o ve', ne ne ca'vej rá so' quene'en nij yuvii me rej vaj so' a. Tzaj ne ne ca'vee qui'nij yuve so' ma'. ²⁵ Tananj ra'yanj cuch'i' nana rihaan 'o chana se vaa yanj so', ne ta'níi chana ro', me níi nuu nana chree nimán, ne ca'na' chana, ne canicun' ruj chana yo' rihaan Jesucristó a. ²⁶ Dan me se chana sirofenicia a'mii xna'ánj griego me chana yo', ne cachín ni'yaj no' rihaan Jesucristó se vaa qui'ii Jesucristó nana chree nimán ta'níi no' a. ²⁷ Gaa ne cataj Jesucristó rihaan no' a:

—Dan me se canícun' so' doj, ne cha asino nij xnii tucua, ne ne'én

so' se vaa se ca'vee cata'aa ní' co'oo man rihaan nij xnii ne go' ní' cha nij chuvee ma'. Dan me se ndaa síj chá nij xnii tucua, gaa ne sese náj se chá tu'va nij xnii yo', gaa ne ca'vee go' cha chuvee nanj adonj. Che'é dan ase vaa ne nó xcúun yuvii ca'nee yuvii rachrúun tu'va ta'níi yuvii go' yuvii rachrúun yo' cha chuvee ro', danj vaa ne nó xcúnj racuíj man soj sij yanj a man adonj. Maan inanj ma'an nij yuvii israelitá me no xcúun 'unj racuíj 'unj nanj adonj —taj Jesucristó rihaan chana yo' a.

Gaa ne cataj no':

²⁸—Veé dan vaa guée, Señor.

Tzaj ne nij chuvee nicun' rque chruun mesá ro', chá nij xo' tachruu ayuu tu'va nij xnii nanj á. Ne ase vaa chuvee chá tachruu vaa 'unj rihaan so' nanj adonj. Che'é dan me ndo'o raj racuíj so' doj manj, raj nanj adonj —taj chana yo' rihaan Jesucristó a.

²⁹ Gaa ne cataj Jesucristó:

—Che'é nana ca'mii so' nihánj ro', ca'vee cavii so' ca'anj so', ne aj curihanj nana chree nimán ta'níi so' nanj ei —taj so' rihaan no' a.

³⁰ Gaa ne ca'anj chana, catúj chana rá ve' tucua chana, ne quene'en chana se vaa dínj naj ta'níi chana rihaan yuvéé, ne aj curihanj nana chree nimán ta'níi chana adonj.

Nana nihánj taj xna'anj che'é síi naxra' tu'va do', nachuguun xrée do', qui'yaj Jesucristó a

³¹ Gaa ne curihanj uún Jesucristó rej naj chuman' Tiro, ne cachén so' sca'núj chuman' cu'naj Sidón, ca'anj uún so' tu'va na lacuaná cu'naj

Galilea, ne cachén so' sca'núj rej cu'naj Chi' Chuman' a. ³²Ne nicaj nij yuvií man 'o sí so' o ya'míi ca'na' nij yuvií rihaan Jesucristó, ne cachíin ni'yaj uxrá nij yuvií rihaan Jesucristó se vaa cuta' ra'a Jesucristó xráá sí so' o ya'míi yo' a. ³³Gaa ne nicaj Jesucristó man sí so' o ya'míi ca'anj yaníj so' rihaan yo'ó nij yuvií, gaa ne tucua'anj Jesucristó ra'a Jesucristó yu'uj xréé sí so' o ya'míi, gaa ne quirii talúj Jesucristó ra'a Jesucristó, ne canó ra'a Jesucristó daa sí so' o ya'míi yo' a. ³⁴Gaa ne ni'yaj Jesucristó rej xta', gaa ne caráchej Jesucristó, ne cataj Jesucristó:

—Efata —taj Jesucristó, ne nana “Efata” taj: “Nachuguun xréé so' á”, me nana ca'míi Jesucristó rihaan sí so' o ya'míi yo' a.

³⁵Gaa ne nachuguun xréé so', ne nahuun sa' daa so', gaa ne ca'míi sa' so' a. ³⁶Gaa ne ca'ne' Jesucristó suun rihaan nij sí quene'en daj qui'yaj Jesucristó che'é sí so' o ya'míi se vaa se guun cataj xna'anj nij so' rihaan a 'o yuvií a. Dan me se doj a na'vej rá Jesucristó cataj xna'anj nij so' rihaan tuvi' nij so', tzaj ne doj a nata' nij so' rihaan tuvi' nij so' a. ³⁷Gaa ne ca'anj uxrá rá nij yuvií xcaj cuentá daj qui'yaj Jesucristó, ne cataj nij yuvií se vaa sa' uxrá vaa nu' se vaa qui'yaj Jesucristó, ne ndaa nachuguun xréé nij sí so' o do', ndaa a'míi sa' nij sí ya'míi do', 'yaj Jesucristó, taj nij yuvií yo' a.

Nana nihánj taj xna'anj se vaa go' Jesucristó se chá rihaan ca'anj míj snó'o a

8

Ne güii dan me se vaj uún que'ee yuvií ga Jesucristó, ne

nuvi' uún se chá rihaan nij yuvií, gaa ne canacúin Jesucristó man nij sí tucu'yón se-nana so' se vaa ca'na' nij so' rihaan so', gaa ne cataj so' rihaan nij so' a:

²—Ee rá 'unj man nij yuvií nihánj, ne nihánj me se síj va'nuj ya güii 'o vaj nij yuvií ga 'unj, ne taj vaj se chá rihaan nij yuvií cuano a ma'. ³Ne sese na'nej 'unj chrej man nij yuvií cuano quinan' nij so' gaa na'aan rque nij so', ne ninaj nij so' rá chrej, ne dan me se ta'aj nij so' me sí yanj rej gan' ndo'o nanj adonj —taj Jesucristó rihaan nij sí tucu'yón se-nana so' a.

⁴Gaa ne cataj nij so' rihaan Jesucristó a:

—Tzaj ne rej tacaan uun me nihánj, ne nuvi' rachrúin nihánj go' ní' cha nij yuvií a ma' —taj nij sí tucu'yón se-nana Jesucristó a.

⁵Gaa ne xná'anj Jesucristó man nij so', cataj so':

—Me daj rachrúin vaa rihaan soj ga —taj so', xná'anj so' man nij sí tucu'yón se-nana so' a.

—Chij rachrúin vaa rihaan núj nanj á —taj nij so' rihaan Jesucristó a.

⁶Gaa ne ca'ne' Jesucristó suun rihaan nij yuvií se vaa ca'anj cayáan nij yuvií rihaan yo'óo a. Gaa ne nicaj so' chij nij rachrúin, ne nago' so' graciá rihaan Diose, gaa ne cuxra' ta'aj so' rachrúin yo', ne caxríj so' ston nij sí tucu'yón se-nana so', ne tucua'chén nij so' rihaan nij yuvií, ne dan me se rqué nij so' rachrúin yo' rihaan nij yuvií a. ⁷Ne nicaj Jesucristó doj xcuaj le'ej uún, ne nago' so' graciá rihaan Diose che'é nij xcuaj le'ej,

ne cataj so' rihaan nij sí tucu'yón se-nana so' se vaa tucuachén nij so' nee xcuaj le'ej uún rihaan nij yuvií uún a. ⁸Gaa ne chá cunudanj nij yuvií, ne ndaa caraa rque nij so' a. Gaa ne naquiyaj chre' nii se vaa quináj tu'va nij yuvií, ne quisíj 'o cunu' chij ya scaa caraa qui'yaj se quináj tu'va nij yuvií yo' a.

⁹Dan me se cunudanj nij so' chá, ne quisíj ndaa ca'anj mÍj yuvií chá nanj adonj.

Gaa ne na'née Jesucristó chrej man nij yuvií, ¹⁰gaa ne nu' cavii Jesucristó ga nij sí tucu'yón se-nana so' rá rihoo chée rihaan na, ne ca'anj nij so' rej cu'naj Dalmanuta a.

Nana nihánj taj xna'anj se vaa cachín nij sí fariseo se vaa qui'yaj Jesucristó 'o suun sa' nocoo quene'en nij so' a

¹¹Dan me se curihanj doj nij sí fariseo, gaa ne guun che'e nij so' canó tuvi' nij so' ga Jesucristó, ne dan me se cachín ni'yaj nij so' rihaan Jesucristó se vaa raçuíj Diose man Jesucristó, ne qui'yaj Jesucristó 'o suun sa' nocoo quene'en nij so', gaa ne guun ya rá nij so' se vaa sí ca'née ya Diose me Jesucristó, rá nij so' a.

¹²Gaa ne nucaj ndo'o caráchej Jesucristó, ne cataj so' rihaan nij so' a:

—Ne me che'é me rá soj sij israelitá qui'yáj suun sa' nocoo quene'en soj ga. Dan me se daj chihaa mÍj se qui'yáj suun sa' nocoo che'é soj a ma' —taj Jesucristó rihaan nij sí fariseo yo' a.

¹³Gaa ne tanáj Jesucristó man nij so', gaa ne cavii uún so' rque rihoo

chéé rihaan na, ne ca'anj so' rej xco na lacuaná a.

Nana nihánj taj xna'anj se vaa ne ca'vej rá Jesucristó cunó nij sí tucu'yón se-nana so' man nana tucu'yón nij sí fariseo do', sí cu'naj Herodes do' a

¹⁴Dan me se quini'yón nij sí tucu'yón se-nana Jesucristó nicaj nij so' rachrúun chá nij so', ne vaa orún' rachrúun rá rihoo vaj ga nij so' a. ¹⁵Gaa ne ca'ne' Jesucristó suun rihaan nij so', cataj Jesucristó:

—Cutumé soj man soj se gaa nanj quiran' soj sayuun, qui'yaj se-levadura nij sí fariseo do', sí cu'naj Herodes do' á —taj Jesucristó no nij so' a.

¹⁶Ne nuchruj raá ndo'o nij sí tucu'yón se-nana Jesucristó che'é nana ca'mii so', ne:

—Che'é se taj rachrúun nicaj ní', ne che'é dan a'mii so' che'é levadura se 'yaj naraa nana rque rachrúun nanj adonj —taj nij so' a.

¹⁷Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. Me che'é ataa xcaj soj cuentá ga. 'O se vaa nichraj ndo'o nimán soj nanj adonj. ¹⁸'O se vaa rlij rihaan soj, tzaj ne ne ni'yaj soj a ma'. Vaa xrée soj, tzaj ne ne uno soj a ma'.

¹⁹Ne ne nuú rá soj gaa vaa daj 'o 'un' guee rachrúun cuxra' ta'aj 'unj tzaj ne quisíj chá cunu' 'un' mÍj snó'o, qui'yáj a. Ne me daj scaa se chá quináj tu'va yuvií naquiyaj chre' soj, rá soj ga —taj Jesucristó, xná'anj Jesucristó man nij so' a.

Gaa ne:

—Chuvij a —taj nij so' rihaan Jesucristó a.

²⁰Gaa ne cataj uún Jesucristó:

—Ne ne nuû rá soj gaa vaa daj 'ó chij guee rachruún cuxra' ta'aj 'unj tzaj ne quisíj chá cunú' ca'anj mij yuvii, qui'yáj a. Ne me daj scaa se chá quináj tu'va yuvii naquilyaj chre' soj, rá soj ga —xná'anj uún Jesucristó man nij so' a.

Gaa ne:

—Chij a —taj nij so' rihaan Jesucristó a.

²¹Gaa ne cataj Jesucristó rihaan nij so' a:

—Ne me che'é me ataa xcaj soj cuentá se vaa ca'vee rque 'unj nu' se vaa achiin man soj ne nuveé inanj che'é rej nano rá soj che'é rachruún me ca'mij rihaan soj che'é se-levadura nij síf fariseo do', síf cu'naj Herodes do' ma' —taj Jesucristó rihaan nij so' a.

Nana nihánj taj xna'anj se vaa naxra' rihaan 'o síf tuchrii, qui'yaj Jesucristó a

²²Gaa ne catúj Jesucristó ga nij síf tucu'yón se-nana so' rá chuman' cu'naj Betsaida a. Gaa ne nicaj yuvii 'o síf tuchrii ca'na' nij yuvii rihaan Jesucristó, ne cachíin ni'yaj nij yuvii rihaan Jesucristó se vaa cuta' Jesucristó ra'a Jesucristó raá síf tuchrii che'é rej naxra' rihaan síf tuchrii yo' a.

²³Gaa ne quita'aa Jesucristó ra'a síf tuchrii yo', ne curihanj so' rej tu'va chuman' ga síf tuchrii, ne quirií talúj Jesucristó rihaan síf tuchrii yo', ne cuta' ra'a Jesucristó xráa so', gaa ne xná'anj Jesucristó man so' a:

—Ruvi' rihaan so' na' —taj Jesucristó, xná'anj so' man síf tuchrii yo' a.

²⁴Gaa ne ni'yaj síf tuchrii yo' doj, gaa ne cataj so':

—Ne'én 'unj nij snó'o, ne ase vaa chruun vaa nij so', tzaj ne chéé nij so' ni'yaj 'unj nanj asanj —taj so' rihaan Jesucristó a.

²⁵Gaa ne cuta' ra'a uún Jesucristó rihaan síf tuchrii yo', gaa ne ni'yaj ni'yaj síf tuchrii, ne dan me se nahuun sa' nu' rlij rihaan so', ne curuvi' sa' cunudanj rasuun ni'yaj so' nanj adonj. ²⁶Gaa ne ca'néé Jesucristó man so' quinan' so', tzaj ne cataj Jesucristó rihaan so' se vaa:

—A doj se catúj so' rá chuman', ne se cataj so' rihaan a 'ó nij yuvii, gaa ne se gaa nanj xcaj nij yuvii cuentá daj qui'yáj che'é so' á —taj Jesucristó rihaan so' a.

Nana nihánj taj xna'anj se vaa cataj xna'anj Pedró me síf me Jesucristó a

²⁷Gaa ne curihanj Jesucristó ga nij síf tucu'yón se-nana so' chuman' Betsaida yo', ne ca'anj nij so' nij chuman' ra'a noco' man chuman' cu'naj Cesarea de Filipino do' a.

Dan me se vaj nij so', ne xná'anj Jesucristó man nij síf tucu'yón se-nana so', ne cataj so':

—Daj taj nij yuvii che'é 'unj ga. Ne me síf mé 'unj, taj nij yuvii ga —taj Jesucristó, xná'anj so' man nij so' a.

²⁸—Vaa síf taj se vaa síf cu'naj Juan síf cuta' ne man yuvii mé so' ei. Ne vaa síf taj uún se vaa síf cu'naj Elías síf nata' se-nana Diose gaa naá me uún so' chuguanj. Ne vaa síf taj uún se vaa yo'ó síf nata' se-nana Diose gaa naá me uún so' chiha'. 'O se danj taj 'o 'o nij yuvii che'é so' nanj adonj —cataj nij so' rihaan Jesucristó a.

²⁹—Ne ma'an soj, gaa ne me sí mé 'unj, rá ma'an soj ga —taj Jesucristó, xná'anj so' man nij sí tucu'yón se-nana so' a.

Gaa ne cataj sí cu'naj Pedró:

—Sí ca'néé Diose t̄inani man yuvī rihaan sayuun mé so' ei —taj so' rihaan Jesucristó a.

³⁰Gaa ne cataj xna'anj Jesucristó rihaan nij sí tucu'yón se-nana so' se vaa se nata' nij so' rihaan a 'ó yuvī me sí me so', taj so' a.

Nana nihánj taj xna'anj se vaa cataj xna'anj Jesucristó se vaa cavi' so' ne cunu u i'na' uún so' a

³¹Gaa ne guun che'e Jesucristó tucu'yón so' man nij sí tucu'yón se-nana so' se vaa che'é se sí ca'néé Diose nicaj yu'unj man yuvī me so' ro', che'é dan n̄o xcúún so' quir̄an' ndo'o so' sayuun, qui'yaj nij sí uun chij do', nij xrej at̄a suun nocoo doj do', nij sí naqui'yaj cuu se-tucañj Moisés rihaan nij yuvī do', ne nachri' nij so' ni'yaj nij so' man so', ne ticavi' nii man so', ne cach̄en va'nuj güii, gaa ne cunu u i'na' uún so', cataj so' a.

³²Ne nucuaj ndo'o nata' so' nana yo' rihaan nij sí tucu'yón se-nana so' a. Gaa ne quirii yaníj sí cu'naj Pedró man Jesucristó, ne guun che'e so' cataj so' se vaa ne nó xcúún Jesucristó ca'mii Jesucristó nana vaa danj a. ³³Gaa ne canicaj Jesucristó, ne ni'yaj so' man nij sí tucu'yón se-nana so', ne cataj so' rihaan Pedró se vaa ne nó xcúún uxrá ma'an Pedró ca'mii Pedró danj, ne cataj so':

—Naxuun so' mán so' rihanj á. Na'vej raj queñe'enj mán so' a ma'.

'O se ase tu'va sí chree sí cu'naj Satanás ro', danj tu'vá so' ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvī nanj adonj —taj Jesucristó rihaan sí cu'naj Pedró a.

³⁴Gaa ne canacúún Jesucristó man nij yuvī ca'na' nij yuvī rej nicun' so' ga nij sí tucu'yón se-nana so', gaa ne cataj so' rihaan taran' nij so' a:

—Sese me rá yo'o so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quir̄an' uxrá so' sayuun do', ca'vee se ndaa cachron nii man so' rihaan rcutze do', tzaj ne yo'o qui'yaj suun so' che'e, ne yo'o canoco' raan so' manj adonj. ³⁵Tzaj ne sese vaa 'o sí me rá t̄inani man ma'an rihaan sayuun, ne vaa güii, ne yo'o cavi' nimán so' adonj. Tzaj ne sese cavi' yo'o so' che'é se vaa me so' sí nocoo manj do', che'é se nata' so' se-nanaj nana sa' do', ne vaa güii, ne cunu u i'na' uún so' adonj.

³⁶Ne a me se quir̄i' 'o so' sese qui'yaj canaán so' nu' rasuun man rihaan chumii nihánj ne ca'anj ni'ya nimán so', rá soj ga. Daj chihaa m̄j se ca'vee cavī sa' so', qui'yaj rasuun man rihaan chumii nihánj a ma'. ³⁷Tzaj ne ca'vee se navij nu' si'yaj yo'o so' rihaan chumii nihánj, tzaj ne sese gaa i'na' nimán so' nu' cavī nu' ca'anj, ne quinano rá so', rá soj na'. Daj chihaa m̄j se quinano rá so' a ma'. 'O se cavī sa' uxrá so' nanj adonj.

³⁸”Dan me se xa' sí uun na'aj ni'yaj manj ne uun na'aj ni'yaj

se-nanaj ro', ase vaa nij sí chi'ii tumé ndo'o cacun' man rihaan chumii nihánj cuano vaa so' adonj. Ne vaa güii guun na'aj 'unj sij ca'née Diose nicaj yu'unj man yuvii ni'yaj 'unj man so' asa' ca'na' uún 'unj rihaan chumii nihánj, ne dan me se uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj asa' ca'ná' 'unj nanj adonj —taj Jesucristó rihaan nij so'a.

9 Gaa ne cataj uún so' se vaa: —Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano, me se gaa ataa a cavi' ta'aj soj, ne ya quene'en ta'aj soj asa' guun che'e Diose nucuaj ndo'o guun chij Diose rihaan chumii nihánj nanj adonj —taj Jesucristó rihaan taran' nij so' a.

Nana nihánj taj xna'anj se vaa chuguun ndo'o man Jesucristó ni'yaj nij sí tucuyón se-nana so' a

²Cachén vatan' güii, gaa ne nicaj Jesucristó man sí cu'naj Pedró do', sí cu'naj Jacobo do', sí cu'naj Juan do', ca'anj so' ra' 'o quij xcaan rej taj vaj a 'lo yuvii ne a. Gaa ne yo'o cunuu ino cunudanj man Jesucristó ni'yaj nij sí tucuyón se-nana so' yo' a. ³Ne dan me se cunuu catzii ndo'o sagan' so', ne ndaa raan lá ma'an sagan' so' ni'yaj nij so' a. Ne taj vaj a yo'ó sí man rihaan chumii nihánj ca'vee qui'yaj catzii yatzij ndaa rá se vaa sagan' Jesucristó a. ⁴Ne ni'yaj va'núj nij so', ne dan me se naqui'yaa sí cu'naj Elías sí cane gaa naá ga sí cu'naj Moisés rihaan nij so', ne nanó roj so' cuentó ga Jesucristó ni'yaj nij so' a. ⁵Gaa ne cataj Pedró rihaan Jesucristó a:

—Cunaj uxrá vaa mán núj nihánj ga so', maestro. Ne qui'yaj núj va'núj ve' yacataj cane soj nanj á. 'O ve' cané so', ne yo'ó ve' cané sí cu'naj Moisés, ne yo'ó ve' cané sí cu'naj Elías ei —taj Pedró rihaan Jesucristó a.

⁶O se ne quene'en uxrá Pedró daj me che'é ca'mii so' rihaan Jesucristó danj a ma'. 'O se cuchu'vi' ndo'o va'núj nij so' che'é se vaa quene'en nij so' nanj adonj.

⁷Gaa ne ca'na' 'o ngaa, ne caráan ngaa man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose a:

—Sí nihánj me ta'nij adonj. 'Ee raj man so' adonj. Cuno soj rihaan so' ei —taj Diose cuno nij so' a.

⁸Gaa ne nu' ni'yaj nij so', ne daj orún' Jesucristó nicun' ga nij so', quene'en nij so' nanj adonj.

Nana nihánj taj xna'anj se vaa ase vaa sí cu'naj Elías ro', danj vaa sí cu'naj Juan sí cuta' ne man yuvii a

⁹Gaa ne gaa nanij nij so' tacóo quij yo' me se ca'ne' Jesucristó suun rihaan nij so' se vaa se nata' nij so' rihaan a doj yuvii che'é se vaa quene'en nij so' a. Yo'o dínj gaa tu'va nij so' che'é rasuun quene'en nij so' a. Ndaa quisij cavi' so' ne cunuu i'na' uún so', gaa ne ca'vee nata' nij so' se vaa quene'en nij so' daj quiran' so' sí ca'née Diose nicaj yu'unj man yuvii, taj Jesucristó rihaan nij so' a. ¹⁰Ne yo'o nuú rá nij so' nana yo', ne xná'anj ndo'o nij so' man tuvi' ma'an nij so' me che'é me cataj Jesucristó se vaa cavi' so' ne cunuu i'na' uún so' a. ¹¹Gaa ne xná'anj nij so' man Jesucristó, cataj nij so':

—Me che'é taj nij síi naqui'yaj cuu se-tucuanj Moisés rihaan yuvii se vaa asino ca'na' síi cu'naj Elías síi nata' se-nana Diose gaa naá, gaa ne ca'vee ca'ne' Diose cacun' che'é yuvii ga —taj nij síi tucu'yón se-nana Jesucristó, xná'anj nij so' man Jesucristó a.

¹²Gaa ne cataj Jesucristó rihaan nij so' a:

—Ya a'mii nij síi naqui'yaj cuu se-tucuanj Moisés, taj nij so' se vaa asino ca'na' síi cu'naj Elías, gaa ne naqui'yaj sa' so' nu' rasuun adonj. Ne me che'é taj danj Diose se vaa síi ca'née Diose nicaj yu'unj man yuvii me se quirán' ndo'o so' sayuun ne nachri' nij yuvii ni'yaj nij yuvii man so', rá soj ga. ¹³Tzaj ne cataj xna'anj 'unj rihaan soj se vaa aj ca'na' ya síi cu'naj Elías, tzaj ne qui'yaj ya yuvii ndaa vaa me rá ma'an nij yuvii man so' ndaa vaa taj danj Diose che'é so' nanj adonj. Che'é dan ca'vee xcaj soj cuentá daj quirán' 'unj qui'yaj uún nij yuvii adonj —taj Jesucristó rihaan nij síi tucu'yón se-nana so' a.

Nana nihánj taj xna'anj se vaa nahuun sa' 'o xnii nuu nana chree nimán, qui'yaj Jesucristó a

¹⁴Dan me se cuchi' nij so' rej nicun' yo'ó nij síi tucu'yón se-nana Jesucristó, ne quene'en nij so' se vaa mán que'ee yuvii anicaj rej nicun' nij so', ne nicun' doj nij síi naqui'yaj cuu se-tucuanj Moisés, ne ca'mii cunu' uxrá nij so' ga nij síi tucu'yón se-nana Jesucristó yo' a.

¹⁵Ne nu' quene'en nij yuvii man Jesucristó, ne nu' ca'anj ndo'o rá nij yuvii, ne cunánj nij yuvii ndaa rej vaj Jesucristó ca'mii nij so' ga so' a.

¹⁶Gaa ne xná'anj Jesucristó man nij yuvii a:

—Me che'é me ca'mii cunu' nij soj ga nij síi tucu'yón se-nanaj ga —taj so' rihaan nij yuvii a.

¹⁷Gaa ne yo'o nij yuvii cataj rihaan Jesucristó a:

—'Unj me se nicaj 'unj ta'níj ca'ná' 'unj nano' 'unj mán so', maestro. Ne ta'níj me se ya'mii so' che'é se nuu nana chree nimán so', ¹⁸ne me rej ma'an me rá nana chree quita'aa nana chree man so', ne cagan' nana chree man so' rihaan yo'óó, ne avii yatan' tu'va so', ne chá ruj so' cúu yan' so', ne nuu chrúnj nu' so' nanj adonj. Ne cataj 'unj rihaan nij síi tucu'yón se-nana so' se vaa quirii nij so' man nana chree nimán ta'níj, tzaj ne ne ca'vee qui'yaj canaán nij so' ma' —taj snó'o yo' rihaan Jesucristó a.

¹⁹Gaa ne cataj Jesucristó rihaan nij yuvii a:

—Dan me se síi ne amán rá me soj sij man rihaan chumii nihánj cuano, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nicaj soj man xnii ca'na' soj rihanj cuaj á —taj Jesucristó a.

²⁰Gaa ne nicaj nij yuvii man xnii ca'na' nij yuvii rihaan Jesucristó a. Ne dan me se gaa quene'en nana chree man Jesucristó, ne nu' snúú xnii, ne naxru' xnii, qui'yaj nana chree yo', ne natúj rmii xnii, ne cavii yatan' tu'va xnii a. ²¹Gaa ne xná'anj Jesucristó man rej xnii, cataj Jesucristó:

—Me daj güii ran' ta'níi so' danj ga —taj Jesucristó rihaan rej xnii a.

²²Gaa ne cataj rej xnii:

—Danj ran' so' asij ne'ej me so', ne que'ee ndo'o cagan' nana chree man so' rihaan ya'an do', rihaan na do', qui'yaj nana chree, che'é rej me rá nana chree cavi' so', tzaj ne sese ca'vee, ne cunuu 'ee rá so' manj ne racuíj so' man núj ruguanj —taj rej xnii yo' rihaan Jesucristó a.

²³Gaa ne cataj Jesucristó rihaan so' a:

—Taj che'é cataj so' nana “sese ca'vee” ma'. 'O se sí amán rá ni'yaj man Diose ro', ca'vee qui'yaj so' cunudanj nanj adonj —taj Jesucristó rihaan so' a.

²⁴Nu' ca'mii Jesucristó danj, ne nu' caguáj rej xnii, cataj so':

—Amán rá 'unj ni'yaj 'unj Diose á. Racuíj so' manj cuchuman raj doj, Señor —taj so' rihaan Jesucristó a.

²⁵Dan me se quene'en Jesucristó se vaa cunánj ndo'o yuvií ca'na' nij yuvií rej nicun' so', ne che'é dan ca'ne' Jesucristó suun rihaan nana chree yo', ne cataj Jesucristó:

—Rihaan so' nana chree qui'yaj ya'mii ne qui'yaj so'o man xnii nihánj a'mij, ne cataj xna'anj 'unj rihaan so' se vaa curihanj so' cuaj nimán so' cuano, ne daj chihaa mij se catúj uún so' nimán so' mei —taj Jesucristó rihaan nana chree yo' a.

²⁶Gaa ne caguáj nana chree, ne guun snuj ndo'o xnii naxru' xnii, qui'yaj nana chree, ne dan me se curihanj nana chree nimán xnii yo' a. Gaa ne ase vaa sí cavi' ro', danj vaa xnii, naj xnii rihaan yo'óó, ne cataj nij yuvií se vaa ya ya cavi' so' a. ²⁷Tzaj ne quita'aa Jesucristó ra'a xnii, ne naxcaj Jesucristó man xnii, ne naxagaa so' a.

²⁸Dan me se corá catúj Jesucristó rá ve', ne inanj nij ma'an nij sí tucu'yón se-nana so' ro', man rá ve' ga so', ne xná'anj nij so' man so', ne cataj nij so':

—Me che'é ne guun nucuaj núj quirii núj man nana chree yo' ga —taj nij so' rihaan Jesucristó a.

²⁹Gaa ne cataj Jesucristó rihaan nij so' se vaa:

—Xa' nana chree vaa danj ro', se ca'vee qui'yaj ní' curihanj nij so' nimán yuvií sese ne achíin ni'yaj ndo'o ní' rihaan Diose ma'. Dan me se cachinj ni'yaj uxrá', ne caraa guée ndo'o', gaa ne ca'vee adonj —taj Jesucristó rihaan nij sí tucu'yón se-nana so' a.

Nana nihánj taj xna'anj se vaa cataj xna'anj uún Jesucristó se vaa cavi' so' ne cunuu i'na' uún so' a

³⁰Gaa ne cavii Jesucristó ga nij sí tucu'yón se-nana so' rej yo', ne ca'anj nij so' estadó Galilea, ne ne ca'vej rá Jesucristó xcaj nij yuvií cuentá me rej vaj so' a. ³¹'O se tucu'yón so' man nij sí tucu'yón se-nana so', ne dan me se cataj so' rihaan nij so' se vaa:

—'O se sí ca'née Diose nicaj yu'unj man yuvií mej, ne vaa güii, ne nago' nii manj rihaan yuvií adonj. Dan me se ticavi' nij yuvií manj, gaa ne cachén va'nuj güii, gaa ne cunuu i'na' uún 'unj nanj adonj —taj Jesucristó rihaan nij sí tucu'yón se-nana so' a.

³²Tzaj ne ne cunó nij so' nana ca'mii Jesucristó, ne chu'vi' nij so' xna'anj nij so' man Jesucristó me taj nana yo' a.

Nana nihánj taj xna'anj me sí me
sí guun chij doj asa' guun chij
Diose rihaan chumiij nihánj a

³³Gaa ne catúj Jesucristó ga nij sí
tucu'yón se-nana so' chuman' cu'naj
Capernaum a.

Dan me se gaa mán nij so' rá ve',
ne xná'anj Jesucristó man nij sí
tucu'yón se-nana so', ne cataj so':

—Me che'é me canó tuvi' nij soj
gaa vaj ní' chrej asij cua'aa ga —taj
Jesucristó, xná'anj so' man nij so' a.

³⁴Gaa ne cunuu dínj tu'va nij
so' a. 'O se gaa vaj nij so' chrej, ne
canó tuvi' nij so' ga ma'an tuvi' nij
so' se vaa cataj nij so' me nij so' me
sí guun chij doj a.

³⁵Gaa ne ca'anj quitaj Jesucristó
chruun xlá, ne canacúun so' man
chuvij nij so' se vaa ca'na' nij so' rihaan
so', gaa ne cataj so' rihaan nij so' a:

—Me ma'an 'o sí me rá guun chij
doj, ne so' me sí guun sí noco', ne
ndaá guun so' mozó rihaan daj a
tuvi' so' adonj —taj Jesucristó
rihaan chuvij nij so' a.

³⁶Gaa ne nicaj Jesucristó man 'o
ne'ej, ne cachrón so' man ne'ej yo'
tanuu nij sí tucu'yón se-nana so', ne
na'yaan so' man ne'ej, ne cataj so'
rihaan nij sí tucu'yón se-nana so' a:

³⁷—Me ma'an 'o sí aráj cochroj ne
a'mii sa' so' ga 'o ne'ej nihánj che'ej,
ne adi' ma'anj me aráj cochroj
ne a'mii sa' so' ga vaa nanj adonj.
Dan me se sí a'mii sa' ga 'unj me
se nuveé orún' 'unj me a'mii sa' so'
ga ma'. Maan DiOSE ya sí ca'née
mán 'unj rihaan chumiij nihánj me
aráj cochroj ya so' ne a'mii sa' ya so'
ga vaa nanj adonj —taj Jesucristó
rihaan nij sí tucu'yón se-nana so' a.

Nana nihánj taj xna'anj se vaa cataj
xna'anj Jesucristó se vaa me ma'an
sí ne unu' ga so' me tuvi' so' a

³⁸Cataj sí cu'naj Juan rihaan
Jesucristó a:

—Quene'en núj man 'o sí ata'
tu'va se-chuvií so', ne urihanj
nana chree nimán nij yuvií, 'yaj
so', nanj maestro. Tzaj ne caráán
núj chrej ca'mii so' ne se qui'yaj so'
danj, che'é se nuveé sij chéé ga ní'
me so', taj núj, nanj maestro —taj
Juan rihaan Jesucristó a.

³⁹Gaa ne cataj Jesucristó rihaan
chuvij nij sí tucu'yón se-nana so' a:
—Ca'ne' sa' guee rá soj qui'yaj
ma'an so' danj ei. 'O se taj a 'o sí
ata' tu'va se-chuvií 'unj ne qui'yaj so'
suun sa' nocoo che'é se-chuvií 'unj,
ne síj, gaa ne canicaj so' ne ca'mii
chree so' che'é 'unj ma'. ⁴⁰'O se xa'
sí ne unu' ga ní', tzaj ne tuvi' ní'
me so' adonj. ⁴¹'O se a me ma'an
yo'o sí rqué doj na co'o nij soj che'é
se-chuvií 'unj, ne ya ya cataj xna'anj
'unj rihaan soj se vaa daj chihaa mój se
quinavij se sa' naru'vee DiOSE rihaan
sí rqué doj na yo' co'o soj ma'.

Nana nihánj taj xna'anj daj quiran'
sí qui'yaj chi'ii nimán 'o sí
cuchumán rá ni'yaj man Jesucristó a

⁴²—Dan me se me ma'an 'o sí
qui'yaj chi'ii nimán 'o sí le'ej amán
rá ni'yaj manj, ne ca'vee a doj cavii
sa' sí qui'yaj danj sese toco' nii 'o
yuvej xij váj 'núú trigó gaán chihá
so' ne taguéj nii man so' rque na
ya'anj nanj adonj. Dan me se doj a
sayuun quiran' so', sese qui'yaj chi'ii
so' nimán 'o sí le'ej amán rá ni'yaj
manj adonj.

43”Dan me se sese ra’á so’ me rá qui’yaj cacun!, ne táá a se ca’ne’ so’ man yo’, gaa ne se gaa nanj ca’anj so’ rihaan ya’an qui’yaj yo’ ei. Taj se ’yaj se nuj se taj yan vaj ra’á so’, tzaj ne ca’vee cayáán so’ ga Diose gaa ei. Tzaj ne sese quitaj ra’á so’ ne qui’yaj yo’ cacun!, ne ca’anj so’ rihaan ya’an, qui’yaj yo’, ne dan me se ya’an yo’ me se daj chihaa mǐj se quina’áj ya’an yo’ nuvi nigan’ a mei. 44”Ne nij sí man rihaan ya’an yo’ me se se ca’vee cavi’ xlúú chá man nij so’, ne daj chihaa mǐj se quina’áj ya’an rej cunuú nij so’ cacaa nij so’ a man adonj.

45”Ne sese tacóo so’ me rá qui’yaj cacun!, ne táá a se ca’ne’ so’ man yo’, gaa ne se gaa nanj ca’anj so’ rihaan ya’an qui’yaj yo’ nanj ei. Taj se ’yaj se nuj se taj yan vaj tacóo so’, tzaj ne ca’vee cayáán so’ ga Diose ei. Tzaj ne sese quitaj tacóo so’ ne qui’yaj yo’ cacun!, ne ca’anj so’ rihaan ya’an, qui’yaj yo’ ei. 46”Ne nij sí man rihaan ya’an yo’ me se se ca’vee cavi’ xlúú chá man nij so’, ne daj chihaa mǐj se quina’áj ya’an rej cunuú nij so’ cacaa nij so’ a man adonj.

47”Veé danj uún sese me rá rlij rihaan so’ qui’yaj yo’ cacun!, ne táá a se quirii so’ man yo’, ne sí rihaan canuú gaa so’, tzaj ne ca’vee catuú so’ rej guun hij Diose ei. Tzaj ne sese cunuú rlij rihaan so’ ne qui’yaj yo’ cacun!, ne ca’anj so’ rihaan ya’an, qui’yaj yo’ ei. 48”Ne nij sí man rihaan ya’an yo’ me se se ca’vee cavi’ xlúú chá man nij so’, ne daj chihaa mǐj se quina’áj ya’an rej cumān nij so’ cacaa nij so’ a man adonj.

49”O se vaa sayuun quiraan’ cunudanj nij rasuun man rihaan chumii nihánj, qui’yaj Diose, ne dan me se ase vaa nuu sa’ nee ’yaj yaan ro’, danj gaa cunuú sa’ nij sí man rihaan chumii nihánj, qui’yaj ya’an ei.

50”Ne ase vaa yaan ga chraa ro’, danj vaa nij soj sij tucuyón se-nanaj ga chumii nihánj, ne vaa se uun ndo’o yaan ei. Dan me se sese ne ’ne’ chá yaan yo’, gaa ne taj se qui’yá’ cunuú sa’ yaan gaa a ma’. Che’é dan, ase vaa yaan ’ne’ sa’ ro’, danj gaa soj, ne dínj cayáán soj ga tuvi’ soj, ne ca’vee cunuú sa’ chumii nihánj qui’yaj soj nanj adonj —taj Jesucristó rihaan nij sí tucuyón se-nana so’ a.

Nana nihánj taj xna’anj se
vaa ne nó xcúun yuvií quirii’ij
yuvii man nica yuvií a

10 Gaa ne curihanj Jesucristó rej yo’, ne ca’anj so’ ndaa rnej tu’va chráa cu’naj Jordán, ndaa estadó Judea a. Gaa ne cunuú chre’ uún que’ee yuvií rihaan so’, ne tucuyón uún so’ se-nana so’ rihaan nij yuvií, ndaa vaa u’yón so’ ’yaj so’ a. 2Gaa ne ca’na’ doj sí fariseo rihaan so’, ne xná’anj nij so’ man Jesucristó sese no xcúun snó’o quirii’ij snó’o man nica so’ a. Danj cataj nij sí fariseo, che’é se guun rá nij so’ cutá’ nij so’ cacun’ xráa Jesucristó che’é nana ca’mii Jesucristó a. 3Gaa ne cataj Jesucristó rihaan nij so’ a:

—Ne daj cataj sí cu’naj Moisés qui’yaj soj ga —taj Jesucristó, xná’anj so’ man nij sí fariseo a.

4Gaa ne cataj nij so’ se vaa:

—Ca'ne' sí cu'naj Moisés suun se vaa naxcaj yuvii yanj rihaan nij sí nicaj suun, ne ca'vee quirilij yuvii man nica yuvii á —taj nij sí fariseo a.

⁵Gaa ne cataj Jesucristó rihaan nij so' a:

—Maan che'é se sí nichraj ndo'o rá me nij soj ro', che'é dan cachrón Moisés nana yo' rihaan yanj cunõ soj a. ⁶Tzaj ne asij qui'yaj Diose chumii, ne qui'yaj Diose snó'o, ne qui'yaj Diose chana, ne vij roj so' me yuvii, qui'yaj Diose a. ⁷Che'é dan tanán snó'o man rej so', man nii so' do', ⁸ne ase vaa orún' yuvii ro', danj gaa snó'o ga nica snó'o, taj danj Diose a. Dan me se nuveé vij ran' yuvii me roj so' asij xcaj tuvi' roj so' a ma'. 'O se ase vaa orún' yuvii ro', vaa roj so' nanj adonj. ⁹Dan me se Diose me sí qui'yaj xcaj tuvi' roj so', ne che'é dan ne nó xcúún a 'o yuvii ca'ne' tanuu yuvii man roj so' ma' —taj Jesucristó rihaan nij sí fariseo yo' a.

¹⁰Dan me se gaa man nij sí tucu'yón se-nana Jesucristó rá 'o ve' ga so', gaa ne xná'anj nij so' man so' che'é nana ca'mii so' rihaan nij sí fariseo a. ¹¹Ne cataj Jesucristó rihaan nij so' a:

—Me ma'an 'o sí ri'ij man nica ne xcaj so' man yo'ó chana, ne tumé ndo'o so' cacun', ne nij qui'yaj so' rihaan nica so' ei. ¹²Tzaj ne sese cunanj chana rihaan nica no', ne xcaj no' man yo'ó chii, ne tumé ndo'o no' cacun' uún adonj —taj Jesucristó rihaan nij sí tucu'yón se-nana so' a.

Nana nihánj taj xna'anj me che'é caran' rá Jesucristó ni'yaj so' man ne'ej a

¹³Gaa ne nica[n] nij yuvii man nij ne'ej ca'na' nij yuvii rihaan

Jesucristó, che'é rej cutá' Jesucristó ra'a so' ra[n] nij ne'ej a. Tzaj ne nij sí tucu'yón se-nana Jesucristó me se cataj xna'anj nij so' rihaan nij yuvii se vaa ne nó xcúún nij ne'ej ca'na' nij ne'ej rihaan Jesucristó, taj nij so' a. ¹⁴Tzaj ne xcaj Jesucristó cuentá daj qui'yaj nij sí tucu'yón se-nana so', gaa ne ca'maan rá Jesucristó, ne cataj so' rihaan nij sí tucu'yón se-nana so' a:

—Ca'ne' rá soj ca'na' nij ne'ej rihanj á. Se caráan soj chrej rihaan nij ne'ej mei. 'O se tucua[n] nij sí vaa danj ro', me rej yanj Diose uun chij Diose nanj adonj. ¹⁵Ya ya cataj xna'anj 'unj rihaan soj se vaa me ma'an 'o sí na'vej rá guun chij Diose nimán, ndaa vaa uun chij Diose nimán ne'ej, ne daj chihaa mij se ca'vee cayáan so' ga Diose asa' guun chij Diose rihaan chumii nihánj ma' —taj Jesucristó rihaan nij sí tucu'yón se-nana so' a.

¹⁶Gaa ne na'yaan Jesucristó man nij ne'ej, ne uta' so' ra'a so' ra[n] nij ne'ej, ne achíin ni'yaj so' rihaan Diose che'é nij ne'ej a.

Nana nihánj taj xna'anj che'é yo'ó sí me rá cayáan ga Diose nu' cavii nu' ca'anj a

¹⁷Dan me se gaa nayón Jesucristó chrej, ne dan me se cunanj 'o sí tachruu yo' ca'na' so' rihaan Jesucristó, ne canicun' ruj sí tachruu yo' rihaan Jesucristó, ne xná'anj so' man Jesucristó, cataj so', ne:

—Maestro. Sí sa' uxrá mé so' adonj. Daj qui'yaj ne ca'vee cayánj ga Diose nu' cavii nu' ca'anj ga —taj sí tachruu yo', xná'anj so' man Jesucristó a.

¹⁸Gaa ne cataj Jesucristó rihaan so' a:

—Me che'é cataj so' se vaa síi sa' uxrá mej ga. 'O se orún' Diose me síi sa' ei. ¹⁹Ne aj ne'én so' nij nana nocoo ya ya nana cataj xna'anj Diose se vaa canoco' ní' á. Dan me se taj nana yo': "Se ticaví' so' yuvii ma'. Se cotoj so' ga chana nica yo'ó yuvii ma'. Se quilyaj ituu so' si'yaj yo'ó yuvii ma'. Se nanó so' cuentó ne che'é yuvii ma'. Se tiha' yu'unj so' man yuvii che'é sa'anj ma'. Caraa cochróo so' rihaan rée so' do', rihaan níi so' do' á" —taj Jesucristó rihaan síi tachruu yo' a.

²⁰—Asij gaa mej xnii me ve'é unó 'unj nu' nij nana yo', nanj maestro —taj so' rihaan Jesucristó a.

²¹Gaa ne ni'yaj uxrá Jesucristó man so', ne cunuu 'ee rá Jesucristó man so', ne cataj Jesucristó rihaan so' a:

—Daj orún' rasuun achiin ya mán so' nanj ei. Cavií so' ca'anj so', ne cutu'vee so' nu' si'yáá so', ne sa'anj quiri' so' ro', caxrii so' ston nij síi nique, ne cumān ndo'o si'yáá so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó a.

²²Gaa ne quiri' ndo'o rá síi tachruu, qui'yaj se-nana Jesucristó, ne ca'anj uu so', ne nanó ndo'o rá so' a. 'O se síi ru'vee me so', ne vaa ndo'o si'yaj so' a.

²³Gaa ne ni'yaj Jesucristó, ne cataj so' rihaan nij síi tucu'yón se-nana so' a:

—Sayuun uxrá vaa quisij nij síi vaa ndo'o sa'anj rihaan cayáan ga Diose asa' guun chij Diose rihaan chumii nihánj nanj adonj —taj

Jesucristó rihaan nij síi tucu'yón se-nana so' a.

²⁴Gaa ne ca'anj ndo'o rá nij so' gaa cuno nij so' nana yo' nana ca'mii Jesucristó a. Gaa ne cataj uún Jesucristó rihaan nij so' a:

—Sayuun uxrá vaa quisij yuvii cayáan nij yuvii ga Diose asa' guun chij Diose rihaan chumii nihánj nanj chuguanj. ²⁵Dan me se ne'en soj se vaa sayuun ndo'o vaa cachēn xcuu camelló rihaan yu'uj taj tacúun cúu nuvá, tzaj ne cuano nihánj me se cataj xna'anj 'unj rihaan soj se vaa ca'vee a doj cachēn xcuu yo' yu'uj taj tacúun cúu nuvá, ndaa rá se vaa síi ru'vee, ne se guun cachēn so' cayáan so' ga Diose asa' guun chij Diose rihaan chumii nihánj a ma' —taj Jesucristó rihaan nij so' a.

²⁶Gaa ne ca'anj ndo'o rá nij so', ne cataj nij so' rihaan Jesucristó a:

—Che'é dan me se me síi guun nucuaj quinanii rihaan sayuun ga —taj nij so', xna'anj nij so' man so' a.

²⁷Ni'yaj Jesucristó man nij so', ne cataj so':

—Se guun nucuaj yuvii quinanii ma'an nij yuvii rihaan sayuun ma'. Sayuun uxrá vaa rihaan nij so' nanj adonj. Tzaj ne xa' rihaan Diose me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj Jesucristó a.

²⁸Gaa ne guun che'e Pedró cataj Pedró:

—Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

²⁹Gaa ne cataj Jesucristó:

—Ya ya cataj xna'anj 'unj rihaan nij soj se vaa síi tanáj ve' tucua

tanáj tinúú tanáj ra'vij tanáj nii tanáj rej tanáj ta'níí tanáj to'óó tanáj che'é se me rá so' canoco' so' manj ne nata' so' se-nanaj nana sa' rihaan yuvií, ³⁰ne cientó doj a rasuun quirí' uún so' gaa vaa i'na' so' rihaan chumií nihánj cuano adonj. Dan me se cumán que'ee ve' tucua' so' do', tinúú so' do', ra'vij so' do', nii so' do', ta'níí so' do', to'óó so' do', rihaan so' gaa vaa i'na' so' rihaan chumií nihánj, tzaj ne vaa sayuun quirán' so' che'é 'unj adonj. Ne asa' guun chij Diose rihaan chumií nihánj me se yo'q cayáán so' ga Diose nu' cavii nu' ca'anj nanj adonj. ³¹Tzaj ne que'ee nij síí guun chij ndo'o rihaan chumií nihánj ro', guun nij so' síí noco' ei. Ne que'ee nij síí ne guun chij rihaan chumií nihánj me se guun chij nij so', qui'yaj Diose nanj adonj —taj Jesucristó rihaan nij síí tucuyón se-nana so' a.

Nana nihánj taj xna'anj se vaa síj va'nuj cataj xna'anj Jesucristó se vaa cavi' so' ne cunuu i'na' uún so' a

³²Dan me se vaj nij so' chrej avii nij so' chuman' Jerusalén, ne táá yaan Jesucristó rihaan nij síí tucuyón se-nana so', ne ma'anj ndo'o rá nij so', ne nij síí noco' xcó nij so' me se cuchu'vi' ndo'o nij so' a. Dan me se narii Jesucristó man chuvij nij síí tucuyón se-nana so', ne guun che'e so' cataj xna'anj so' rihaan nij so' daj quirán' so' a. ³³Dan me se cataj Jesucristó rihaan nij so', ne:

—Nihánj me ca'anj ní' chuman' Jerusalén, ne quita'aa nii manj sij ca'née Diose nīcaj yu'unj man yuvií,

ne nago' nii manj rihaan nij xrej ata' suun noco' doj do', rihaan nij síí naqui'yaj cuu se-tucuanj Moisés rihaan yuvií do' a. Ne cuta' nij so' cacun' xráj, ne cataj nij so' se vaa cavi' 'unj a. Gaa ne nago' nij so' manj rihaan nij síí yaníj, ³⁴ne ca'nga' naco' nij síí yaníj quene'en nij so' manj, ne quirii talúj nij so' rihanj, ne go' nij so' cuartá xráj, ne ticavi' nij so' manj a. Gaa ne cachén va'nuj güii, gaa ne cunuu i'na' uún 'unj, qui'yaj Diose ei —taj Jesucristó rihaan chuvij nij síí tucuyón se-nana so' a.

Nana nihánj taj xna'anj se vaa achíín ni'yaj síí cu'naj Jacobo do', síí cu'naj Juan do', se vaa cata' roj so' suun sa' doj qui'yaj Jesucristó a

³⁵Gaa ne cuchí' síí cu'naj Jacobo do', síí cu'naj Juan do', rihaan Jesucristó, ne ta'níí síí cu'naj Zebedeo me roj so' a. Gaa ne cataj roj so' rihaan Jesucristó a:

—Me rá rój se vaa qui'yáá so' ndaa vaa cachin' ni'yaj rój rihaan so' che'é rój, maestro —taj roj so' rihaan Jesucristó a.

³⁶Gaa ne cataj Jesucristó rihaan roj so' a:

—Daj qui'yáj che'é roj soj, rá roj soj ga —taj so', xna'anj so' man roj so' a.

³⁷Gaa ne cataj roj so' rihaan Jesucristó a:

—Cataj xna'anj so' se vaa asa' guun chij so' rihaan chumií nihánj, ne quitaj rój x'núú so', ne cata' rój suun sa' doj, qui'yáá so' á. Dan me se yo'q rój cayáán rej nuva' so', ne yo'ó rój cayáán rej nichruún so', ne quirii ta'nga' rój ga so', cataj so', rá

roj a —taj roj sí cu'naj Jacobo ga Juan rihaan Jesucristó a.

³⁸Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachíin ni'yaj roj soj rihanj nihánj a ma'. 'O se guun nucuaj roj soj quirán' roj soj sayuun ndaa vaa quirán' 'unj na' —taj Jesucristó, xná'anj Jesucristó man roj so' a.

³⁹—Guun nucuaj rój ei —taj roj so' a.

Gaa ne cataj Jesucristó rihaan roj so' a:

—Ya ya quirán' roj soj sayuun gaj nanj á. ⁴⁰Tzaj ne ne nó xcúnj cataj xna'anj 'unj me sí cayáán x'núú 'unj rej nuva' 'unj do', rej nichrunj do', ma'. Orún' Diose me sí cataj xna'anj me sí quirii ta'nga' gaj nanj adonj —taj Jesucristó a.

⁴¹Gaa ne cuno yo'ó chí' nij sí tucu'yón se-nanā Jesucristó se vaa ca'mii roj sí cu'naj Jacobo ga Juan rihaan Jesucristó, gaa ne guun che'e nij so' ca'maan rá nij so' ni'yaj nij so' man roj so' a.

⁴²Gaa ne canacúun Jesucristó man cunudanj nij so' se vaa ca'na' nij so' rihaan so' a. Ne cataj so':

—Ne'en soj se vaa nij sí atā suun man rihaan chumii nihánj me se rii ta'nga' uxrá nij so' rihaan tuvi' nij so' nanj adonj. ⁴³Tzaj ne se gaa danj se a nuj ní' qui'yaj ní' ma'. 'O se sese me rá ní' guun chij ní' rihaan tuvi' ní', ne guun ní' sí qui'yaj suun rihaan taran' tuvi' ní', ⁴⁴ne ase vaa mozó ro', danj gaa xa' ní' rihaan tuvi' ní' nanj adonj. ⁴⁵Dan me se ca'née Diose manj nicaj yu'unj 'unj man yuvi, tzaj ne ne ca'na' 'unj ne guun nij yuvi mozó rihanj ma'. 'O

se ca'ná' 'unj qui'yaj suun ma'anj rihaan nij yuvi nanj adonj. Ne ca'ná' 'unj nayon ma'anj rihaan yuvi ne cavi' 'unj che'é cacun' ata nij so', gaa ne cavi sa' uxrá nij so', qui'yáj nanj adonj —taj Jesucristó a.

**Nanā nihánj taj xna'anj se
vaa naxra' rihaan sí cu'naj
Bartimeo, qui'yaj Jesucristó a**

⁴⁶Gaa ne catúj nij so' chuman' Jericó a. Gaa ne curihanj Jesucristó do', nij sí tucu'yón se-nanā so' do', que'ee yuvi do', chuman' Jericó, ne dan me se yáán 'o sí tuchrii cu'naj Bartimeo tu'va chrej, ne ta'níi sí cu'naj Timeo me so', ne sí achíin caridad me so' a. ⁴⁷Gaa ne xcaj so' cuentá se vaa Jesucristó sí cavii chuman' Nazaret me sí cachē rej ne so', ne che'é dan guun che'e so' caguáj so', ne cataj so':

—Ya ya ta'níi ta'nij si'no sí cu'naj David sí cane gaa naá mé so', Jesús. Cunuu 'ee rá so' manj ei —taj so' a.

⁴⁸Tzaj ne:

—Dínj tu'vá so' á —taj que'ee nij yuvi rihaan so' a.

Tzaj ne doj a nucuaj caguáj so', cataj so':

—Ta'níi ta'nij si'no sí cu'naj David sí cane gaa naá ei. Cunuu 'ee rá so' manj ei —taj uún so' a.

⁴⁹Gaa ne canicun' Jesucristó, ne ca'ne' Jesucristó suun rihaan nij sí nicun' ga so' se vaa ca'anj nacaj nij so' man sí tuchrii yo' ne ca'na' so' rihaan Jesucristó a. Gaa ne ca'anj canacunj nij so' man sí tuchrii, ne cataj nij so':

—Yo'o ca'nej nucuaj nimán so' ei. Nacúun so' mán so', ne naxumaan so', ca'anj ní' á —taj nij so' rihaan sí tuchrii cu'naj Bartimeo a.

⁵⁰Gaa ne tanáj so' yatzíj taj xráá so', ne güéj so', ne ca'na' so' rihaan Jesucristó a.

⁵¹Gaa ne xná'anj Jesucristó man so', cataj Jesucristó:

—Daj qui'yáj mán so', rá so' ga — taj Jesucristó a.

Ne:

—Cunuu sa' rihanj, raj, maestro — taj so' rihaan Jesucristó a.

⁵²Gaa ne cataj Jesucristó rihaan so' a:

—Ca'vee ca'anj so' á. Maan che'é se amán rá so' ni'yaj so' manj ro', che'é dan cunuu sa' rihaan so' ei — taj Jesucristó rihaan so' a.

Nu' ca'mii Jesucristó danj, ne nu' curuvi' rihaan síi tuchrii yo', ne ca'anj so' ga Jesucristó chrej vaj Jesucristó a.

Nana nihánj taj xna'anj daj
qui'yaj Jesucristó gaa catúj
Jesucristó chuman' Jerusalén a

11 Gaa ne quinichrun' Jesucristó ga nij síi tucu'yón se-nana so' roj chuman' cu'naj Betfagé ga Betania, ne roj chuman' yo' ro', naj nichrun' tu'va chuman' Jerusalén, ne tacóo quij cu'naj Quij man Chruun Olivó naj roj chuman' yo' a. Gaa ne ca'neé Jesucristó man vij tuvi' nij síi tucu'yón se-nana so' ca'anj rque chuman' Betfagé yo', ²ne cataj so' rihaan roj so' a:

—Cavii roj soj ca'anj soj, ne catuu roj soj chuman' nihánj chuman' naj rihaan ní', ne nu' catúj roj soj, ne nu' nari' roj soj man yo'o burró le'ej ya'anj numii a. Dan me se nache roj soj man xo', ne nicaj roj soj ca'na' roj soj rihanj nihánj á.

³Ne sese xna'anj nii man roj soj me

che'é 'yaj roj soj danj ga burró, ne cataj roj soj: “Síi 'nij ra'a man ní' achiin xcuu nihánj rihaan chuguanj. Ne nu' navij suun rihaan burró nihánj, ne nu' ca'nej uún so' man núj ca'na' tanáj uún núj man burró nihánj ei”, cataj roj soj á —taj Jesucristó rihaan roj síi tucu'yón se-nana so' a.

⁴Dan me se ca'anj roj so', ne catúj roj so' chuman', ne nari' roj so' man burró le'ej, ne nicun' xo' rá 'o callé rihaan ta'yaa, ne numii xo' a. Dan me se nache roj so' man xo' a. ⁵Ne nicun' doj nij yuvií rej yo', ne xná'anj nij so' man roj so', ne cataj nij so':

—Me che'é nache roj soj burró ga —taj nij síi nicun' rej yo' a.

⁶Ne ca'mii roj síi tucu'yón se-nana Jesucristó ndaa vaa ca'ne' Jesucristó suun rihaan roj so', gaa ne ca'vej rá nij síi nicun' rej yo' nicaj roj so' burró ca'na' roj so' a.

⁷Dan me se nicaj roj so' burró ca'na' uún roj so' rej nicun' Jesucristó, ne cuta' roj so' sagan' roj so' xráá burró, ne cavii Jesucristó xráá burró yo' a. ⁸Dan me se uchruj ndo'o nij yuvií yatzíj sagan' nij so' rá chrej, ne achén Jesucristó ga burró yo' rihaan yatzíj a. Ne yo'ó ta'aj nij yuvií ro', a'ne' nij so' rcoj ra'a chruun do', coj man tacaan do', uchruj nij so' rá chrej, ne achén Jesucristó ga burró le'ej a.

⁹Ne vaj yuvií taj yaan rihaan Jesucristó, ne 'na' yuvií noco' rej xco Jesucristó, ne caguáj nij yuvií, cataj nij yuvií:

—Caraa guee ní' rihaan Diose ei. 'Na' síi ca'neé síi 'nij ra'a man ní' ei. Se luj ndo'o me 'yaj Diose che'é

ní' ei. ¹⁰Cunaj uxrá vaa 'na' síi guun chij ndaa vaa guun chij xij ní' síi cu'naj David gaa naá ei. Caraa guee ní' rihaan Diose síi nicun' xtá' ei —taj nij yuvii yo', caguáj nij so' a.

¹¹Gaa ne catúj taran' nij so' rihaan nuvíi nocoo ne chuman' Jerusalén, ne ni'yaj Jesucristó man cunudanj nij rasuun man anicaj rihaan nuvíi nocoo, ne maan che'é se nichrun' guun rmi', ne che'é dan curihanj uún Jesucristó ga chuvij nij síi tucu'yón se-nana so', ne nanicaj so' ca'anj so' chuman' Betania a.

**Nana nihánj taj xna'anj daj
ca'mii Jesucristó rihaan
chruun nuvi' chruj raá a**

¹²Ne yo'ó güii me se curihanj uún nij so' chuman' Betania, ne na'aan rque Jesucristó a. ¹³Gaa ne gan' nicun' 'o chruun man chruj higó quene'en Jesucristó, ne taj coj raá chruun yo' a. Ne cuchi' so' tacóo chruun, ne ni'yaj so', ne taj vaj a doj chruj man raá chruun a. Maan nanj coj uun táa raá chruun yo' a. 'O se nuveé tiq man chruj higó me yo' a. ¹⁴Gaa ne cataj Jesucristó rihaan chruun a:

—Daj chihaa mij se cumán chruj raá so' chá yuvii a ma' —taj so' rihaan chruun man chruj higó yo' a.

Ne cuno nij síi tucu'yón se-nana so' se vaa ca'mii so' danj rihaan chruun yo' a.

**Nana nihánj taj xna'anj se vaa
quirii Jesucristó man nij yuvii tu'véj
rasuun man rá nuvíi nocoo a**

¹⁵Gaa ne catúj Jesucristó ga nij síi tucu'yón se-nana so' chuman'

Jerusalén, gaa ne catúj Jesucristó rá nuvíi nocoo, gaa ne guun che'e so' quirii so' man nu' nij síi tu'véj rasuun do', man nij síi quiránj rasuun man rá nuvíi nocoo do' a. Ne tiguúj ra'a so' nij chruun mesá natuná nii sa'anj rihaan, ne tiguúj ra'a so' chruun xlá taj nij síi tu'véj cha'aan a. ¹⁶Ne caráán so' chrej se cataj nij yuvii rasuun 'ee cachén nij so' rque nuvíi a. ¹⁷Gaa ne tucu'yón so' man nij síi man rihaan nuvíi, ne cataj so':

—Ya uxrá danj Diose taj se vaa tucua Diose rej na'víj ndaa nij yuvii yanij rihaan Diose me nihánj á. Tzaj ne guun tucua síi ituu man tucua Diose nihánj, qui'yaj soj nanj á —taj Jesucristó a.

¹⁸Ne cuno nij xrej do', nij síi naqui'yaj cuu se-tucuanj Moisés rihaan yuvii do', se-nana Jesucristó, gaa ne nano' uxrá nij so' daj qui'yaj nij so' ne ca'vee cavi' Jesucristó a. 'O se chu'vi' nij so' ni'yaj nij so' man Jesucristó, che'é se ca'anj ndo'o rá cunudanj nij yuvii cuno nij yuvii nana tucu'yón Jesucristó a. ¹⁹Tzaj ne ca'anj güii, ne nichrun' guun rmi', ne curihanj uún Jesucristó ga nij síi tucu'yón se-nana so' chuman' Jerusalén ca'anj nij so' a.

**Nana nihánj taj xna'anj daj quiran'
chruun man chruj higó raá a**

²⁰Gaa ne rej na'yaan yo'ó güii me se vaj Jesucristó ga nij síi tucu'yón se-nana so' chrej, ne cachén nij so' rej nicun' chruun higó ca'mii Jesucristó rihaan gaa güii quii, ne dan me se yo'q nacoo ndaa yáa nu' chruun yo' a. ²¹Dan me se nanuj rá síi cu'naj Pedró daj ca'mii Jesucristó

rihaan chruun yo', ne che'é dan cataj so' rihaan Jesucristó a:

—Ni'yaj so', maestro. Nacoo nu' chruun ca'mii chree so' rihaan gaa quii nanj á —taj Pedró rihaan Jesucristó a.

²²Gaa ne cataj Jesucristó rihaan taran' nij so' a:

²³—Cuchuman rá soj ni'yaj soj Diose ei. Ya ya cataj xna'anj 'unj rihaan soj se vaa me ma'an 'o sí cataj rihaan ndaa quij xcaan yo' se vaa curihanj quij rej nicun' quij ne ca'anj nij quij rque na ya'anj, ne sese se guun vij rá so' ne cuchuman ya rá so' se vaa guun nu' ndaa vaa cataj so', ne ya guun ndaa vaa cataj so' adonj. ²⁴Che'é dan cataj xna'anj 'unj rihaan soj se vaa nu' se vaa cachinj ni'yaj soj rihaan Diose ro', sese cuchuman rá soj se vaa aj qui'yaj Diose danj che'é soj, ne ya ya guun ndaa vaa cachín ni'yaj soj adonj. ²⁵Ne gaa nicun' soj achín ni'yaj soj rihaan Diose, ne sese vaa cacun' qui'yaj yo' o so' rihaan soj, ne caraa x'naa soj che'é cacun' tumé tuvi' soj, gaa ne ca'vee caraa x'naa Rej soj sí nicun' xtá' ni'yaj so' cacun' tumé ma'an soj adonj. ²⁶Tzaj ne sese se ca'vej rá soj caraa x'naa soj che'é cacun' qui'yaj tuvi' soj rihaan soj, ne daj chihaa míj se tinavij Rej soj sí nicun' xtá' cacun' tumé ma'an soj a ma' —taj Jesucristó rihaan nij sí tucu'yón se-nana so' a.

Nana nihánj taj xna'anj se vaa xna'anj nii man Jesucristó me sí ca'ne' suun rihaan so' qui'yaj so' ndaa vaa 'yaj so' a

²⁷Gaa ne catúj uún Jesucristó ga nij sí tucu'yón se-nana so' rque

chuman' Jerusalén, gaa ne chée Jesucristó rá nuví nocoo, ne cuchi' nij xrej atá suun nocoo doj do', nij sí naqui'yaj cuu se-tucuanj Moisés rihaan yuvií do', nij sí uun chij rihaan nij yuvií do', rihaan so', ²⁸gaa ne cataj nij so' rihaan so' a: —Me sí ca'ne' suun rihaan so' qui'yáa so' ndaa vaa 'yáa so' ga —taj nij so' a.

²⁹Gaa ne cataj Jesucristó rihaan nij so' a:

—Ne vaa yo' o nana xna'anj 'unj man nij soj, ne sese ya cataj xna'anj nij soj nana yo' rihanj, ne cataj xna'anj 'unj rihaan soj me sí ca'ne' suun rihanj a. ³⁰Dan me se me sí ca'ne' suun rihaan sí cu'naj Juan cuta' ne so' man yuvií, rá soj ga. Ma'an Juan cavii raa na'. Ase Diose cataj xna'anj rihaan so' xa'. Cataj xna'anj nij soj rihanj á —taj Jesucristó a.

³¹Gaa ne nuchruij raa ndo'o nij so' ga tuvi' nij so', ne cataj nij so':

—Sese cataj ní' se vaa Diose ca'ne' suun rihaan sí cu'naj Juan cuta' ne so' man yuvií, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a. ³²Tzaj ne daj chihaa míj se ca'vee cataj ní' se vaa ma'an Juan cavii raa qui'yaj danj ma' —taj nij so' rihaan tuvi' nij so', che'é se chuchuvi' nij so' ni'yaj nij so' man nij yuvií a.

'O se nij yuvií me se sí ca'neé Diose nata' se-nana Diose rihaan yuvií me ya sí cu'naj Juan, rá cunudanj nij yuvií a.

³³Gaa ne cataj nij so' rihaan Jesucristó a:

—Ne ne'en núj me sí ca'ne' suun rihaan sí cu'naj Juan cuta' ne so' man yuvií ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihañj qui'yáj ndaa vaa 'yáj ma' — taj Jesucristó rihaan nij so' a.

Nana nihánj me cuentó nanó Jesucristó che'é yuvij chi'ij 'yaj suun rihaan yo'ó a

12 Gaa ne guun che'e Jesucristó nanó so' cuentó rihaan nij so' a:

—Dan me se cuchruj yo'ó so' naa chruj uvá, ne qui'yaj so' chingá nu' anicaj tu'va naa yo', gaa ne gáán so' yu'uj rej xtun' chruj uvá ne cavii na, ne cune' so' 'o ve' nata' cayáán nij sí cutumé naa yo' a. Gaa ne tanáj so' naa yo' rihaan sí qui'yaj suun naa yo', ne curihañj so' ca'anj so' gan' a. ²Cachén doj yavii, ne quisíj yavii cutá nii chruj uvá, ne ca'née sí xnaa yo' man yo'ó se-mozó so' rihaan nij sí nuu tumé xnaa so' a. Me rá so' ca'na' nıcaj se-mozó so' doj chruj uvá rihaan ma'an so' a. ³Gaa ne quita'aa nij sí nuu tumé naa man se-mozó sí xnaa, ne go' uxrá nij so' chruun xráá so', ne ca'née nij so' man so' rihaan sí xnaa a. Tzaj ne a doj chruj uvá ne nıcaj so' ca'anj so', qui'yaj nij so' a ma'. ⁴Gaa ne ca'née sí xnaa man yo'ó mozó rihaan nij sí nuu tumé xnaa so' uún a. Tzaj ne go' nij so' raá so', ne qui'yaj chi'ij nij so' man so' a. ⁵Gaa ne ca'née sí xnaa yo'ó mozó uún, ne ticavi' nij sí nuu tumé naa man so', ne que'ee doj mozó ca'née uún sí xnaa, ne ta'aj nij so' go' nij sí nuu tumé naa xráá, ne yo'ó ta'aj nij so' ticavi' nij sí nuu tumé naa, ⁶ne daj orún' so' quináj, ne sí quináj me ta'ní sí xnaa, ne

'ee ndo'o rá sí xnaa man ta'ní so' a. Tzaj ne ca'née sí xnaa yo' man ta'ní so' rihaan nij sí tumé xnaa so' a. “Caraa cochroj nij sí tumé naa rihaan ta'nıj sese ca'anj ta'nıj saj xee”, taj sí xnaa yo' a.

⁷”Tzaj ne cataj nij sí tumé naa rihaan tuvi' nij so': “Sí nihánj me sí guun xnaa naa nihánj vaa güii ei. Che'é dan ticavi' ní man so', ne vaa güii, ne guun xnaa ma'an ní man naa nihánj chuguanj”, taj nij so' ni'yaj nij so' man ta'ní sí xnaa a. ⁸Gaa ne quita'aa nij so' man ta'ní sí xnaa yo', ne ticavi' nij so' man so', ne quiri'ij nij so' man so' xe' a.

⁹”Ne daj qui'yaj sí xnaa man nij sí tumé xnaa so', rá soj ga. Dan me se ca'na' so', ne ticavi' so' man nij so', ne tıcuachén so' xnaa so' rihaan yo'ó sí tumé xnaa so' a. ¹⁰Ne me che'é ne nayaa nij soj nana nihánj nana no rihaan danj Dıose ga: “Yuvej quiri'ij nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj. ¹¹Ma'an sí 'nij ra'a man ní qui'yaj yo', ne cunaj uxrá vaa yo', rá ní á”, taj danj Dıose a — taj Jesucristó rihaan nij sí uun chij rihaan nij yuvij israelitá a.

¹²Gaa ne nanó rá nij so' daj gaa quita'aa nij so' man Jesucristó, tzaj ne cuchu'vi' nij so' ni'yaj nij so' man nij yuvij a. Ése che'e ma'an nij so' me cuentó nanó Jesucristó a. Ase vaa nij sí nuu tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. Gaa ne tanáj nij so' man Jesucristó, ne ca'anj nij so' a.

Nana nihánj taj xna'anj che'é puextó
gò' ní' rihaan gobiernó ne che'é
se rque ní' rihaan Diose do' a

¹³Gaa ne ca'néé nij síi uun chij
yo' doj síi fariseo do', doj síi noco'
man síi cu'naj Herodes do', rihaan
Jesucristó, che'é rej cuta' nij so'
cacun' xráá Jesucristó che'é nana
ca'mij Jesucristó a. ¹⁴Dan me se
cuchi' nij síi tiha' yu'unj yo' rihaan
Jesucristó, ne cataj nij so' rihaan
so' a:

—Ne'en núj se vaa nana ya inanj
a'mii so', maestro. Ne ne chu'ví'
so' ni'yaj so' man nij yuvii daj cataj
nij yuvii ma'. Ne 'o cuyaán vaa nu'
yuvii rihaan so' chuguanj. Maan
se ya tucu'yón so' rihaan yuvii daj
qui'yaj yuvii canoco' yuvii man
Diose adonj. Ne no xcúún yuvii go'
yuvii puextó rihaan síi nicaj suun
gobiernó na'. Ase se go' yuvii xa'.
Dan me se go' núj na'. Se go' núj
xa' —taj nij so', xná'anj nij so' man
Jesucristó a.

¹⁵Dan me se aj ne'en Jesucristó se
vaa síi nucui' rá me nij síi xná'anj
nana yo' man so', ne che'é dan cataj
so' rihaan nij so' a:

—Me che'é me rá soj tiha' yu'unj
soj manj ne cuta' soj cacun' xráj ga.
Tihaan soj 'o sa'anj aga' rihanj
ni'yaj á —taj Jesucristó rihaan nij
síi me rá tiha' yu'unj man so' a.

¹⁶Ne tihaan nij so' 'o sa'anj aga'
rihaan so', ne xná'anj so' man nij
so', cataj so':

—Me síi nó rihaan sa'anj aga'
nihánj ga. Ne me síi se-chuvii nó
rihaan sa'anj aga' nihánj ga —taj
Jesucristó, xná'anj so' man nij síi
me rá tiha' yu'unj yo' a.

—Síi nicaj suun gobiernó me
nó rihaan sa'anj aga' yo', ne nó
se-chuvii so' rihaan sa'anj ei —taj
nij so' a.

¹⁷Gaa ne cataj Jesucristó:

—Go' soj si'yaj síi nicaj suun
rihaan ma'an so', ne rque soj
si'yaj Diose rihaan Diose á —taj
Jesucristó a.

Gaa ne ca'anj ndo'o rá nij síi me
rá tiha' yu'unj yo' ni'yaj nij so' man
Jesucristó a.

Nana nihánj taj xna'anj se vaa
ya cunuu i'na' uún nij síi cavi' a

¹⁸Gaa ne cuchi' doj síi saduceo
rihaan Jesucristó a. Nij síi saduceo
ro', a'mii nana nihánj se vaa daj
chihaa mij se cunuu i'na' uún yuvii
asa' cavi' yuvii, taj nij so' a. Dan
me se xná'anj nij so' man Jesucristó,
ne cataj nij so' nana nihánj a:

¹⁹—Cachrón síi cu'naj Moisés
nana nihánj rihaan yanj cunó ní' a:
“Sese cavi' yo' o so', ne sese quináj
uun nica so', ne sese taj vaj ta'níi
so', ne no xcúún tinúú so' xcaj tinúú
so' man choco' so' chana quináj, ne
cotoj tinúú síi cavi' ga choco' so', ne
cuchruj no' ne'ej, ne guun ta'nij síi
cavi' man ne'ej yo' ne cunuú ne'ej
yo' rihaan to'óó síi cavi' yo' a”, me
nana cachrón síi cu'naj Moisés
rihaan yanj gaa naá, maestro. ²⁰Dan
me se vaa chij nij tinuj 'o nij so', ne
síi chava' me se xcaj so' chana, gaa
ne cavi' so', ne taj vaj ne'ej cuchruj
chana nica so', qui'yaj so' a. ²¹Gaa ne
xcaj scue'ee síi cavi' man choco' so'
chana cavi' nica, gaa ne cavi' so' uún,
ne taj vaj ne'ej cuchruj chana yo',
qui'yaj so', ne veé danj xcaj scue'ee
so' uún man chana, ne so' cavi' uún,

ne veé danj qui'yaj cunudanj chij
 nij tinuj nij so', ne xcaj cunudanj
 nij so' man orún' chana yo', tzaj ne
 cavi' cunudanj nij so', ne taj vaj a 'ó
 ne'ej cuchruj chana yo' a man adonj.
²²Ndaa síj, gaa ne cavi' ma'an chana
 uún, ²³ne dan me se asa' cunuu i'na'
 uún nij sí cavi', gaa ne me tuvi' nij
 so' nıcaj man chana yo', rá so' ga. 'O
 se gaa vaa i'na' nij so', ne nıca taran'
 nij tinuj nij so' guun orún' no' a —taj
 nij sí saduceo, xná'anj nij so' man
 Jesucristó a.

²⁴Gaa ne cataj Jesucristó rihaan
 nij so' a:

—Ne ne'en uxrá soj ma'. 'O se ne
 ne'en soj me taj danj Diose, ne ne
 ne'en soj sese nucuaj ndo'o Diose a.
²⁵'O se asa' cunuu i'na' uún nij sí
 cavi', ne se xcaj tuvi' nij so' a ma'.
 'O se ase vaa yáan nij se-mozó Diose
 rej xtá' ro', danj gaa cayáan nij so'
 nanj adonj. ²⁶Gaa ne cataj xna'anj
 'unj rihaan soj daj gaa quene'en soj
 se vaa ya ya cunuu i'na' uún yuviı
 asa' cavi' yuviı ei. Ataa nayaa soj
 nana nihánj nana no rihaan danj
 Moisés nana che'é coj aco' ya'an
 raá na'. Ne dan me se gaa quene'en
 Moisés coj yo', ne cataj Diose rihaan
 Moisés: “Diose sí noco' nij sí man
 gaa naá sí cu'naj Abraham do', sí
 cu'naj Isaac do', sí cu'naj Jacobo
 do', mej a”. Danj cataj Diose che'é
 nij sí man gaa naá yo' a. ²⁷Dan
 me se nuveé se-Diose nij xngá
 me Diose ma'. Inanj nij sí vaa i'na'
 a'vee noco' man Diose nanj adonj.
 Che'é dan, nda' se sí cane gaa naá
 me va'nıj nij so', tzaj ne vaa i'na'
 nij so' rihaan Diose nanj ei. Ne
 ne'en uxrá soj a ma' —taj Jesucristó
 rihaan nij sí saduceo yo' a.

Nana nihánj taj xna'anj me nana
 me nana nocoo doj cunó ní' a

²⁸Gaa ne yo'o nij sí naqui'yaj cuu
 se-tucuanj Moisés cuchi' rihaan
 Jesucristó, ne so' ro', me sí cuno
 daj ca'mii Jesucristó ga nij sí
 saduceo yo', ne quene'en so' se vaa
 sa' uxrá ca'mii Jesucristó, ne che'é
 dan xná'anj so' man Jesucristó, ne
 cataj so':

—Me nana me nana nocoo doj
 rihaan cunudanj nij nana cataj
 xna'anj Diose rihaan ní' cunó
 ní' ga —taj so', xná'anj so' man
 Jesucristó a.

²⁹Gaa ne cataj Jesucristó rihaan
 so' a:

—Nana nocoo doj rihaan cunudanj
 nij nana cunó ní' me nana nihánj,
 ne: “Cunó soj sij israelitá, ne Diose
 sí 'nij ra'a man ní' me se oruun so',
³⁰ne ndaa nimán yá so' guun rá so'
 ni'yaj so' man Diose sí 'nij ra'a man
 ní', ne yo'o ndaa cúú yave yá so'
 cuchuman ya rá ni'yaj man Diose,
 ne ndaa nu' se nucuaj yá so' caraa
 cochroj rihaan Diose nanj adonj”.
 Ne nihánj me ya nana uun chij ya
 nanj ei. ³¹Ne vaa yo'ó nana nihánj
 nana me rá Diose cunó uún ní' a:
 “Adi' se 'ee rá so' man ma'an so' ro',
 danj gaa 'ee rá so' man tuvi' so' á”.
 Taj vaj yo'ó nana nocoo doj rihaan
 roj nana nihánj nana cataj xna'anj
 Diose rihaan ní' a man adonj —taj
 Jesucristó rihaan sí naqui'yaj cuu
 se-tucuanj Moisés yo' a.

³²Gaa ne cataj sí naqui'yaj
 cuu se-tucuanj Moisés yo' rihaan
 Jesucristó a:

—Cunaj uxrá ca'mii so', maestro,
 ne ya uxrá vaa nana ca'mii so', se

vaa oruun Diose, ne taj vaj tuvi' Diose, maan se oruun so' nicun', ³³ne ya uxrá vaa nana se vaa sese ndaa nimán ya ní' guun rá ní' ni'yaj ní' man Diose do', sese yo'o cuchuman rá ndaa cúu yave ya ní' ni'yaj ní' man Diose do', sese ndaa nu' se nucuaj man ní' caraa cochroj rihaan Diose do', sese gaa 'ee rá ní' man tuvi' ní' ndaa se 'ee rá ní' man ma'an ní' do', ne sa' doj vaa tucuáan nihánj rihaan nu' tucuáan nago' que'ee scúj cacaa rihaan Diose nanj chuguanj —taj síi naqui'yaj cuu se-tucuanj Moisés yo' rihaan Jesucristó a.

³⁴Gaa ne quene'en Jesucristó se vaa ya cavii raá síi ca'mii danj rihaan so', ne che'é dan cataj Jesucristó rihaan so':

—So' me se nichrun' ya guun hij Diose nimán so' nanj ei —taj Jesucristó rihaan so' a.

Ne taj vaj síi quisij rá xna'anj yo'ó nana man Jesucristó a ma'.

Nana nihánj taj xna'anj se vaa síi ca'née Diose tinanii man yuvii rihaan sayuun ro', nuveé nanj yuvii me so' ma'

³⁵Dan me se gaa tucu'yón Jesucristó se-nana so' man nij yuvii rá nuví nocoo, ne cataj so':

—Nij síi naqui'yaj cuu se-tucuanj Moisés rihaan yuvii ro', me che'é taj nij so' se vaa nanj ta'níi ta'nij si'no síi cu'naj David síi cane gaa naá me síi ca'na' tinanii man yuvii rihaan sayuun, rá soj ga. ³⁶O se nuú Nimán Diose nimán síi cu'naj David, ne cataj síi cu'naj David: “Ca'mii Diose síi 'nij ra'a man ní' rihaan síi 'nij ra'a manj, cataj so' se

vaa cayáan síi 'nij ra'a manj x'núu Diose rej nuva' Diose ndaa se quisij qui'yaj canaán Diose rihaan taran' nij síi taj ri'yun man síi 'nij ra'a manj ne quirii ta'nga' síi 'nij ra'a manj rihaan nij so' nanj adonj”, taj síi cu'naj David yo' a. ³⁷Dan me se síi 'nij ra'a man síi cu'naj David me síi ca'nej Diose tinanii man yuvii rihaan sayuun, taj síi cu'naj David yo' a. Sese 'nij ra'a so' man David, ne me che'é taj nij síi naqui'yaj cuu se-tucuanj Moisés se vaa nanj ta'níi ta'nij si'no David me so' ga. Taj che'é cataj nij so' se vaa nanj yuvii me so' ma' —taj Jesucristó rihaan nij yuvii man rá nuví nocoo a.

Que'ee nij yuvii cuno se-nana Jesucristó, ne guun niha' rá nij so' cunó nij so' se-nana so' a.

Nana nihánj taj xna'anj che'é cacun' tumé nij síi naqui'yaj cuu se-tucuanj Moisés rihaan yuvii a

³⁸Dan me se gaa tucu'yón Jesucristó se-nana so' man nij yuvii, ne cataj so':

—Xcaj nij soj cuentá daj 'yaj nij síi naqui'yaj cuu se-tucuanj Moisés rihaan yuvii, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunuú nij so' yatzij sa' xcaan cachee nij so' rej quene'en yuvii man nij so', ne me rá nij so' ca'mii sa' yuvii ga nij so' gaa chéé nij so' rihaan yu'vee a. ³⁹Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuanj Moisés do', gaa 'anj nij so' cha'anj do' a. ⁴⁰Ne a'nej nij so' ve' tucua chana cavi' nica, ne yuun che'e guun tucua nij so' man ve' yo', ne 'yaj xcaan ndo'o nij so' cuentó achín ni'yaj

nij so' rihaan Diose, che'é rej sa' doj guun nucaj nij so' tihá' yu'unj nij so' man yuvií a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quirañ' nij so' qui'yaj Diose, asa' ca'ne' Diose cacun' che'é yuvií adonj — taj Jesucristó rihaan nij yuvií a.

Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a

⁴¹Dan me se taj Jesucristó rej taj chrúun sa'anj taj rihaan nuvií nocoo, ne ne'en so' daj qui'yaj nij yuvií gaa araa nij yuvií sa'anj aga' rque chrúun sa'anj yo' che'é Diose, ne dan me se man ndo'o sí ru'vee araa uxrá sa'anj rque chrúun yo' a. ⁴²Ne dan me se ca'na' 'o chana cavi' nica chana nique, ne caraa no' vj guee sa'anj aga' le'ej rque chrúun yo' a. ⁴³Gaa ne canacúun Jesucristó man nij sí tucu'yón se-nana so' ca'na' nij so' rihaan so', gaa ne cataj so' rihaan nij so' a:

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj ne doj a caraa no' sa'anj rque chrúun yo' rihaan sa'anj caraa cunudanj yo'ó nij yuvií nanj adonj. ⁴⁴'O se nij so', daj doj sa'anj quináj raa se-sa'anj nij so' ro', caraa nij so' rque chrúun, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudanj sa'anj nicaj no' sa'anj quirañ no' se cha no' nanj adonj —taj Jesucristó rihaan nij sí tucu'yón se-nana so' a.

Nana nihánj taj xna'anj se vaa canee nu' nuvií nocoo ne chuman' Jerusalén a

13

Gaa ne curihanj Jesucristó rá nuvií nocoo, gaa ne yo'o

tuvi' nij sí tucu'yón se-nana so' cataj rihaan so' a:

—Ni'yaj so', ne yuvej sa' inanj me yuvej guun nuvií nocoo, ne ve'é ndo'o vaa nu' nij ve' man nuvií nocoo, maestro —taj yo'o tuvi' nij sí tucu'yón se-nana Jesucristó a.

²Gaa ne cataj Jesucristó rihaan so' a:

—Ne'én so' nu' nij ve' nocoo man nuvií nihánj na'. Vaa güii, ne canee nu' nuvií nocoo nihánj, ne a 'ó yuvej se quitáá xráa tuvi' yuvej nihánj a ma' —taj Jesucristó rihaan sí tucu'yón se-nana so' a.

Nana nihánj taj xna'anj che'é sayuun guun rihaan chumií nihánj vaa güii a

³Dan me se ca'anj cayáan Jesucristó raa quij cu'naj Quij man Chruun Olivó, ne ni'yaj so' nuvií nocoo, ne cuchi' orún' ca'anj nij sí cu'naj Pedró do', Jacobo do', Juan do', Andrés do', rihaan so', ne xná'anj nij so' man so', cataj nij so':

⁴—Cataj xna'anj so' rihaan núj aman canee nu' nuvií nocoo yo' do', a me rasuun ca'na' qui'yáa so' asa' quisíj ca'na' nu' nij sayuun ndaa vaa cataj xna'anj so' rihaan núj, maestro —taj ca'anj tuvi' nij sí tucu'yón se-nana Jesucristó rihaan Jesucristó a.

⁵Gaa ne guun che'e Jesucristó cataj xna'anj Jesucristó rihaan nij so', ne:

—Cutumé ndo'o soj man soj se gaa nanj tihá' yu'unj yuvií man soj á. ⁶'O se ca'na' uxrá yuvií cataj: “'Unj me sí na'vij soj, ne Cristó mej á”, cataj nij so', ne dan me se tihá' yu'unj uxrá nij so' man tuvi' nij so' nanj á.

7”Dan me se asa' quene'en soj se vaa unu' uxrá chuman' ga tuvi' chuman', ne asa' cuno uxrá soj nana se vaa unu' chuman' man gan' ga tuvi' chuman' yo', ne cutumé soj man soj se cuchu'vi' nimán soj ma'. Maan se vaa che'é guun sayuun yo' rihaan chumii nihánj adonj. Tzaj ne asa' quisíj guun danj, gaa ne se ca'anj ni'ya chumii nihánj nu' orá ma'. 'O se quinaj chumii nihánj doj adonj. 8”Dan me se cunu' uxrá yuvi' man chuman' nocoo ga yo'ó chuman' nocoo, ne cunu' gobiernó ga tuvi' gobiernó a. Ne cachén yuún nocoo que'ee chuman', ne cachén ndo'o x'naa uún a. Nu' sayuun nihánj ro', ase vaa guun che'e 'o chana que'ee rque no' cuchruj no' ne'ej ro', danj gaa nu' sayuun nihánj nanj ei. Dan me se nu' ne'en chana ve'ee rque no', ne ne'en no' doj a quiran' no' sayuun rej rihaan no', ne ase uun rá chana yo', danj guun rá soj gaa ca'na' sayuun yo', guun rá soj se vaa daj doj guun uxrá sayuun rihaan chumii nihánj nanj adonj.

9”Ne tadó soj che'é sayuun quiran' ma'an soj ei. 'O se tacuachén nii man soj rihaan nij sí uun chij rihaan ní' sij israelitá, ne tacuachén nii man soj rihaan nij sí man rá ve' tucu'yón ní' se-tucuanj Moisés, ne maan yo' go' nii cuartá xráá soj a. Ne tacuachén nii man soj canicun' soj rihaan síí nicaj suun do', rihaan síí nicaj suun rey do', che'é se me soj síí noco' manj a. Ne cataj xna'anj soj rihaan nij síí nicaj suun che'ej a. 10”Ne asino ca'mii natáj soj se-nanaj nana sa' rihaan cunudanj nij síí yaníj, gaa ne ca'vee quinavij chumii nihánj adonj.

11”Dan me se asa' ca'anj nicaj nii man soj rihaan nij síí nicaj suun, ne se nanó rá soj daj ca'mii soj rihaan nij so' ma'. Maan Nimán Diosé rque nu' nana ca'mii soj man orá yo' nanj adonj. 'O se nuveé ma'an soj me nij síí ca'mii rihaan nij so' ma'. 'O se Nimán Diosé me síí ca'mii rihaan nij so' nanj adonj. 12”Dan me se ca'anj nicaj snó'o man tinúú snó'o rihaan yuvi', ne ticavi' nii man tinúú snó'o yo', qui'yaj ma'an so' nanj adonj. Ne ca'anj nicaj snó'o man ta'níí snó'o rihaan yuvi', ne ticavi' nii man ta'níí snó'o yo', qui'yaj so' ei. Ne cunu' xnii ga rej xnii, ne ca'anj nicaj xnii man rej xnii rihaan yuvi', ne ticavi' nii man rej xnii yo', qui'yaj so' ei. 13”Ne nachri' cunudanj nij yuvi' man rihaan chumii ni'yaj nij so' man soj, che'é se me soj síí noco' manj adonj. Tzaj ne síí noco' raan manj ndaa se ca'anj ni'ya chumii nihánj ro', so' me síí quinanii rihaan sayuun adonj —taj Jesucristó rihaan ca'anj tuvi' nij síí tucu'yón se-nana so' a.

14”Ne soj sij nayaa nana nihánj ro', xcaj uxrá soj cuentá me taj nana nihánj nana ca'mii Jesucristó che'é se chi'ii á.

Dan me se cataj uún Jesucristó: —Aj ne'en soj se vaa vaa 'o se chi'ii qui'yaj ndo'o sayuun man yuvi', ne dan me se güii quene'en soj man se chi'ii yo' rej ne nó xcúún yo' nicun' yo', ne yo'ó cunanj nij síí man estadó Judea ca'anj nij so' raá quij á. 15”Ne síí taj xráá ve' tucua ro', se catúj so' rá ve' tucua so' quirii so' si'yaj so' ma'. 16”Ne síí 'yaj suun tacaan ro', se canicaj so' nana so' sagan' so' se vaa tanáj so'

rihaan yo'óo ma'. Se guun raan nij so' ma'. Maan se yo'o cunanj nij so' á. ¹⁷Nique nij chana nuu rque do', chana vaa ta'níi ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'. ¹⁸Cachinj ni'yaj soj rihaan Diose se vaa se ca'na' sayuun yo' güii gaa maan ma'.

¹⁹"O se güii yo' me se ca'na' uxrá sayuun, ne quij doj gaa sayuun yo' rihaan nu' nij sayuun quiran' yuvií asij qui'yaj Diose chumií, ne daj chihaa míj se quiran' uún yuvií sayuun vaa danj ma'. ²⁰Sese que'ee uxrá güii guun sayuun, ne se quinanii yuvií rihaan sayuun yo' ma'. Tzaj ne vaa güii quisij sayuun, qui'yaj síi 'nij ra'a man ní', che'é rej quinanii nij síi narii so' canoco' man so' adonj.

²¹"Ne güii yo' me se sese cataj yuvií rihaan soj: "Ni'yaj soj ei. Nihánj 'na' síi tñanii man ní' rihaan sayuun á", ne se cuchumán rá soj ma'. ²²O se ca'na' uxrá síi ne síi cataj se vaa síi tñanii man yuvií rihaan sayuun me nij so', ne ca'na' uxrá síi ne síi cataj se vaa nata' nij so' se-nana Diose, ne qui'yaj nij so' suun sa' nocoo, ne tiha' yu'unj nij so' man cunudanj nij yuvií man rihaan chumií nanj adonj. Ndaa nij síi narii Diose man ro', sese taj vaj Diose tumé man nij so', ne cuchuman rá nij so' ni'yaj nij so' man síi tiha' yu'unj yo' nanj adonj. ²³Tadó uxrá soj á. Nihánj me se cataj xna'anj 'unj rihaan soj daj guun rihaan chumií nihánj nanj á.

²⁴"Tzaj ne güii yo' me se asa' navij quisij sayuun yo', gaa ne guun rmi' güii guun rmi' yavii

guun rmi', ²⁵ne cayuu nij yati' xta', ne quinaan taran' nij rasuun nucuaj man rej xta' a. ²⁶Gaa ne quene'en nii mán 'unj sij ca'née Diose nicaj yu'unj man yuvií á. Dan me se xráá ngaa quitaj 'unj ca'na' 'unj, ne guun nucuaj ndo'oj quirii ta'ngaj, ne ve'é uxrá curuvij ca'naj a. ²⁷Gaa ne ca'nej 'unj man nij se-mozó 'unj cuchí' nij so' rihaan chumií nihánj, ne dan me se naqui'yaj chre' 'unj man nij síi narii Diose man canoco' manj a. Dan me se cachee nij se-mozó 'unj rihaan nu' chumií nihánj, nano' nij so' taran' nij síi cunuu chre' ga 'unj nanj adonj.

Nana nihánj taj xna'anj se vaa ya quene'en ní' se vaa nichrun' ca'na' uún Jesucristó a

²⁸"Tucu'yón soj nana nihánj nana che'é chruun man chruj higó raá á. Gaa quisij guun laruu ra'a chruun, ne naca coj ya'lij ra'a chruun, ne ne'en soj se vaa nichrun' 'na' tió namán maan a. ²⁹Dan me se xcax uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa síi nicun' ta'yaa ro', gaa 'unj ei. ³⁰Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumií nihánj cuano se vaa quisij ya 'unj nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. ³¹Vaa güii ca'anj ni'ya yo'óo do', xta' do', tzaj ne se-nanaj me se daj chihaa míj se quinavij yo' ma'.

Nana nihánj taj xna'anj se vaa ne ne'en ní me güii ca'na' uún Jesucristó ma'

³²Nihánj me cataj xna'anj 'unj rihaan soj se vaa a 'ó sí ne ne'en me güii ca'na' uún 'unj rihaan chumii nihánj ma'. Ca'vee se ndaa se-mozó Diose 'yaj suun rej xtá', ca'vee se ndaa ma'anj ta'nij Diose, tzaj ne ne ne'en núj me güii me yo' ma'. Orún' Réj me sí ne'en nanj adonj. ³³Yo'lo ni'yaj soj, ne se guun cotoj soj ma'. 'O se ne ne'en uxrá soj me güii me ca'naj ma'. ³⁴Dan me se ase vaa sí ca'anj yo'ó chuman' naj gan' vaa 'unj, ne aj tanáj 'unj ve' tucua, ne ca'né' 'unj suun rihaan 'o 'o nij mozó nuu rihanj se vaa ve'é cutumé nij so' nu' si'yáj, ne ase vaa sí tumé ta'yaa vaa nij soj, ne aj cataj xna'anj 'unj rihaan nij soj se vaa ni'yaj soj a. ³⁵Che'é dan tumé uxrá soj man soj, ne ni'yaj soj á. 'O se ne ne'en soj aman ca'na' 'unj sij tucua ve' ma'. Ca'vee ca'naj rej ti'nuu, ca'vee rej yan', ca'vee orá aguáj to'loo ca'vee rej na'yaan ca'vee, ³⁶ne tadó soj se guun taj ni'yón ca'naj ne nari' 'unj man soj ne xcax 'unj cuentá se vaa otoj rma'an soj ei. ³⁷Ne nana nihánj nana taj xna'anj 'unj rihaan nij soj ro', veé nana nihánj taj xna'anj 'unj rihaan cunudanj nij yuvii, se vaa tumé soj man soj se gaa nanj cotoj rma'an soj a —taj Jesucristó rihaan ca'anj tuvi' nij sí tucu'yón se-nana so' a.

Nana nihánj taj xna'anj se vaa 'o guun rá nij xrej atá suun nocoo doj do', nij sí naqui'yaj cuu se-tucuanj Moisés rihaan yuvii do', se vaa cavi' Jesucristó a

14 Dan me se rque vij güii çanuú cha'anj pascuá

cha'anj chá nij yuvii israelitá chraa yo'óo trigó, ne dan me se 'o guun rá nij xrej atá suun nocoo doj ga nij sí naqui'yaj cuu se-tucuanj Moisés rihaan yuvii se vaa tihá' yu'unj nij so' man Jesucristó, ne quita'aa yuve nij so' man Jesucristó, ne cavi' Jesucristó, qui'yaj nij so', rá nij so' a. ²Ne cataj nij so':

—Se quita'aa ní' man so' gaa aman anuú cha'anj ma'. Sese danj qui'yaj ní', ne ca'maan rá nij yuvii, ne guun sayuun, qui'yaj nij yuvii nanj adonj —taj nij so' a.

Nana nihánj taj xna'anj se vaa caxrj 'o chana casté raq Jesucristó a

³Dan me se yáan Jesucristó chuman' cu'naj Betania, ne ne so' rá 'o ve' tucua sí cu'naj Simón sí canó luj ri'yuj man, ne yáan Jesucristó rihaan mesá, ne cuchi' yo'ó chana rihaan so', ne nicaj chana yo'ó aga' catzii nuu casté gun' daj rii nii man coj cu'naj nardo, ne casté tu'vee ndo'o me yo' a. Naxra' chana yo' aga', ne caxrj chana casté raq Jesucristó a. ⁴Ne ca'maan rá ta'aj nij sí quene'en, ne cataj nij so' rihaan tuvi' nij so':

—Me che'é tiri' rma'an chana nihánj casté sa' ga. ⁵Me che'é ne cutu'vee no' casté, ne quiri' no' sa'anj ase vaa 'yaj canaán yuvii rque 'o yo', ne go' no' sa'anj yo' man nij sí nique ga —taj nij so' rihaan tuvi' nij so', gaa ne guun che'e nij so' caxrj yuvaa nij so' man chana yo' a.

⁶Gaa ne cataj Jesucristó rihaan nij so' a:

—Me che'é a'mii soj danj ni'yaj soj man chana ga. Ca'ne' guee rá

nij soj doj nanj á. ⁷O se ve'é uxrá qui'yaj no' manj ei. ⁷O se sí nique me se daǵ a güii mán nij sí nique ga soj, ne me ma'an güii guun rá soj, ne ca'vee qui'yaj soj se luj ga nij sí nique ei. Tzaj ne 'unj me se vaa güii ca'anj 'unj, ne quinaǵ uun soj, ne se ca'vee qui'yaj soj se luj che'ej ma'. ⁸Ne chana nihánj me se qui'yaj ma'an no' nu' ndaa vaa ca'vee qui'yaj no', ne dan me se gaa ataa cavi' 'unj ne aj caxrǵ no' casté gun' daj manj che'é rej xcaǵ soj cuenta se vaa cachin' nii manj adonj. ⁹Ne cataǵ yá yá 'unj rihaan nij soj cuano se vaa me rej ma'an ca'mii natáj yuvii se-nanaj nana sa' rihaan nij yuvii man rihaan nu' chumii nihánj ro', ne cataǵ xna'anj uún yuvii rihaan tuvi' yuvii che'é se vaa qui'yaj chana nihánj manj, ne se quini'yón yuvii man chana nihánj ma' —taj Jesucristó a.

Nana nihánj taj xna'anj se vaa cutu'vej sí cu'naj Judas man Jesucristó rihaan nij sí taj ri'yunj man Jesucristó a

¹⁰Gaa ne sí cu'naj Judas Iscariote yo'o tuvi' chuvij nij sí tucu'yón se-nana Jesucristó me se cavi so' ca'anj so' rihaan nij xrej atǵ suun nocoo doj, che'é rej raçuǵ so' man nij so' quita'aa nij so' man Jesucristó a. ¹¹Ne gaa cuno nij xrej atǵ suun nocoo doj, ne guun niha' uxrá rá nij so', ne cata' tu'va nij so' se vaa nago' nij so' sa'anj man sí cu'naj Judas a. Gaa ne guun che'e sí cu'naj Judas nuchruǵ raǵ so' aman ca'vee raçuǵ so' man nij xrej atǵ suun nocoo doj quita'aa nij so' man Jesucristó a.

Nana nihánj taj xna'anj se vaa ma'an Jesucristó taj xna'anj se vaa taçuachén yo'o tuvi' nij sí tucu'yón se-nana so' man so' rihaan nij sí taj ri'yunj man so' a

¹²Dan me se quisǵ güii yaan canuú cha'anj chá nij yuvii israelitá chraa yo'óo trigó, ne güii ticavi' nij so' matzinǵ le'ej che'é Diosé me yo', ne dan me se nij sí tucu'yón se-nana Jesucristó me se xná'anj nij so' man Jesucristó, cataǵ nij so':

—Me rej ca'anj núǵ qui'yaj chuvii núǵ cha xti'no ní' cha'anj pascuá, rá so' ga —taj nij so' rihaan Jesucristó a.

¹³Gaa ne ca'neé Jesucristó man vij tuvi' nij sí tucu'yón se-nana so', ne cataǵ so' rihaan roǵ so' a:

—Cavii roǵ soj, ne catuu roǵ soj chuman' Jerusalén nihánj, ne nari' tuvi' roǵ soj ga 'o sí atǵ 'o cacuaǵ na, ¹⁴ne canoco' roǵ soj man so', ne rihaan sí tucua ve' catuu so' me se cataǵ soj: “Xná'anj maestró mán so' se vaa me rej ne ve' cha xti'no maestró chraa ga nij sí tucu'yón se-nana so' che'é cha'anj pascuá, taj so' a”, cataǵ roǵ soj rihaan sí tucua ve' yo' á. ¹⁵Gaa ne tihaan so' 'o ve' nata' xij rihaan roǵ soj, ne aj vaa chuvii rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvii roǵ soj á —taj Jesucristó rihaan roǵ so' a.

¹⁶Gaa ne curihaǵ roǵ sí tucu'yón se-nana Jesucristó, ne catúǵ roǵ so' chuman' Jerusalén, ne nari' roǵ so' nu' ndaa vaa cataǵ xna'anj Jesucristó rihaan roǵ so', gaa ne qui'yaj chuvii roǵ so' cha xti'no nij

so' chraa che'é cha'anj pascuá a.
 17 Ne rej tí'nuu, ne ca'na' Jesucristó
 ga yo'ó chí' nij síí tucu'yón se-nana
 so' a.

18 Dan me se yáán nij so' rihaan
 mesá, chá nij so' chraa, ne cataj
 Jesucristó rihaan nij so' a:

—Ya ya cataj xna'anj 'unj rihaan
 soj cuano se vaa yo'ó tuvi' nij soj
 me síí tacuachén manj rihaan nij
 síí taj ri'yunj manj, ne síí chá chraa
 ga 'unj cuano me síí qui'yaj danj ei
 —taj Jesucristó a.

19 Gaa ne guun che'e nij síí
 tucu'yón se-nana so' quinanó ndo'o
 rá nij so', ne guun che'e nij so' ndaa
 'o 'o nij so' xná'anj man Jesucristó,
 cataj 'o 'o nij so':

—'Unj me síí qui'yaj danj na' —taj
 'o 'o nij so' a.

20 Gaa ne cataj Jesucristó rihaan
 nij so' a:

—Yo'ó tuvi' chuvij nij soj sij
 tucu'yón se-nanaj me síí tacuachén
 manj rihaan nij síí taj ri'yunj manj,
 ne síí tiguíj rachrúún ga 'unj rá co'oo
 me so' adonj. 21 'O se taj danj Diose
 se vaa ca'anj 'unj cavi' 'unj sij ca'née
 Diose nīcaj yu'unj man yuvii, ne ya
 danj quirán' 'unj adonj. Tzaj ne nique
 ndo'o síí tacuachén manj rihaan nij
 síí taj ri'yunj manj nanj á. Quiran'
 uxrá so' sayuun nanj á. Snó'o yo' me
 se sese ne ca'ngaa so', ne cavii sa' so'
 doj tzaj adonj —taj Jesucristó a.

**Nana nihánj taj xna'anj che'é
 rachrúún rqué Jesucristó rihaan
 nij síí tucu'yón se-nana so'
 cha nij so' do', che'é na vinó
 rqué so' co'ó nij so' do' a**

22 Ne gaa chá nij so' chraa, ne
 quita'aa Jesucristó yo'ó rachrúún,

ne nago' so' graciá rihaan Diose, ne
 cuxra' ta'aj so' rachrúún, ne rqué so'
 rihaan nij síí tucu'yón se-nana so',
 ne cataj so':

—Quita'aa soj rachrúún nihánj á.
 Ne manj me rachrúún nihánj ei —
 taj so' a.

23 Gaa ne quita'aa Jesucristó
 aga' tazá nuu na vinó, ne nago' so'
 graciá rihaan Diose, ne tacuachén
 so' aga' nuu na vinó rihaan nij so',
 ne co'ó cunudanj nij so' na vinó
 yo' a. 24 Gaa ne cataj so' rihaan nij
 so' a:

—Ton manj me na nihánj, ne che'é
 ton manj ro', rqué Diose 'o nana
 rihaan soj daj qui'yaj Diose ga soj a.
 Dan me se cayanj ton manj che'é
 que'ee yuvii adonj. 25 Ne cataj ya
 ya 'unj rihaan soj cuano se vaa veé
 doj nihánj me co'oj, ne se co'oj yaj
 a ma'. Tzaj ne asa' quisíj güii guun
 chij Diose rihaan chumií nihánj,
 ne cunuu naca chumií nihánj, gaa
 ne co'oj na vinó naca ei —taj
 Jesucristó rihaan nij síí tucu'yón
 se-nana so' a.

26 Gaa ne cachrää taran' nij so'
 chra' rihaan Diose, ne cavii nij so',
 ca'anj nij so' quij cu'naj Quij man
 Chruun Olivó a.

**Nana nihánj taj xna'anj se vaa
 cataj xna'anj Jesucristó se vaa
 guun na'aj síí cu'naj Pedró, ne
 cataj so' se vaa nuveé sij noco'
 man Jesucristó me so' a**

27 Gaa ne cataj Jesucristó rihaan
 nij so' a:

—Danj Diose taj se vaa go' Diose
 man síí tumé matzinj, ne cunanj
 nij matzinj cha'nuu nij xo' a. Ne ya
 ase vaa daán 'unj matzinj vaa soj, ne

guun na'aj taran' soj, ne se canoco' soj manj a ma'. ²⁸Tzaj ne asa' quisij cunuu i'na' uún 'unj, ne quitaj yaan 'unj rihaan soj ca'anj 'unj estadó Galilea, ne nari' tuvi' ní' estadó Galilea nanj adonj —taj Jesucristó rihaan nij sí tucu'yón se-nana so' a.

²⁹Gaa ne cataj sí cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa mǐj se tanáj 'unj mán so' ma' —taj Pedró a.

³⁰Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa nii cuan' gaa ataa quisij vij caguáj to'loo, ne va'núj ya cataj so' rihaan yuvii se vaa nuveé sij noco' manj mé so' a —taj Jesucristó rihaan Pedró a.

³¹Gaa ne nucuaj uxrá cataj Pedró rihaan Jesucristó, ne:

—Taj ma'. Ca'vee se ticavi' yuvii man ní', tzaj ne daj chihaa mǐj se cataj 'unj se vaa nuveé sij noco' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij sí tucu'yón se-nana Jesucristó a.

**Nana nihánj taj xna'anj daj
qui'yaj Jesucristó gaa cachíin
ni'yaj Jesucristó rihaan Diose a**

³²Gaa ne ca'anj Jesucristó ga nij so' ndaa yo'ó rej cu'naj Getsemani', ne cataj xna'anj Jesucristó rihaan nij so' a:

—Cane soj nihánj, na'vij soj mán 'unj, ne ca'anj 'unj, cachinj ni'yáj rihaan Réj a —taj Jesucristó a.

³³Ne nicaj Jesucristó man Pedró do', man Jacobo do', man Juan

do', ca'anj so', ne guun che'e so' quinano ndo'o rá so' a. ³⁴Gaa ne cataj so' rihaan va'núj nij sí ca'anj ga so' a:

—Naná uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinaj soj nihánj, ne se cotoj soj ma' —taj Jesucristó rihaan va'núj nij so' a.

³⁵Gaa ne cavii so' yanj doj tzin', ne ca'anj cayáan rno so' rihaan yo'óó, ne cachíin ni'yaj so' rihaan Diose se vaa sese ca'vee, ne caráan ra'a Diose xráa so', se gaa nanj quiran' so' sayuun a. ³⁶Dan me se cataj so':

—Ca'vee qui'yáa so' cunudanj, Ataj. Caráan ra'á so' xráj, se gaa nanj quiran' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáa so' ndaa vaa me rá ma'án so', ne se qui'yáa so' ndaa vaa me rá ma'anj ma' —taj Jesucristó, cachíin ni'yaj so' rihaan Diose a.

³⁷Gaa ne canicaj uún so' ca'na' so' rihaan va'núj nij sí tucu'yón se-nana so', ne quene'en so' se vaa cotoj cunudanj nij so' a. Gaa ne cataj so' rihaan Pedró a:

—Otoj so', nanj Pedro. A 'ó orá ne guun nucuáa so' ni'yaj so' a ma'. Ya na'. ³⁸Maan se ni'yaj soj, ne cachinj ni'yaj soj rihaan Diose se vaa caráan Diose rihaan sí chree se caxrj sí chree chrej chi'ii rque soj á. 'O se niha' rá soj qui'yaj soj se sa', tzaj ne ne uun nucuaj soj ma' —taj Jesucristó rihaan nij so' a.

³⁹Gaa ne cavii uún Jesucristó, ca'anj so', ne cachíin ni'yaj uún so' rihaan Diose, ne cuyaan vaa

nana ca'mii so' rihaan Diose ga nana ca'mii so' asij cua'aa doj a. ⁴⁰Gaa ne canicaj uún so' ca'na' so', ne quene'en so' se vaa cotoj uún va'nuj nij sí tucu'yón se-nana so' a. 'O se ca'na' ndo'o nej rihaan nij so' a. Ne ne narí' nij so' nana ca'mii nij so' rihaan so' a.

⁴¹Gaa ne corá me se ca'na' uún so' rej man va'nuj nij sí tucu'yón se-nana so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Ní'yaj soj, ne nihánj me se quisj orá tacuachén yo'o so' manj rihaan sí tumé ndo'o cacun', che'é se mé 'unj sí ca'née Diose nicaj yu'unj man yuvií adonj. ⁴²Naxagaa soj, ca'anj ní' nanj ei. Ní'yaj soj nedí'. 'Na' sí tacuachén manj rihaan sí taj ri'yunj manj nanj chuguanj —taj Jesucristó a.

Nana nihánj taj xna'anj daj qui'yaj nii gaa quita'aa nii man Jesucristó a

⁴³Dan me se nicun' Jesucristó ca'mii so', ne nu' ca'na' sí cu'naj Judas yo'o tuvi' chuvij nij sí tucu'yón se-nana Jesucristó, ne ca'na' uxrá yuvií ga so', ne nicaj nij yuvií neê espadá do', chruun do' a. Dan me se nij yuvií ca'née nij xrej atá suun nocoo doj do', nij yuvií ca'née nij sí naqui'yaj cuu se-tucuanj Moisés do', nij yuvií ca'née nij sí uun chij rihaan nij yuvií israelitá do', me nij yuvií ca'na' a. ⁴⁴Ne sí cu'naj Judas cataj xna'anj rihaan nij yuvií se vaa daj qui'yaj so' ga Jesucristó, gaa ne cunu yaaan nij yuvií man Jesucristó, ne cataj so':

—Sí rutu'vaj ro', so' me sí quita'aa soj cuaj á. Raan cano soj man so', ca'anj soj á —taj sí cu'naj Judas a.

⁴⁵Gaa ne nu' cuchí' so' cuaj rihaan Jesucristó, ne cataj so':
—Maestro —taj so', ne nu' cachrón tu'va so' xruu Jesucristó a.

⁴⁶Gaa ne cuchí' nij yuvií rihaan Jesucristó, ne quita'aa nij yuvií man Jesucristó a.

⁴⁷Ne yo'o sí nicun' ga Jesucristó me se quirii so' taneê so' neê espadá, ne go' so' neê espadá yo' raá yo'o se-mozó xrej atá suun nocoo doj, ne veé dan güéj nu' xréé mozó yo', qui'yaj so' a.

⁴⁸Gaa ne cataj Jesucristó rihaan nij yuvií a:

—Me che'é nicaj soj neê espadá nicaj soj chruun nicaj soj, ca'na' soj ga. Sí ituu mé 'unj, rá soj na'.

⁴⁹Ne 'o se guun que'ee güií cayáan 'unj rá nuví nocoo, tucu'yón 'unj se-nanaj rihaan soj, tzaj ne ne quita'aa soj manj ma'. Tzaj ne nihánj me se quirán' 'unj nu' se vaa taj nana no rihaan danj Diose a —taj Jesucristó a.

⁵⁰Gaa ne tanáj cunudanj nij sí tucu'yón se-nana Jesucristó man so', ne cunanj nij so', ca'anj nij so' a.

⁵¹Ne vaa 'o sí tachruu nocoo' xcó Jesucristó, ne orún' yatzíj mantá niquee so', ne quita'aa nij yuvií man so', ⁵²gaa ne tanáj so' yatzíj mantá ra'a nij yuvií, cunanj so', ne cánj uun vaa so', cunanj so' a.

Nana nihánj taj xna'anj daj qui'yaj nii gaa cuta' nii cacun' xraá Jesucristó a

⁵³Dan me se nij sí quita'aa man Jesucristó me se nicaj nij so' man Jesucristó ca'anj nij so' rihaan sí yanj xrej atá suun nocoo doj, gaa ne cunu chre' yo'ó nij xrej atá suun

nocoḡo doj do', nij sí naqui'yaj cuu se-tucuanj Moisés rihaan nij yuvii do', nij sí uun chij do', rej mán nij so' a. ⁵⁴Ne gan' gan' canoco' sí cu'naj Pedró xcó Jesucristó, ne cuchi' so' rihaan ve' yanj xrej atā suun nocoḡo doj yo', ne catúj so' rá ve', ne ca'anj cayáán so' ga nij se-mozó xrej man rá ve', tinaguun so' ra'a so' rihaan ya'an a.

⁵⁵Dan me se nano' nij xrej atā suun nocoḡo doj nano' nij cuese nano' man yuvii cataj xna'anj che'le cacun' tumé Jesucristó a. Me rá nij so' nari' nij so' cacun' cutā' nij so' xráá Jesucristó, ne cavi' Jesucristó, rá nij so' a. Tzaj ne nuvi' cacun' tumé Jesucristó nari' nij so' ma'. ⁵⁶O se cuchi' uxrá sí ne rihaan nij cuese ca'mii ne nij so', tzaj ne ino vaa nana ca'mii 'o 'o nij so' a. ⁵⁷Gaa ne canicun' yo'ó doj sí ne uún, ne guun rá nij so' cutā' nij so' cacun' xráá Jesucristó, ne dan me se cataj nij so':

⁵⁸—Cuno núj se vaa cataj Jesucristó se vaa: “'Unj me síf ta긗uanee nuvií nocoḡo nihánj nuvií cune' yuvii, ne rque va'núj güii cune' 'unj yo'oj uún, tzaj ne nuveé nuvií cune' ma'an yuvii me nuvií cune' 'unj a man adonj”, taj Jesucristó cuno núj ei —taj síf ne ni'yaj nij so' man Jesucristó, ⁵⁹tzaj ne ndaa se-nana nij so' me se ne 'o cuyaán vaa nana ca'mii 'o 'o nij so' a ma'. ⁶⁰Gaa ne canicun' xrej atā suun nocoḡo doj tanuu yo'ó nij síf man rá ve' yo', ne xná'anj so' man Jesucristó, cataj so':

—Me che'le ne a'mii so' ga. Daj vaa nana nihánj nana a'mii roj síf nihánj che'le so' ga —taj so', xná'anj so' man Jesucristó a.

⁶¹Tzaj ne dínj táá Jesucristó, ne ca'mii so' a doj nana a. Gaa ne xná'anj uún xrej atā suun nocoḡo doj man Jesucristó, ne:

—So' me ta'ní Diose síf tinanii man yuvii rihaan sayuun na' —taj so', xná'anj so' man Jesucristó a.

⁶²Gaa ne cataj Jesucristó rihaan so' a:

—Veé danj vaa ya ei. Ne quene'en soj se vaa quitaj 'unj rej nuva' Diose síf nucuaj ndo'o á. Ne quene'en uún soj se vaa ca'na' uún 'unj rihaan chumii nihánj, ne quitaj 'unj xráá ngaa xtā' ca'naj adonj —taj Jesucristó rihaan xrej atā suun nocoḡo doj yo' a.

⁶³Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Ni'yaj soj vij. Se cachiin doj síf ca'na' cataj xna'anj rihaan ní' che'le cacun' tumé síf nihánj a ma'.

⁶⁴Ne cuno soj nana quij ca'mii so' se vaa quitaj ma'an so' rej x'núj Diose na'. Aj cuno soj chuguanj. Ne daj qui'yaj ní' man so', rá soj ga —taj xrej, xná'anj xrej man nij tuvi' xrej a.

Gaa ne cunudanj nij so' cuta' cacun' xráá Jesucristó se vaa no xcúún Jesucristó cavi' Jesucristó a.

⁶⁵Gaa ne guun che'e ta'aj nij so' quirii talúj nij so' man Jesucristó, ne caráán nij so' yatzíj rihaan Jesucristó, ne go' nij so' man Jesucristó, ne cataj nij so':

—Ra긗ú Diose mán so' cataj xna'anj so' rihaan núj me síf go' mán so' vij —taj nij so', tiha' yu'unj nij so' man Jesucristó a.

Ne nicaj nij tanuu man so', ne go' nij tanuu chruun xráá so' a.

Nana nihánj taj xna'anj daj
qui'yaj síí cu'naj Pedró gaa
cataj so' se vaa nuveé sij nocó'
man Jesucristó me so' a

⁶⁶Veé dan, ne yanj Jesucristó
ga yo'ó nij so' rá ve', ne yanj síí
cu'naj Pedró rej rque doj rej rihaan
ve' yo' a. Gaa ne ca'na' yo'ó mozó
chana nuu rihaan xrej atá suun
nocoo doj, ⁶⁷ne quene'en no' man
Pedró gaa tinaguun Pedró ra'a
Pedró rihaan ya'an a. Gaa ne ni'yaj
uxrá mozó chana yo' man Pedró,
gaa ne cataj no':

—Ne ma'an so' me yo'ó síí cachéé
ga Jesucristó síí cavii chuman'
Nazaret á —taj mozó chana yo'
rihaan Pedró a.

⁶⁸—Taj ma'. Ne unó 'unj me taj
so' ma' —taj Pedró rihaan mozó
chana, gaa ne curihanj so', ne
canicun' so' rihaan chingá a.

⁶⁹Gaa ne quene'en mozó chana se
vaa nicun' Pedró rihaan chingá, ne
guun che'e no' ca'mii no' rihaan nij
yuvii nicun' rihaan chingá ga Pedró,
cataj no':

—Síí nihánj me yo'ó nij síí cachéé
ga Jesucristó asuun asán —taj
mozó chana yo' a.

⁷⁰Gaa ne cataj uún Pedró se vaa
ne ne'en so' man Jesucristó a.

Dan me se corá nii me se cataj nij
síí nicun' ga Pedró rihaan Pedró a:

—Ya ya yo'ó síí cachéé ga
Jesucristó mé so' ei. 'O se sij cavii
estadó Galilea mé so' chuguanj —
taj nij so' rihaan Pedró a.

⁷¹Gaa ne guun che'e Pedró nucaj
doj ca'mii Pedró, cataj Pedró se vaa
ca'vee qui'yaj Diose sayuun man so'

sese nuveé nana ya me nana a'mii
so', ne cataj so':

—Ne ne'enj man snó'o nihánj
síí a'mii soj che'é a ma' —taj uún
Pedró, ⁷²gaa ne nu' quisij vij caguáj
to'loo a.

Gaa ne nanuj rá Pedró ndaa vaa
cataj Jesucristó rihaan so' quii se
vaa gaa ataa quisij vij caguáj to'loo,
ne va'nuj cataj Pedró se vaa nuveé
sij nocó' man Jesucristó me ma'an
Pedró a. Gaa ne guun che'e Pedró
ta'vee ndo'o Pedró a.

Nana nihánj taj xna'anj daj ca'mii
síí cu'naj Pilato ga Jesucristó a

15 Gaa ne rej ranga' cunuu
chre' nij xrej atá suun
nocoo doj do', nij síí uun chij do',
nij síí naquiyaj cuu se-tucuanj
Moisés do', cunudanj nij cuese do',
qui'yaj nij so' juntá, gaa ne numij
nij so' man Jesucristó, ne nicaj
nij so' man Jesucristó ca'anj nij
so' rihaan síí cu'naj Pilato, ne
tacuachén nij so' man Jesucristó
rihaan so' a. ²Gaa ne xná'anj síí
cu'naj Pilato man Jesucristó, cataj
so':

—So' me síí nicaj suun rey uun
chij rihaan nij yuvii israelitá na' —
taj so', xná'anj so' man Jesucristó a.

—Vej ei —taj Jesucristó rihaan
so' a.

³Ne cuta' ndo'o nij xrej atá suun
nocoo doj cacun' xráá Jesucristó a.

⁴Gaa ne xná'anj uún síí cu'naj
Pilato man Jesucristó, cataj so':

—Me che'é ne a'mii so' ga. Nihánj
me se uta' uxrá nii cacun' xráá
so' ei —taj síí cu'naj Pilato rihaan
Jesucristó a.

⁵Tzaj ne yuun che'e ne ca'mii Jesucristó a doj nana rihaan so', ne caráya'anj uxrá sí cu'naj Pilato che'é yan qui'yaj so' danj a.

Nana nihánj taj xna'anj se vaa cataj xna'anj sí cu'naj Pilato se vaa cavi' Jesucristó rihaan rcutze a

⁶Ne vaa yo'o tucuáán noco' sí cu'naj Pilato se vaa rii so' man yo'o yo'o sí 'nij taga' 'o 'o cha'anj pascuá, ne tinavij uun so' cacun' tumé sí urihanj taga' yo' a. Me ma'an 'o sí 'nij taga' achíín nij yuvii se vaa quirii so', ne ca'vee qui'yaj so' ndaa vaa taj nij yuvii a. ⁷Dan me se vaa 'o sí cu'naj Barrabás 'nij taga' ga yo'ó nij sí guun rá cunu' ga gobiernó, ne nij so' me se gaa cunu' nij so' ga gobiernó ne ticavi' ndo'o nij so' yuvii a. ⁸Dan me se cavii nij yuvii israelitá, ne guun che'e nij so' cachíín nij so' man sí cu'naj Pilato se vaa quirii so' man 'o sí 'nij taga' ndaa vaa u'yón so' 'yaj so' che'é nij so' a. ⁹Gaa ne xná'anj sí cu'naj Pilato man nij yuvii, cataj so':

—Ne me rá soj quirii 'unj man sí nicaj suun rey uun chij rihaan soj sij israelitá na' —taj so', xná'anj so' man nij yuvii a.

¹⁰Danj ca'mii so', ne'en so' se vaa maan che'é se guun xcoj ruvaa rá nij xrej atá suun noco'o doj me tacuachén nij xrej man Jesucristó rihaan so' a.

¹¹Tzaj ne nij xrej atá suun noco'o doj me se cataj xna'anj nij so' rihaan nij yuvii se vaa quirii sí cu'naj Pilato man sí cu'naj Barrabás taga' qui'yaj nij yuvii a.

¹²Gaa ne xná'anj uún sí cu'naj Pilato man nij yuvii, cataj so':

—Che'é se me rá soj quirii 'unj man sí cu'naj Barrabás rihaan soj, ne che'é dan daj qui'yáj man sí tucunáj soj sí nicaj suun rey uun chij rihaan soj ga —taj so', xná'anj so' man nij yuvii a.

¹³Gaa ne caguáj uún nij yuvii, cataj nij yuvii:

—Cavi' so' rihaan rcutze, qui'yáa so' ei —taj nij yuvii a.

¹⁴—Tzaj ne me cacun' tumé so' ga —taj sí cu'naj Pilato, xná'anj so' man nij yuvii a.

Tzaj ne doj a caguáj nij yuvii, cataj nij yuvii:

—Cavi' so' rihaan rcutze, qui'yáa so' cuaj ei. —Danj inanj caguáj nij yuvii a.

¹⁵Ne sí cu'naj Pilato me se guun rá so' qui'yaj so' ndaa vaa no xcúún so' qui'yaj so' che'é nij yuvii, ne che'é dan quirii so' man sí cu'naj Barrabás taga' che'é nij yuvii, ne go' nij tanuu cuartá xráá Jesucristó, qui'yaj so', ne tacuachén so' man Jesucristó rihaan nij tanuu che'é rej cachron nij tanuu man Jesucristó rihaan rcutze a.

Nana nihánj taj xna'anj se vaa ca'nga' naco'o nij tanuu ni'yaj nij tanuu man Jesucristó a

¹⁶Gaa ne ca'anj nicaj nij tanuu man Jesucristó rá ve' tucuá sí nicaj suun gobernador, gaa ne canacúún nij tanuu man taran' nij tuvi' tanuu nij so' cunuu chre' taran' nij so' a.

¹⁷Gaa ne nanuú Jesucristó sagan' rey yatzíj tintá, qui'yaj nij tanuu, ne qui'yaj nij so' cachriin tanj, cuta' nij so' raa Jesucristó a. ¹⁸Gaa ne guun che'e nij tanuu caguáj nij tanuu rihaan Jesucristó, cataj nij tanuu:

—Ya ya sij nicaj suun rey rii ta'nga' rihaan nij yuvii israelitá mé so' ei —taj nij so', tiha' nij so' man Jesucristó a.

¹⁹Gaa ne go' nij so' vará raa Jesucristó, ne quirii talúj nij so' man Jesucristó, ne canicun' ruj nij so' rihaan Jesucristó, ne qui'yaj nij so' ndaa vaa 'yaj yuvii na'vúj rihaan ya'anj a. ²⁰Síj ca'nga' nacoo nij so' ni'yaj nij so' man Jesucristó, gaa ne quirii uún nij so' sagan' rey yatzíj tintá nuu Jesucristó, ne na'née uún nij so' sagan' uún Jesucristó man uún so', gaa ne nicaj nij so' man Jesucristó cavii nij so' ca'anj nij so' yan cachron nij so' man Jesucristó rihaan rcutzé a.

**Nana nihánj taj xna'anj daj qui'yaj
nij yuvii gaa cachrón nij tanuu
man Jesucristó rihaan rcutzé a**

²¹Dan me se gaa vaj nij tanuu ga Jesucristó, ne 'na' nique yo'o síí cu'naj Simón síí cavii chuman' Cirene rej tacaan, ne so' me se rej roj síí cu'naj Alejandro ga Rufo me so', ne dan me se quita'aa nij tanuu man so', ne qui'yaj uxrá nij tanuu fuerzá man síí cu'naj Simón yo' çata so' rcutzé cano Jesucristó rihaan a. ²²Dan me se nicaj nij tanuu man Jesucristó ca'anj nij tanuu tacaan cu'naj Gólgota, ne nana “Gólgota” ro', taj Tacaan Cúú Yave Xnangá a. ²³Gaa ne rqué nij tanuu doj na vinó nachej ga na e' cu'naj mirra man Jesucristó co'o so' a. Tzaj ne ne co'o so' ma'. ²⁴Veé dan, ne cachrón nij tanuu man Jesucristó rihaan rcutzé, ne tico tixaj nij so' che'é sagan' Jesucristó me síí qui'yaj canaán 'o 'o ta'aj sagan' so' a.

²⁵Dan me se aga' uun rej xta' güii me cachrón nij tanuu man Jesucristó rihaan rcutzé a. ²⁶Ne cachrón nij tanuu letrá rihaan 'o rcuchra', ne taj xna'anj letrá yo' me che'é cavi' Jesucristó, ne: “Síí nihánj me síí nicaj suun rey uun chij rihaan nij yuvii israelitá a”, taj letrá yo' a. ²⁷Gaa ne cachrón nij tanuu man yavíj snó'o rihaan yavíj rcutzé yo', ne yavíj roj so' me síí ituu a. Dan me se nicun' yo'o so' rej nuva' Jesucristó, ne nicun' yo'ó so' rej nichruun Jesucristó a. ²⁸Ne veé danj quisíj ya nu' nana no rihaan danj Diose nana taj: “Guun rá nii se vaa yo'o tuvi' nij síí tumé cacun' me so', rá nii a”, taj se-nana Diose yo' a. ²⁹Gaa ne cachén yuvii rej nicun' Jesucristó, ne ca'mii chi'ii ndo'o nij yuvii ni'yaj nij yuvii man Jesucristó a. Dan me se tucunó nij yuvii raaj nij yuvii, cataj nij yuvii: —Nihánj táá so' sij guun rá tãcuane man nuvií nocoo ne cune' yo'ó nuvií nocoo rque va'núj güii na'. ³⁰Tinanii so' mán so' rihaan rcutzé, ne nanij so' rihaan yo'óo yaj vij —taj nij yuvii rihaan Jesucristó a.

³¹Ne ase vaa qui'yaj nij yuvii ro', danj qui'yaj uún nij xrej ata suun nocoo doj do', nij síí naqui'yaj çuu se-tucañj Moisés do', ca'mii chi'ii nij so' rihaan tuvi' nij so' ni'yaj nij so' man Jesucristó, ne cataj nij so': —Tinanii síí nihánj man yo'ó yuvii rihaan sayuun, rá so', tzaj ne ne guun nucuaj so' tinanii so' man ma'an so' rihaan rcutzé danj. ³²Sese ya ya sij ca'née Diose tinanii man yuvii rihaan sayuun me so' do', sese ya ya sij nicaj suun rey uun chij

rihaan ní' sij israelitá me so' do', ne nanij so' cuano rihaan yo'óo, ne quene'en ní', ne cuchuman rá ní' ni'yaj ní' man so' adonj —taj nij so', chi'ij ndo'o ca'mii nij so' ni'yaj nij so' man Jesucristó a.

Ne roj sí' ituu nicun' rihaan rcutze rej x'nuj Jesucristó me se ca'mii roj so' nana nij rihaan Jesucristó a.

**Nana nihánj taj xna'anj daj
guun gaa cavi' Jesucristó a**

³³Veé dan, ne caxuj, ne yuun che'e guun rmi' rihaan chumii, ne yo'o guun rmi' chumii ndaa quisij aga' va'nuj rej anoco' güii a. ³⁴Veé dan, ne quisij aga' va'nuj, gaa ne nucuaq ndo'o caguáj Jesucristó, cataj so':

—Eloi, Eloi, lama sabactani —taj so', caguáj so' xna'ánj a'mii ma'an so' a. Ne nana caguáj so' taj: “Diose sí' noco' 'unj mé so' á. Me che'é tanáj uun so' mán 'unj ga”, taj nana caguáj Jesucristó a.

³⁵Ne cuno ta'aj nij sí' nicun' rej x'nuj Jesucristó nana caguáj so', tzaj ne ne cuno nij so' me taj Jesucristó a ma'. Maan se:

—Ni'yaj so' ei. Nacúun sí' nihánj man sí' cu'naj Elías tadonj —taj nij so' rihaan tuvi' nij so' a.

³⁶Gaa ne cunánj yo'o so', ne caraa so' na vinó yuu rque 'o yataan esponja, ne cuta' so' raá yo'o vará, ne ru'maan so' yataan tu'va Jesucristó, ne co'o Jesucristó na yuu yo', qui'yaj so', ne cataj sí' qui'yaj danj:

—Dínj qui'yaj soj á. Quene'en ní' sese ca'na' sí' cu'naj Elías tananij sí' cu'naj Elías man so' rihaan yo'óo ei —taj so' rihaan tuvi' so' a.

³⁷Gaa ne sca' caguáj Jesucristó, ne cavi' so' a. ³⁸Gaa ne quisin' yatzij

mantá cortiná noco' rá nuví' noco' yo' ndaa rej raá, ne 'o quini'j ca'anj ndaa tacóo yo' a.

³⁹Veé dan, ne nicun' tanuu capitán rihaan Jesucristó, ne quene'en so' nu' se vaa guun gaa cavi' Jesucristó, ne ndaa dan asuun gaa xcaj so' cuentá se vaa ya uxrá ta'nij Diöse me Jesucristó, ne dan me se cataj so':

—Ya ta'nij Diöse me snó'o nihánj tadonj —taj tanuu capitán yo' a.

⁴⁰Ne gan' doj nicun' que'ee chana, ni'yaj uun nij chana man Jesucristó a. Yo'o no' me chana cu'naj Mariá Magdalena, ne yo'ó no' me chana cu'naj Mariá nii sí' cu'naj Jacobo Cunij ga sí' cu'naj José a. Ne yo'ó no' me chana cu'naj Salomé a.

⁴¹Dan me se gaa vaj Jesucristó estadó Galilea, ne qui'yaj suun nij chana che'é Jesucristó a. Ne vaa que'ee doj chana uún ní' ca'anj chuman' Jerusalén ga Jesucristó a.

**Nana nihánj taj xna'anj se vaa
cachin' nii man Jesucristó
rque yu'uj yuvej a**

⁴²Dan me se rej ata' güii me yo', ne güii no' xcúun nij yuvi'j israelitá qui'yaj chuvii nij so' che'é güii a'yuj güii naránj rá nij so' me yo', ⁴³ne che'é dan ca'na' yo'o sí' cu'naj José sí' ne chuman' Arimatea, ne yo'o sí' sa' uun chij rihaan nij yuvi'j israelitá me so', ne sí' me ndo'o rá guun chij Diöse rihaan chumii nihánj me uún so' a. Dan me se quisij rá so', ne catúj so' rihaan sí' cu'naj Pilato, ne cachín ni'yaj so' rihaan sí' cu'naj Pilato se vaa ca'vej sí' cu'naj Pilato cachin' so' man Jesucristó a. ⁴⁴Dan me se caráya'anj

ndo'o síi cu'naj Pilato nana se vaa aj cavi' Jesucristó, gaa ne canacúin so' ca'na' tanuu capitán rihaan so', ne xná'anj so' man tanuu capitán sese ya ya cavi' Jesucristó a. ⁴⁵Gaa ne cataj tanuu capitán se vaa ya ya cavi' Jesucristó, ne che'é dan ca'vej rá síi cu'naj Pilato nıcaj síi cu'naj José man Jesucristó ca'anj cachinj so' a. ⁴⁶Gaa ne xcaj síi cu'naj José yatzıj mantá, gaa ne tananij so' man Jesucristó, ne nacutáj so' yatzıj mantá xráá Jesucristó, ne caxrıj so' man Jesucristó rque yu'uj gáán nii rque yuvej, ne caráán so' yuvej xij tu'va yu'uj yo' a. ⁴⁷Ne quene'en chana cu'naj Mariá Magdalena do', chana cu'naj Mariá nii síi cu'naj José do', rej cachin' so' man Jesucristó a.

Nana nihánj taj xna'anj se vaa cunuu i'na' uún Jesucristó a

16 Ne ti'nuu güii naránj rá nij yuviı israelitá me se quiránj chana cu'naj Mariá Magdalena do', chana cu'naj Mariá nii Jacobo do', chana cu'naj Salomé do', yo'óó gun' daj, che'é rej ca'anj caxrıi nij no' yo'óó gun' daj man Jesucristó a. ²Gaa ne taxrej cotungó me se ca'anj va'nıj nij chana rej cachin' nii man Jesucristó, ne dan me se aj quisıj güii, ³ne cataj nij chana rihaan tuvi' chana, ne:

—Me síi quirıi yanıj yuvej aráán tu'va yu'uj gaa ne catuu ní' ga —taj nij no', xná'anj nij no' man tuvi' nij no' a.

⁴Gaa ne ni'yaj nij chana, ne quene'en nij chana se vaa aj naj yanıj yuvej, ne dan me se yuvej xij ndo'o me yo' a. ⁵Gaa ne catúj nij

chana rque yu'uj, gaa ne quene'en nij chana se vaa yanıj 'o síi yaan rej nuva' nij chana, ne nuú so' yatzıj xcaan catzii, ne ca'anj ndo'o rá nij chana a.

⁶Gaa ne cataj síi yaan rihaan nij chana a:

—Taj che'é ca'anj rá nij soj ma'.

Nihánj me nano' nij soj man Jesucristó síi cavii chuman' Nazaret síi cachrón nii rihaan rcutze, ne so' me se aj cunuu i'na' uún so' ei. Ne ni'yaj soj rej cuchruj nii man so', ne xcaj soj cuentá se vaa nuvi' so' naj nihánj a man adonj. ⁷Tananj cavıi soj cataj soj rihaan nij síi tucuyón se-nana so' do', ndaa rihaan Pedró do', cataj soj: “Táá yaan Jesucristó rihaan soj 'anj so' estadó Galilea, ne yo' me rej quene'en nij soj man so' ndaa vaa cataj ma'an so' rihaan soj á”, cataj nij soj rihaan Pedró ga yo'óó nij síi tucuyón se-nana so' á —taj síi yaan rihaan va'nıj nij chana a.

⁸Gaa ne curihanj nij chana rque yu'uj, ne cunánj nij chana, ca'anj nij no' a. 'O se ca'anj ndo'o rá nij chana, ne ndaa ri'ıj man nij chana a. Ne ne ca'vee ca'mıi nij no' a doj nana rihaan a 'o yuviı, che'é se cucu'vi' ndo'o nij no' a.

Nana nihánj taj xna'anj se vaa quene'en chana cu'naj Mariá Magdalena man Jesucristó a

⁹Dan me se cunuu i'na' uún Jesucristó taxrej cotungó, gaa ne curuvi' so' asino yaan rihaan chana cu'naj Mariá Magdalena, ne no' me chana quirıi so' chıj nana chree nimán asıj rque doj a. ¹⁰⁻¹¹Dan me se ca'anj no' rej man nij síi chée ga Jesucristó, ne dan me se nanó

ndo'o rá nij so', ne ta'vee nij so', ne dan me se cataj xna'anj no' rihaan nij so' se vaa vaa i'na' Jesucristó ne quene'en no' man Jesucristó, taj no', tzaj ne ne cuchuman rá nij so' a ma'.

Nana nihánj taj xna'anj se vaa curuvi' Jesucristó rihaan vij tuvi' nij sí tucu'yón se-nana so' gaa vaj roj so' rej tacaan a

¹²Cachén doj, gaa ne dan me se chéé vij tuvi' nij sí tucu'yón se-nana Jesucristó rej tacaan, ne curuvi' Jesucristó rihaan roj so', tzaj ne ino doj vaa so', ruvi' so', ni'yaj roj so' a. ¹³Gaa ne cavii roj so' uún, nata' roj so' rihaan yo'ó nij sí tucu'yón se-nana Jesucristó, tzaj ne nij so' me se ne cuchuman rá nij so' se-nana roj so' a.

Nana nihánj taj xna'anj se vaa curuvi' Jesucristó rihaan xaan nij sí tucu'yón se-nana so' a

¹⁴Corá me se gaa yaán xaan nij sí tucu'yón se-nana Jesucristó rihaan mesá, ne curuvi' ma'an Jesucristó rihaan nij so', ne cuta' so' cacun' xráá nij so' se vaa guun nichraj rá nij so' ne ne cuchuman rá nij so' se-nana nij sí quene'en man so' gaa cunu i'na' uún so' a. ¹⁵Gaa ne cataj Jesucristó rihaan nij so' a:

—Ca'anj nij soj rihaan nu' cachra' chumii, ne ca'mii natáj soj se-nanaj nana sa' rihaan cunudanj

nij yuvii a. ¹⁶Ne me ma'an 'o sí cuchuman rá se-nana soj ne cata' ne, ne so' me sí quinaniij rihaan sayuun, tzaj ne sí na'vej rá cuchuman rá se-nana soj me se qui'yaj Diose sayuun man so' che'é cacun' tumé so' adonj. ¹⁷Ne nihánj me suun sa' nocoo qui'yaj nij sí cuchuman ya rá ni'yaj manj, ne dan me se quitaj tu'va nij so' se-chuvií 'unj, quirii nij so' nana chree nimán yuvii, ne ca'mii nij so' xna'ánj naca xna'ánj ne ne'en ma'an nij so', ¹⁸ne ma'an ra'a nij so' quita'aa nij so' xcuáá yuvaa, ne ca'vee se co'lo nij so' se xnaj, tzaj ne a doj se quiran' nij so' chi'ii ma'. Ne cuta' ra'a nij so' xráá sí ran', ne nahuun sa' nij sí ran' yo' a —taj Jesucristó rihaan xaan nij sí tucu'yón se-nana so' a.

Nana nihánj taj xna'anj se vaa cavii Jesucristó xta' a

¹⁹Dan me se quisij ca'mii Jesucristó nana dan rihaan nij sí tucu'yón se-nana so', gaa ne cavii so' xta', gaa ne cayáán so' rej nuva' Diose a. ²⁰Gaa ne nij sí tucu'yón se-nana so' me se ca'anj ca'mii natáj nij so' se-nana so' nu' nij chuman', ne racuíj sí 'nij ra'a man ní' man nij so', ne dan me se che'é suun sa' nocoo qui'yaj nij so' me se raan doj canoco' nij yuvii se-nana Jesucristó a. Veé danj gaa ya ei.